

O LE EKALESIA A IESU KERISO O LE AU PAIA O ASO E GATA AI • TESEMA 2017

OLeLiahona




E Faapefea ona
Tatou Tapuai Atu
ia te la?
i. 4, 10, 16

O se Tama e Le Lauiloa,
o se Tagatavaai
Filifilia, i. 20

E Te Lagona le Pei
E Te Le Auai i le
Ekalesia? i. 28

Mataupu Faavae e
7 o le Talalelei Lena
e Puipua Ai, i. 34



O Iosefa F. Samita, lea na auauna atu o se Peresitene o le Ekalesia mai le 1901 i le 1918, o loo faaalia iinei i se tausaga ao lei maliu i le 80 o tausaga o lona soifua. O lona tama, o Ailama Samita, na maliu fasia faatasi ma Iosefa Samita i le 1844. I le 27 o tausaga, na faauuina ai Iosefa F. Samita o se Aposetolo i le 1866 e Peresitene Polika laga, ma na ia auauna atu o se fesoasoani i Peresitene e toafa o le Ekalesia. I le auauna atu ai o se Pulega Aoao mo le 52 tausaga, o ana aoaoga e tele na lomia i lalo o le autu Aoaoga Faavae o le Talalelei. Na ia mauaina foi le faaaliga o loo tusia nei i le Mataupu Faavae ma Feagaiga vaega 138.

Ata mai le faaaloaloga a le Potutusi o Talafaasolopito o le Ekalesia



O SAVALI

- 4 Savali a le Au Peresitene Sili: Sailia o Keriso i le Kerisimasi**
Saunia e Peresitene Dieter F. Uchtdorf
- 7 Savali a Faiaoga Asiasi: Naunau e Tauave Avega a le Tasi**



I LE FAAVAA

Sofua mai o le Faaola, saunia e Bruce Hixson Smith

TALA FAAALIA


- 10 Viiga i le Atua i Mea Aupitoaluga**
Saunia e Elder Ronald A. Rasband
O le a faapefea ona e filifili e avea o se molimau o Keriso i lenei vaitau o faigamalologa?
- 16 14 Mea na Tutupu i le Soifua Mai o Iesu**
Saunia e Jessica Griffith
Suesue i mea na tutupu a o lumai ma le tuanai ai o le soifua mai o le Faaola e pei ona tusia i tusitusiga pata.
- 20 Iosefa Samita: Malosiaga Mai i Vaivaiga**
Saunia e Elder Marcus B. Nash
E pei lava ona tutupu ai mo le Perofeta o Iosefa, e oo mai wavega ao tatou iloaina ma liliu atu o tatou vaivaiga i le Alti.
- 28 E Mafai ona Tatou Faia ia Sili Atu, Vaega 2: Mauaina o Lou Nofoaga i le Ekalesia a lesu Keriso**
Saunia e Betsy VanDenBerghe
Pe e te lagonaina ea e faapea e le tatau ona e i ai iina? O nisi nei o auala e sailia ai se fofo.

34 O Le Talalelei a lesu Keriso: O Se Malutaga ma se Puipuiga

Saunia e Getulio Walter Jagher e Silva
Mai le Mataupu Faavae ma Feagaiga: o auala e fitu ua folafolaina mai ia i tatou le puipuiga i o tatou olaga.

MATAGALUEGA

- 8 Aoao Atu i le Ala a le Faaola: Siitiaina o a Matou Talanoaga Faaleaiga**
Saunia e Doug Hart
- 40 O Leo o Le Au Paia o Aso e Gata Ai**
- 44 O Ata o le Faatuatua: Josephine Scere**
- 80 Seia Tatou Toe Feiloi: Lototoa i Fuafuaga Faatuina a Keriso**
Saunia e Peresitene Iosefa Samita



48

46 O Loo I Ai Tali i Monokolia!

Saunia e Po Nien (Felipe) Chou, Petra Chou, ma Odgerel Ochirjav
O le ala na faaaoga ai e le aufapestese a le autalavou matutua pese e faafafia ai se atunu—ma faasoa atu ai le talalelei.

48 O Lau Meaalofa i le Faaola

Saunia e Cherstan Pixton
Sa ou manaomia le taoia o le manatu mo au lava ia ae amata ona mafaufau i ou tuagane ma uso.

**50 O Le Toe Mauaina o Lona Faatuatua**

Saunia e David Dickson
Sa faasolo ina maalili le molimau a Te Oranoa, ae sa ia manatuaina pea ni aafiga matagofie mai lona taimi ua tuanai.

52 O Le Maneta o Pesepesega o le Kerisimasi

O tala e lua o faamanuiaga ofoofogia o pesepesega.

54 O Mafuaaga e Valu e Avea ai le Kerisimasi o se Taimi Maoae e avea ai ma se Faifeautalai


Saunia e Charlotte Larcabal
O ai na iloa o le avea ma se faifeautalai e mafai ona avea ma se mea e matuai faigofie lava?

58 Pepa Lautele o I Ai se Savali: Avanoa mo la**59 Tali mai Taitai o le Ekalesia: Pe Faapefea ona Lagonaina le Agaga Moni o le Kerisimasi**

Saunia e Peresitene Thomas S. Monson

60 Fesili ma Tali

"Sa ou tatalo mo se mea e taua, ae ou te le iloa pe na ou mauaina se tali. E faapefea ona Ou iloaina?"

62 O La Tatou Avanoa

76

64 O Le Malo Faapitoa o le Po o le Kerisimasi

Saunia e Holly K. Worthington
Auoi leai! O le a faaleagaina le po o le tausaga e sili ona fiafia i ai Clara.

66 Ia Lototoa ma Faasoa Atu!

Saunia e Elder Paul B. Pieper
Pe o le a e fesoasoani i au uo e aoao e uiga ia Iesu Keriso?

67 Ata Faatusa o le Talafaasolopito o le Ekalesia: O Le Ekalesia i le Taimi Nei**68 O Le Pepa Lanu Mumu**

Saunia e Darcie Jensen Morris
Na manao Mateo ia avea ma se uo lelei, e pei o Iesu. O le a se mea e mafai ona ia faia?

70 O Tali mai se Apostolo: E mafai faapefea ona fesoasoani le salamo ia te au ia lagona ai le fiafia?

Saunia e Elder Dale G. Renlund

72 O Aoaoga a lesu

Os ale malie lenei e faitau ai ia oo atu i le Kerisimasi e ala i le mulimuli i nisi o aoaoga a Iesu.

74 Musika: Fai se Avanoa mo la

Saunia e Larry Hiller ma Michael F. Moody

75 O La Tatou Itulau**76 Tala ia lesu: Na Soifua Mai lesu i Peteleema**

Saunia e Kim Webb Reid

79 Itulau e Valivali

O Le Lomiga Faamaonia Faa-Samoa a le Ekalesia
a Iesu Keriso o le Au Paia o Aso e Gata Ai

Susuga a le Au Peresitene Sili: Thomas S. Monson,
Henry B. Eyring, Dieter F. Uchtdorf

O Le Korama a Apostolo e Toasefululu:

Russell M. Nelson, Dallin H. Oaks, M. Russell Ballard,
Robert D. Hales, Jeffrey R. Holland, David A. Bednar,
Quentin L. Cook, D. Todd Christofferson, Neil L. Andersen,
Ronald A. Rasband, Gary E. Stevenson, Dale G. Renlund

Faatonu: Hugo E. Martinez

Assistant Editors: Randall K. Bennett, Carol F. McConkie

Fautua: Brian K. Ashton, Bonnie H. Cordon, LeGrand R.
Curtis Jr., Edward Dube, Sharon Eubank, Donald L.
Hallstrom, Douglas D. Holmes, Erich W. Kopischke

Pule Faatonusili: Richard I. Heaton

Faatonusili o Mekasini a le Ekalesia: Allan R. Loyborg

Pule o Mea Tau Pisini: Garff Cannon

Pule Faatonutonu: Adam C. Olson

Pule Faatonutonu Lagolago: Ryan Carr

Lagolago o Lomiga: Cremilda Amaral

Au Tositusi ma Faatonutonu: Maryssa Dennis, David
Dickson, David A. Edwards, Matthew D. Flitton, Lori Fuller,
Garrett H. Garff, LaRene Porter Gaunt, Jon Ryan Jensen,
Charlotte Larcabal, Michael R. Morris, Eric B. Murdock,
Sally Johnson Odeirkir, Joshua J. Perkey, Jan Pinborough,
Richard M. Romney, Mindy Anne Selu, Marissa Widdison

Pule Faatonusili Tusiata: J. Scott Knudsen

Faatonusili Tusiata: Todd R. Peterson

Au Mamanu: Jeanette Andrews, Fay P. Andrus, C. Kimball
Bott, Thomas Child, David Green, Colleen Hinckley, Eric P.
Johnsen, Susan Lofgren, Scott M. Mooy, Emily Chieko
Remington, Mark W. Robison, Brad Teare, K. Nicole
Walkenhorst

Faatonu o le Puletaofia ma Fatufatuga:

Collette Nebeker Aune

Pule i le Gaosiga: Jane Ann Peters

Au Gaosi: Ira Glen Adair, Julie Burdett, Thomas G. Cronin,
Bryan W. Gygi, Ginny J. Nilson, Derek Richardson

Tailolomi: Joshua Dennis, Ammon Harris

Faatonusili Lolomiga: Steven T. Lewis

Faatonusili o le Tufufatuga: Troy K. Vellinga

Mo le okaina o mekasini, alu i le store.lds.org po o le
Faletusi Tutotonu i Pesega. Telefoni 64127. Totogi o le
Mekasini: \$0.55 (Samoa) i le kopi. Totogi mo le Tausaga
Atoa \$6.60 (Samoa).

**Auina atu tusitusiga ma faafesili i luga o le
initoneti** i le liahona.lds.org: pe meli mai i le *Liahona*,
Rm. 2420, 50 E. North Temple, Salt Lake City, UT 84150-
0024, USA; po o le i-meli: liahona@ldschurch.org.

O Le *Liahona* (o lona uiga i le Tusi a Mamona o le "tapasa"
po o se "faatomuala") e lomia i le faa-Alepania, Aminia
(Sasae), Pisilama, Palekeria, Kemupotia, Sepuania, Saina,
Kalaotia, Siekisolovakia, Tenimaka, Take, Igilisi, Esitonua,
Fitii, Finelani, Farani, Siamani, Eleni, Hanikeri, Initu, Iselani,
Initonua, Italia, Japani, Kiripati, Korea, Latvia, Litunia,
Malakasa, Maselai, Monokolia, Nouei, Polani, Potukale,
Romania, Rusia, Samoa, Saina (ua faafaigoifieina), Silovenia,
Sipaniolo, Suetenia, Swahili, Tagaloka, Tahiti, Tai, Toga,
lukureini, Urutu, ma Viatename. (E eseesi lava gagana.)

© 2017 Puletaofia e le Intellectual Reserve, Inc. Ua taofia
aiata tatau uma. Lomia i le lunaita Setete o Amerika.

Faamatatalaga o le Puletaofia: Vagana ua faailoa atu,
e mafai e tagata taitoatasia ona kopina anomea mai le
Liahona mo lo latou faaaogaina patino, ma le saili tupe
(e aofia ai mo valaaua o le Ekalesia). O lenei aia tatau
e mafai ona faaleaoagaina i sooo se taimi. O anomea o
mea faintino e le mafai ona kopina pe afai o loo faailoa
mai se faasa i le laina o loo i ai ma le faatuifugaga.
O fesili mo le Puletaofia e tatau ona faatuatasi mai
i le Intellectual Property Office, 50 E., North Temple
St., FL 13, Salt Lake City, UT 84150, USA; email:
cor-intellectualproperty@ldschurch.org.

For Readers in the United States and Canada:

December 2017 Vol. 41 No. 12. O Le Liahona (USPS 311)
Samoan (ISSN 1045-0947) is published monthly by The
Church of Jesus Christ of Latter-day Saints, 50 East North
Temple, Salt Lake City, UT 84150. USA subscription price
is \$10.00 per year; Canada, \$12.00 plus applicable taxes.
Periodicals Postage Paid at Salt Lake City, Utah. Sixty days'
notice required for change of address. Include address label
from a recent issue; old and new address *must* be included.
Send USA and Canadian subscriptions to Salt Lake
Distribution Center at address below. Subscription help
line: 1-800-537-5971. Credit card orders (Visa, MasterCard,
American Express) may be taken by phone. (Canada Poste
Information: Publication Agreement #40017431)

POSTMASTER: Send all UAA to CFS (see DMM 707.1.5.2).

NONPOSTAL AND MILITARY FACILITIES: Send address
changes to Distribution Services, Church Magazines,
P.O. Box 26368, Salt Lake City, UT 84126-0368, USA.

Valaaulia i Tusiata i le Lalolagi Atua

"Ou te manatua galuega a loa: e moni, ou te matua manatua
ou vavega anamua. Ou te manatunatu foi i au galuega uma,
ou te mafaufau i mea na e faia" (Salomo 77:11-12).



Ua valaaulia oe e fatuina ni galuega fou o faatuifugaga mo le Tauvaga Faavaomalo
o Faatuifugaga, e lagolagoina e le Falemataaga o le Talafaasolopito o le Ekalesia i le
Aai o Sate Leki, luta.

- Autu: "Mafaufau i Talitonuga," unaiga mai le Salomo 77:11-12. O faasala-
lauga faatusiata uma, sitaili, ma auala faaleaganuu e taliaina.
- Aso e auina mai ai: 1 Fepuari i le aso 1 luni, 2018.
- Tausaga: E tatau i tagata auai ona 18 tausaga pe matutua atu.
- Taui: E filifilia e se aufaamasino, o le a faalauiloaina atu taui ia Oketopa 2018.
O ata e auina mai e filifilia o le a faaalia i le Falemataaga o le Talafaasolopito o
le Ekalesia po o le initoneti.

Asiasi i le **lds.org/artcompetition** mo faamatalaga o tulafono,
mea e manaomia mo le taliaina, ma le lesitalaina i le initoneti.

AUTU I LE LOMIGA LENEI

E ta'u mai e numera le itulau muamua o le tusiga.

Agaga Paia, 34, 40, 60, 68

Aiga, 10, 52, 54

Alofa Mama, 7

Aoao atu, 8

Auai i le Lotu, 28

Auauna atu, 7, 10, 41, 42,
43, 52, 54, 75

Faaipoipoga, 34

Faataitaiga, 8, 62

Faatuatua, 4, 20, 28, 44,
50, 80

Faauga, 62, 68

Feagaiga, 7, 34, 44

Galuega faafaifeautalai,
34, 46, 48, 54, 64, 66

Iesu Keriso, 4, 10, 16, 42,

43, 48, 58, 59, 72, 76,
79, 80

Iosefa Samita, 20

Kerisimasi, 4, 10, 16, 40,
41, 42, 43, 48, 52, 54, 58,
59, 64, 72, 74, 76, 79

Le Atua le Tama, 20,
28, 75

Lotomaualalo, 20

Malumalu, 34, 44, 67, 75

**Mataupu Faavae ma
Feagaiga,** 34

Meaalofa, 41, 43, 48, 59

Musika, 10, 43, 46, 52, 74

Perofeta, 20, 34, 67

Salamo, 28, 68, 70, 71

Sefuluai, 34

Suesue i tusitusiga paia,
10, 72

**Tali atu o le tagata lava
ia,** 63, 68

Tatalo, 20, 60

Tulaga faamatua, 8

Tusi a Mamona, 20, 50,
63, 66, 67

Upumoni, 44

Upu o le Poto, 34

Usiusitai, 34



Saunia e Peresitene
Dieter F. Uchtdorf

Fesoasoani Lua i le Au
Peresitene Sili

SAILIA O KERISO I LE KERISIMASI

Mo i latou uma lava e fia malamalama po o ai i matou i le avea ai ma tagata o Le Ekalesia a Iesu Keriso o le Au Paia o Aso e Gata Ai, ou te fia ofoina atu se amataga ua faamatalaina e nei upu e tolu: Matou [te] Sailia Keriso.

Matou te saili ia aoao ia te Ia. Ia mulimuli ia te Ia. Ia avea atili e faapei o Ia.

O aso taitasi i le tausaga atoa, matou te sailia ai o Ia. Ae faapitoa lava i lenei taimi o le tausaga—le Kerisimasi, lea matou te faamanatuina ai le soifua mai o lo matou Faaola pele—o le a sili atu ona gauai atu o matou loto ia te Ia.

I le avea ai o se vaega o la matou sauniuniga mo le faamanatuina o le Kerisimasi, seia tatou mafaufau pe na faapefea e i latou na soifua i le lua meleniuma talu ai ona saunia e faafeiloai le taunu mai o le Faaola.

O Leoleo Mamoe

Tatou te le iloaina le tele o mea e uiga i leoleo mamoe, pau o lea o i latou na “sa i le vao, sa nonofo ai ma leo-leo po i lo latou lafu mamoe.”¹ Sa sili ona pei lava leoleo mamoe o tagata masani, e pei lava o le toatele o tagata lelei o e galulue i o latou aso ia maua se tupe.

E mafai ona latou suitulaga i tagata o e, i se tasi taimi, atonu e le o sailia lava i taimi uma le Keriso, ae na sua o latou loto ina ua matale mai le lagi ma folafolaina mai ia i latou le Keriso.

O i latou nei o e, ina ua uma ona faalogo i le siufofoga o avefeau faalelagi, na malaga loa lava i Peteleema i le fia vaai.²

O Le Au Makoi

O le Au Makoi o ni tagata aoaoina o e na nuesueina le afio mai o le Mesia, le Alo o le Atua. E ala mai i la latou aoaoina, na latou iloaina ai faailoga na faasino i Lona fanau mai. Ina ua latou iloaina na faailoga, na latou tuua o latou aiga ma malaga atu i Ierusalem, ma fesili atu, “Po o fea o i ai le ua fanau mai le Tupu o tagata Iutaia?”³

E lei tumau pea lo latou malamalama ia Keriso i le na o se poto aoaoina. O le taimi lava na latou vaaia ai faailoga o Lona soifua mai, na latou gaoioi loa. Na latou malaga atu e saili le Keriso.⁴

E mafai ona suitulaga le Au Makoi ia i latou o e sailia le Keriso e ala i le aoaoina ma le nuesueina faaleaoaoga. O lo latou tuuto atu i le meamoni ua iu ina taitaiina atu ai i latou e sailia le Keriso ma tapuai atu ia te Ia o le Tupu o tupu, le Faaola o tagata uma.

Simeona ma Ana

E mafai ona suitulaga Simeona ma Ana ia i latou o e sailia Keriso e ala i le Agaga. O nei agaga maoae o ni tagata lolotu faamaoni ma, e ala i le anapogi ma le tatalo ma e ala i le ola ai i ni olaga o le talitonu ma le usiusitai, na faatalitali ma le naunautai ia vaai i le aso o le afio mai o le Alo o le Atua.

E ala i le faamaoni, lotomaualalo, ma le faatuatua, na latou tulimatai atu ma le onosai le afio mai o le Faaola.

Nu iu lava, o lo latou faatuatua na tauia ao tuuina atu e Maria ma Iosefa ia i latou le pepe lea o le a i ai se aso e tauaveina ai i Ona luga agasala a tagata uma.⁵

Tagata talitonu i totonu o sa Nifae ma sa Lamana

O le tala faamomoiloto i le ala na vaavaai atu ai tagata talitonu i le Lalolagi Fou mo faailoga o le soifua mai o le Faaola o loo maua i le Tusi a Mamona.

E te manatuaina i latou na i ai le faatuatua ia Keriso na tauemuina ma sauaina. O tagata atamamai o na aso na tuuaia e na talitonu i le tumau ai i talatuu faavalea. O le mea moni, o tagata le talitonu na malomaloa i la latou tauemuga lea na latou faia ai "se faanunununu tele" i le laueelele (3 Nifae 1:7). Na latou faifai ia i latou o e na talitonu e faapea o le a soifua mai le Faaola.

Na matuai faateleina lo latou ita ma le sauia lea na latou naunau ai e fasiotia i latou uma na talitonu i le Faaola. Ua faamaumauina i le Tusi a Mamona le faaiuga maoae.⁶

O e na talitonu na soifua ai i lena taimi e mafai ona suitulaga ia i latou o e sailia le Keriso e tusa lava pe toe mai i ai isi, ula mai, ma faifai mai. Latou te sailia Keriso e tusa lava pe taumafai isi e aveseseina i latou e



AOAO ATU MAI LENEI SAVALI

Emafai faapefea ona sili atu lo tatou sailia o Keriso, e pei ona fautuaina mai e Peresitene Uchtdorf? E mafai ona e uunaia i latou e te aoaoina e fesili ifo ia i latou lava, "O faapefea ona ou sailia Keriso?" Mafaufau e valaaulia i latou e amata ona faasoa atu pe faapefea ona latou sailia taitoatasai Keriso i le taimi o a latou suesuega faaletusipaia i le aiga i aso taitasi. E mafai foi ona e maimoa i le vitio o le Kerisimasi i le Mormon.org faatasi ma i latou e te aoaoina ma valaaulia i latou e auai i lenei avanoa faaletausaga ia sailia Keriso e ala i le mulimuli i Ana aoaoga.

faapea e vaivai, le popoto, pe faigofie ona faaseseina.

Ae o le mataita o isi e le faavaivaia ai tagata talitonu moni mai le sailia o Keriso.

Matou te Sailia Keriso

I le tausaga atoa, ma atonu e faapi-toa lava i lenei vaitau o le Kerisimasi, o le a faamanuiaina i le toe fai atu o le fesili "O faapefea ona ou sailia Keriso?"

I se taimi faigata tele o lona soi-fuaga, na tusia ai e le Tupu maoae o Tavita, "Le Atua e, o lou Atua lava oe; ou te ala saili ia te oe; ua fia inu lou agaga ia te oe; ua ou matua naunau atu ia te oe"⁷

Atonu o lenei uiga faaalia o le sailia o le Atua o se tasi o mafuaaga na faamatalaina ai Tavita o se tagata e tusa ma le finagalo o le Atua.⁸

I lenei vaitau o le Kerisimasi ma i



le tausaga atoa lava, tau ina ia tatou saili ma o tatou loto ma agaga lo tatou Faaola pele, le Alii o le Filemu, le Toatasi Paia o Israaelu. Mo lenei manao, i le tulaga lautele, ua faamatalaina ai e le gata po o ai i tatou i le avea ai ma tagata o Le Ekalesia a Iesu Keriso o le Au Paia o Aso e Gata Ai ae sili atu lava po o ai moni lava i tatou i le avea ai ma soo o Keriso. ■

FAAMATALAGA

1. Luka 2:8.
2. Tagai i le Luka 2:15.
3. Tagai Mataio 2:1-2.
4. Tagai Mataio 2:11.
5. Tagai i le Luka 2:22-38.
6. Tagai 3 Nifae 1.
7. Salamo 63:1.
8. Tagai Galuega 13:22.

TAMAITI

Vaavaai mo lesu

E toatele tagata na vaavaai ma faatalitali mo lesu e soifua mai. O lenei ua tatou vaavaai ma faatalitali mo la ia toe afio mai! E mafai ona tatou saunia e ala i le aoao e uiga ia lesu ma mulimuli ia te la. E faapefea ona e mulimuli ia lesu? la tusi manatu nei i luga o fetu.



Naunau e Tauave Avega a le Tasi

Ia suesue ma le agaga tatalo lenei savali ma saili mo uunaiga ia iloa ai mea e faasoa atu. E faapefea e le malamalama i le faamoemoega o le Aualofa ona saunia afafine o le Atua mo faamanuiaga o le ola e faavavau?

“Ua siomia i tatou e i latou e manaomia lo tatou gauai atu, la tatou faamalosiau atu, la tatou lagolago, la tatou faamafanafana, lo tatou agalelei,” na saunoa mai ai Peresitene Thomas S. Monson. “O i tatou o lima o le Alii i luga o le fogaeleele, ua i ai le tiutetau-ave e auauna atu ai ma siitia Ana fanau. O loo faalagolago mai o Ia ia i tatou taitoatasi.”¹

Na saunoa mai Peresitene Henry B. Eyring, le Fesoasoani Muamua i le Au Peresitene Sili: “Sa amata se suiga tele i lou loto ina ua e oo mai i totonus o le Ekalesia. Sa e osia se feagai- ga, ma e mauaina se folafolaga lea na amata suia ai lou lava natura. . . .

“. . . Na e folafola atu o le a e fesoasoani i le Alii ia faamāmā- ina a latou avega ma ia faamafanafanaina. Ua uma ona tuuina atu ia te oe le mana e fesoasoani ai e faamāmāina na avega pe a e mauaina le meaalofa o le Agaga Paia.”²

“Tatou te mananao ia faaaoga le malamalama o le talalelei e



Faatuatua

Aiga

Toomaga



Mafaufau i le Mea Lenei

E faapefea e le fesoasoani e tauave avega a isi ma tausia a tatou feagai- ga ona tatala- ina le ala mo Iesu Keriso e faamalolo ai i latou e manaomia le fesoasoani?

vaai atu ai i isi e pei ona silasila i ai le Faaola—i le agaalofa, faamoemoe, ma le alofa mama,” le saunoa mai a Jean B. Bingham, le Peresitene Aoao o le Aualofa. “O le a oo mai le aso o le a tatou maua ai se malamalama atoatoa o loto o isi ma o le a faafetai o le a ofo mai ia i tatou le alofa muti-mutivale—e pei lava ona tatou ofo atua mafaufauga ma upu o le alofa moni i isi. . . .

“O la tatou matafaioi ma le avanoa o le taliaina lea o mea ua faaleleia i *tagata uma* a o tatou tauivi ia avea e pei o lo tatou Faaola.”³

Ao tatou tauaveina avega a le tasi ma tausia a tatou feagaiga, o le a sili atu lo tatounofouta i le mana faamalolo a Iesu Keriso. Na aoao mai Elder Jeffrey R. Holland o le Korama a Apostolo e Toasefululu: “Mafaufau i le le mafuatiaina o le tau o le

Faasatauroga ma le Togiola, ou te folafola atu ia te outou o le a Ia le fuli mai Lona tua ia i tatou i le taimi nei. Ina ua Ia fetalai atu i e matitiva i la le agaga, “O mai ia te au,” o lona uiga ua Ia silafia le auala i fafo ma ua Ia silafia le auala i luga. Ua Ia silafiaina aua sa savali ai o Ia i le ala. Ua Ia silafia aua o Ia o le ala.”⁴

Mau Faaopoopo

Mataio 25:40; Kalatia 6:2; Mosaea 2:17; 18:8–9
reliefsociety.lds.org

FAAMATALAGA

- Thomas S. Monson, “Auauna Atu i le Alii ma le Alofa,” *Liahona*, Feb. 2014, 4.
- Henry B. Eyring, “O Le Faamafanafana,” *Liahona*, Me 2015, 20.
- Jean B. Bingham, “O Le A Ou Aumaia le Malamalama o le Talalelei i totonus o Lou Aiga,” *Liahona*, Nov. 2016, 7
- Jeffrey R. Holland “O Mea Malepe-lepe e Fonofonoina,” *Liahona*, Me 2006, 71.

Matou Talanoaga

Siiitiaina o a

E mafai faapefea ona tatou fesoasoani ia tatou fanau ia sili atu ona toaaga i le aoaoina o le talalelei?

Saunia e Doug Hart

Se taimi ua tuanai, na ma popole ai ma lou toalua e uiga i le manamu o amioga ua atiina ae i nisi o la ma fanau talavou i le taimi o suesuega faaleaiga, afiafi faaleaiga, e oo lava i a matou talanoaga faafusei, taitoatasi e faatatau i le talalelei. Sa itiiti so latou tulaga aoaoina—o se auai faaletino, se vaai sao i mata mai lea taimi, ma tali e taitasi upu—ae sa latou le auai i le aoaoina moni lava.

Na ma iloaina ina ia mafai ona latou mauaina ni molimau malolosi ma ia aafia i le liua loloto, ma patino e ala i le mana o le Agaga Paia, na manaomia lo latou faia ia sili atu. E finagao le Faaola i Ona soo ina ia le na ona faalogi i Ana upu—E finagalo

o Ia ia latou faatinoina Ana aoaoga ma le faatuatua (tagai *Aoao Atu I le Ala a le Faaola* [2016], 30).

I se tasi po na ma talanoa atu ia i latou e uiga i o ma lagona. O lo ma faamoemoega o le fefautuaai ma i latou i se talanoaga e taialaina e le Agaga. O la matou talanoaga, e ui i lea, na vave lava ona le manuia ma iu i se lauga e tasi le itu. Na faalogi le ma fanau tama i la ma savali, ae o latou mafaufau ma loto na tumau le maaa.

O lena aafiaga na faapopoleina ai i maua, o lea na ma manatunatu loloto ai ma lou toalua pe faapefea ona ma fesoasoani i le ma fanau ia sili atu le faamaoni ia latou aoaoga o le talalelei, ma uunaia i latou ia gaoioi nai lo le faagaoioia e ala atu i a ma tautalaga ma lauga. O a ma fesili na taitaia i maua e atiina ae se fuafuaga e faaautu i mea na ma aoaoina mai le suesueina o tusitusiga paia, o upu a perofeta

soifua, ma isi punaoa a le Ekalesia e faatatau i le aoao atu ma le aoao mai. O la tatou fuafuaga e faitauina faapea:

Taitaia a Tatou Fanau e Saili le Agaga Paia i Talanoaga Faaleaiga

Ia faatupuina le alofa ma le faaaloalo. O le alofa e faamaluluina loto. O upu alofa o le a fesoasoani e sau-nia a tatou fanau mo le uunaiga a le Agaga Paia. O le a faafaileleina foi lo latou manao ma le naunau ia auai i le aoaoina faamaoni, ma faaleagaga. O le faaaloalo ia tatou fanau e ala i le faa-
logo i ai ma faatauaina o latou manatu ma lagona o le a fesoasoani ia i latou e lagonaina ua sili atu le saogalemu ma naunau atili ai e faasoa mai mea o loo latou lagonaina.

Aoao atu e ala i le Agaga. O le vaavaaia ma le faaeteete ma faalogi ia tatou fanau o le a saunia i tatou e filifili e ala i le Agaga mea e fai atu, po o a fesili e fai, po o le a le valaaulia e tuuina atu lena mea o le a taitaia i

Faaleaiga

latou e saili le faatosinaga a le Agaga i la latou aoaoina.

Ia taula talanoaga uma i le afioga a le Atua. Ao mafai ona fesoasoani le faasoa atu faatasi o o tatou lava manatu ma lagona e uiga i le talalelei, o mau ma upu a perofeta o aso e gata ai o le a masani ona saunia se sootaga i le Agaga e sili atu le loloto, ma sili atu le mamana (tagai MF&F 84:45).

Ia avea le Faaola o le autu o talanoaga e faatotonugalemu i le talalelei. O le a oo mai se uiga moni ma le mana ia tatou talanoaga ao vaai a tatou fanau pe o faapefea ona fesootai a tatou talanoaga i le Faaola ma Lana Togiola, “o le faavae autu o le aoaoga faaKerisiano” (Boyd K. Packer, “O le Puluvaga,” *Ensign*, Oke. 1977, 56).

Fai fesili musuia. O fesili aoga o le a taitai atu ai a tatou fanau e maua sao le upumoni ma le malamalama mai tusitusiga paia ma upu a perofeta faatasi ma le fesoasoani a le Agaga.

O mea latou te aoaoina i lena ala o le a sili atu le taua ia i latou nai lo a tatou faamatalaga e sili le manino o na lava aoaoga.

Uunaia tagata o le aiga e faia le talanoaga. Pe a faaaoga e a tatou fanau a latou lava upu e faamatala ai mea o loo latou vaaia, mafaufauga, po o lagona, latou te valaaulia le Agaga Paia e fesoasoani ia i latou ia iloa mea e fai atu ma le ala e fai atu ai. O lena faagasologa o le a fesoasoani ia i latou e iloa ai ma malamalama manino atili ai i mea e finagalo le Alii ia i latou e aoao ma lagonaina.

Ia onosai! O le a galue le Agaga Paia ia tatou fanau ao latou suesueina o latou mafaufau ma loto mo le upumoni ma le malamalama. Tatou te manaomia le tetee atu i le faaososoga e faamuta la latou suesuega faapuupuu e ala i le osofaia vave atu i manatu patino ma fofo faaletagata lava ia.

Aoao atu i Faataitaiga. O le tauivi e aoao ma ola i le talalelei i le ala lava e tasi tatou te tau atu ia tatou fanau o le a fesoasoani ia i tatou e agavaa ai mo le lagolago ma le taiala a le Agaga ia tatou talanoaga.

Ao tatou taumafai e faaaoga la tatou fuafuaga, ua tatou aoaoina e faapea o le valaaulia o le faatosinaga a le Agaga Paia ia tatou talanoaga faaleaiga o le a manaomia ai le faataitaiga ma le taimi. Ae tatou te mumusu e lotovaivai ma fiu gofie. I se tasi po, na fesili mai ai ma le faamaoni lava le ma tama teine e 10-tausaga le matua, na uunaia e se fuaiupu mai le Tusi a Mamona na matou faitauina o se aiga, “E faapefea ona e aoao e ala i le Agaga Paia?” Sa ou ataata. Na ou iloaina ua matou faia sina alualu i luma! ■

O le tusitala o loo auauana atu nei o le peresitene o le Misiona a Pasila Curitiba.

O le tusitala fou o le aoaoina, Aoao Atu i le Ala a le Faaola, e ofia ai fautuaga mo talavou ma tamaiti e laiti atu mo le aoaoina. Tagai i le teaching.lds.org.





Saunia e Elder
Ronald A. Rasband

O Le Korama
a Apostolo e
Toasefululua

Viiga i le Atua i Mea Aupitoaluga

*Soo se taimi lava tatou te galulue ai faatasi ma le Alii—
i le faia o Lona finagalo, ma siitia i latou o loo siomia
i tatou—ua tatou tuuina atu le molimau e faapea
o loo soifua o Ia ma e alofa o Ia ia i tatou.*

Ao lei oo i le fitu tausaga soifua mai Iesu Keriso i Peteleema i Iutaia, na folafola mai e le perofeta o Isaia, “Faauta, e to le taupou, ma fanau mai se tama tane, na te faaigoa ia te ia o Emanuelu” (Isaia 7:14).

Na valoia e le Tupu o Peniamina, i le 125 tausaga ae lei fanau mai le Faaola, “E ta’ua foi o Ia o Iesu Keriso, o le Alo o le Atua, o le Tama foi o le lagi ma le lalolagi, o le foafoa o mea uma mai le amataga; ma o lona tina o le a taua o Maria” (Mosaea 3:8).

O le aso ae lei soifua mai le pepe o Iesu, na faalogo Nifae, le atalii o Nifae i se leo o faapea mai “O taeao ou te alu atu ai i le lalolagi” (3 Nifae 1:13).

O le aso na sosoo ai, i le va o vasa e tele, na soifua mai ai le pepe o Keriso. E leai se fesili i le vaavaai atu o Lona tina, o Maria, ma le ofo i lana tama tama na faatoa fanau mai, le Alo e Toatasi o le Tama i la le tino.

I mauga o Iutaia o loo siomia Peteleema, ua tau mai e Luka ia i tatou, na nonofo ai leoleo mamoe i a latou fanua (tagai Luka 2:8). O nei leoleo mamoe o ni “tagata amiotonu ma paia” (tagai Alema 13:26) o e o le a molimau atu i le pepe o Keriso.

“Faauta foi, ua tu mai ia i latou le agelu a le Alii, ua pupula faataaliolio mai foi ia te i latou le pupula o le Alii: ua matua fefefe ai lava i latou.

“Ona fai mai lea o le agelu ia te i latou, Aua tou te matatau: aua faauta, ou te au mai ia te outou le tala lelei, e olioli tele i le nuu uma.

“Aua o le aso nei ua fanau ai i le aai o Tavita, lo outou Faaola, o le Alii ia o Keriso. . . .



"Ona faafusei lea ona faatasi mai ma le agelu o au mai le lagi e toatele ua vivii i le Atua ua faapea ane,

"O le viiga i le Atua i mea aupitoaluga, ma le manuia i le lalolagi, o le finagalo alofa i tagata" (Luka 2:9–11, 13–14).

Vaai faalemafaufau i lena vaaiiga i Iutaia—o le lagi ua faatumuina i le susulu o se fetu matagofie ma aufaipese mai le lagi e faailoga ai lenei mea faapitoa ua tupu. Na "faataalise" atu leoleo mamoe (Luka 2:16) e vaai i le pepe o loo taoto i se faatanoa vao. Mulimuli ane "ona latou faailoa ai lea o le upu" (Luka 2:17) o mea na latou faalogoina ma vaaiia.

O tausaga taitasi i le Kerisimasi tatou te faaopoopo ai la tatou molimau i molimau a leoleo mamoe—faapea o Iesu Keriso, le Alo moni o le Atua soifua, na afio mai i se tulimanu o le lalolagi i se nofoaga ua tatou taua o le Nuu Paia.

Na o atu leoleo mamoe ma le migao i le fale o manu e tapuai atu i le Tupu o tupu. O le a faapefea ona tatou tapuai atu ia te Ia i lenei vaitau? Faatauga e le iu? Pisi solo i o tatou fale i le teuina ma le afifiina o meaalofa? Pe o le a avea lena ma a tatou faamamaluga i lo tatou Faaola? Pe o le a tatou aumaia foi le filemu i e loto mafatia, finagalo alofa ia i latou e manaomia se faamoemoega e sili atu, vivii i le Atua i lo tatou naunau e faia Lona finagalo?

Na faafaigofie lava e Iesu, "Sau, ma mulimuli mai ia te au" (Luka 18:22).

O le talalelei a Iesu Keriso, na toefuataiina e ala mai i le Perofeta o Iosefa Samita, na tali mai faatasi ma e talitonu i le salafa o le lalolagi. Ua ou molimauina e au lava ia le nau-nau o i latou mai atumotu o le moana i le atulaulau o Rusia o e ua taliaina atoatoa le afioga paia a le Faaola.

O Le Savali o le Kerisimasi

I totonu o uluai Au Paia na faapotopoto i Siona sa i ai Hannah Last Cornaby, o le na nofoia Spanish Fork, Iuta, ISA. I uluai aso faigata o le Ekalesia toefuataiina, na faailogaina le Kerisimasi i se moli faapelepele lava po o se meataalo na vaneina pe atonu foi o se pepe meataalo—ae le faapena i taimi uma. Na tusia e Hannah ia Tesema 25, 1856:

"Na oo mai le Po o le Kerisimasi, ma o au pele, faatasi ma le faatuatua faatamaitiiti, na tautauina i luga a latou totini, ma taumanatunatu pe o le a [faatumuina] ea i [latou]. Faatasi ai ma se loto tiga, lea na ou nanaina mai ia i latou, na ou faamautinoa atu ia i latou o le a le faagaloina i latou; ma na latou momoe faatasi ma ni manatu olioli mo le aso a taeao.

"I le leai o sina vaega itiiti o se suka, na ou le iloaina le mea e fai. E ui i lea, e le tatau lava, ona latou faanoanoa. Ona ou mafaufau lea i ni tamai maukeni i totonu o le fale, lea na ou sakaina, ona faamama ese lea o le sua, o lena vaega, pe a sakasaka mo ni nai itula, e maua ai se sosi suamalie. O lenei sosi, ma sina mea feu laitiiti, na ou faia ai se paluga o le falaoa e fai i le fiu lea, pe a tipiina i ni ituiga o mamanu eseese, ma taoina i se ulo uamea, (sa leai sau ogaumu,) ma faatumuina ai a latou totini ma faafiafiaina ai i latou e pei lava ona faia e ni lole suamalie e sili ona felanulanuai."¹

I le faitau ai i le va o laina o lenei tala o loo i ai se tala a se tina na galue i le po atoa e aunoa ma se ogaumu e faafaigofie ana taumafaiga. Ae peitai na ia naunau e aumaia le olioli i lana fanau, ia faamalosia lo latou faatuatua, ia faamautu i lo latou aiga, "Manuia le aso! Ua Lelei mea uma!"²

Pe le o le savali ea lena o le Kerisimasi?

Na aoao mai Peresitene Thomas S. Monson: "O o tatou avanoa e tuuina atu ai i tatou lava, e matua leai lava se gataaga, ae e le tumau foi. O loo i ai loto e tatau ona faafiafiaina. O loo i ai upu agalelei e tatau ona ta'u atu. O loo i ai meaalofa e tatau ona tuuina atu."³

Soo se taimi lava tatou te galulue ai faatasi ma le Alii—i le faia o Lona finagalo, ma siitiaina i latou o loo siomia i tatou—ua tatou molimau atu faapea o loo soifua o Ia ma e alofa o Ia ia i tatou, e tusa lava po o a o tatou luitau faaletino.

Ina ua auai se tagata liliu mai Sikotilani o John Menzies Macfarlane i le Ekalesia faatasi ma lona tina ua maliu lana tane ma se uso, na malaga atu le toatolu o i latou i le Aai o Sate Leki, Iuta, i le 1852. Sa 18 ona tausaga. I ni tausaga mulimuli ane, na avea ai o ia ma se fua fanua, se fau fale, e oo lava i se faamasino o le itumalo, ae o lana musika na faapitoa ai o ia.

Na ia faatulagaina lana aufaipese muamua i le Aai o Cedar, Iuta, ma aveina atu lana faaili faataamilo i Iuta i sisifo. Ina ua maea le faafiafia i St. George, na uunaia o ia e Elder Erastus Snow (1818–88), o se Apostolo ma le taitai o le kolone, e see mai i St. George ma aumai lona aiga ma le musika faatasi ma ia.

Na faigata na taimi i le 1869, ma na talosaga atu Elder Snow ia Brother Macfarlane ia faia se polokalama o le Kerisimasi e siitia ai agaga o tagata. Na manao Brother Macfarlane i se mea musika fou mo le polokalama. Ae peitai po o le a lava lona taumafai malosi ia fatuina, e lei faamanuiaina. Na ia tatalo mo le uunaiga ma toe tatalo.



Ona oo lea i se tasi po na ia fafaguina lona toalua ma faamatala atu, "Ua ou mauaina upu mo le pese, ma ou te manatu ua ou mauaina foi le musika!" Na ia faataalise atu i le piano feaveai i lo latou potu i luma ma tata le fati, ma tusia i lalo ao uuina e lona toalua i ona luma le moli taupulapula o se fasi solo o loo mumu ao opeopea i se apa gao. Na solo mai upu ma le musika:

*Sa Iutaia o leoleo lelei,
Na faalogo i pese nei:
Ia faamanu,
Ia faamanu,
Ia faamanu i le Alii;
Ia manuia o lalo nei, manuia lalo nei;
Manuia lalo nei!*⁴

E lei oo lava Brother Macfarlane i Iutaia e vaai i laufanua na na sili atu ona pei o ni atumauga papa, ae o le savali musuia o lana musika na sasaa mai ai lona agaga o se molimau i le soifua mai o le Faaola i Peteleema,

o se amataga lena o le a sua ai le lalolagi e faavavau.⁵

Na molimau mai John Menzies Macfarlane ia Iesu Keriso e ala mai lana musika, ma na molimau mai Hannah Last Cornaby ia Keriso e ala mai lana auaunaga i lana fanau. Tatou te mafai ona auauna atu faapena i le Alii ma molimau atu ia te Ia e ala i gaoioiga faigofie o le le manatu faapito. E mafai foi ona tatou faia se eseesege i totonus o o tatou aiga, o tatou uarota, a tatou falefaigaluega, ma isi a tatou eria o tiutetauave.

Faia se Eseesega

O se tasi ala faigofie e mafai ona tatou faia ai se eseesege o le aafia lea i faalauiloaga faaletausaga a le Ekalesia i agafesootai o le Kerisimasi. O le faalauiloaga ua fuafuaina e fesoasoani i le Au Paia—ma fanau a le Atua i le lalolagi atoa—e taulai atu i le Faaola. O loo faalauiloaina i lenei tausaga e le Ekalesia se isi taumafaiga i le lalolagi e faamanatu ai le



Na faia e lou tuafafine se ie soosoo matagofie ma faaigoaina "Suafa e sili atu i Suafa Uma Lava." Ua faaalia e le ie soosoo suafa e 26 o iesu Keriso.

soifua mai o Keriso ma uunaia tagata e mulimuli ia te Ia e ala i le auauna atu i isi i le taimi o le vaitau o le Kerisimasi.

O loo toe faia e le Eklesia lana autu faamanuiaina o le tausaga talu ai: "Light the World" (tagai Mormon.org). E maua mai le autu i le Ioane 8:12, lea e fatauina e faapea, "Ona toe fetalai atu lea o Iesu ia te i latou, ua faapea atu, O a'u nei o le malamalama o le lalolagi; o le mulimuli mai ia te au, e le savali o ia i le pouliuli, ae ia te ia le malamalama o le ola."

O le faalauiloaga e aofia ai se kalena faapitoa ma fuaiupu o mau fesoottai na e saunia manatu mo tagata ia auauna atu ai ma faasoa atu ai le malamalama o le Kerisimasi.

"Sa tatou o mai uma i le lalolagi ua tuuina i ai le Malamalama o Keriso," na saunoa ai Peresitene Monson. "A tatou mulimuli i le faataitaiga a le Faaola ma ola e pei ona sa Ia soifua ai ma e pei ona sa Ia aoao mai, o le a mumu mai lena malamalama i totonu o i tatou ma o le a faamalamalama ai le ala mo isi."⁶

Tatou te oo ina iloa le Faaola e ala i le faia o mea na Ia faia. Ao tatou auauna atu i isi, tatou te aumaia i latou—ma i tatou lava—ia latalata atili atu ia te Ia.

"Suafa e sili atu i Suafa Uma lava"

I le taimi o le Kerisimasi, ou te faapitoa lava le misia o le tama a le ma tamaitiiti o Paxton. Na fanau mai ma se faaletonu tuufaasolo e le taatele, na puapuagatia Paxton mai i faafitauli e le mafaitaulia o le soifua maloloina. Na aoaoina lo matou aiga e le Tama Faalelagi i le tele o lesona faapitoa ma agaalofa i le taimi o le tolu tausaga puupuu na faamanuiaina ai o matou olaga e Paxton.

Na faia e lou tuafafine, o Nancy Schindler, se ie soosoo matagofie e faamanatu ai Paxton. Na ia faaigoaina "Suafa e sili atu i Suafa Uma lava." Na faaalia i le ie suafa e 26 o Iesu Keriso—suafa e amata i mataitusi A e oo atu i le Z. E faamanatu mai e le ie ia te au le faatasiga faaleaiga mamalu i le lumanai faatasi ma Paxton ua mafaia e ala mai le puaugatia o le Faaola, taulaga ma le Toetu.

Na uunaia e le ie soosoo au ia amata se cuesuega o suafa o Iesu Keriso e pei ona faaalia i tusitusiga paia. O le cuesueina o Ona suafa ua avea o se vaega o lau cuesuega faaletusipaia patino. O le taimi nei, ua ou faailoaina le fatau selau o igoa mo le Faaola.

O se tasi o au tiutetauave o se sui o le Korama a Apostolo e Toasefululua, ma e pei ona taua i le Mataupu Faavae ma Feagaiga, o le tuuina atu lea o le molimau ia Iesu Keriso. I le Mataupu Faavae ma Feagaiga tatou te fatau ai,

"O fautua femalagaai e toasefululua ua valaaulia e avea ma Apostolo e Toasefululua, po o *molimau faapitoa o le suafa o Keriso* i le lalolagi atoa" (MF&F 107:23; faaopoopo le faamamafa).

Talu ai nei na talosagaina ai au e lauga atu i se sauniga faamanatuga i le Falemai o Tamaiti Peraimeri i le Aai o Sate Leki. Na ou lagonaina le uunaia e lauga e uiga ia Iesu Keriso ma Ona suafa faamoemoeina. Na ou molimau atu i le Faaola o "le fetuao pupula" (Faaaliga 22:16), o se "faitaulaga sili i mea lelei atali" (Eperu 9:11), "o se Atua o vavega" e toetu "ma le faamalologa i ona apau" (2 Nifae 27:23; 25:13), "O le Alii o le Filemu" (Isaia 9:6; 2 Nifae 19:6), ma "le toetu ma le ola" (Ioane 11:25).

I le taimi o le Kerisimasi, ou te fafia e tauloto suafa eseese o le Faaola ao ou savali atu ma toe foi mai lou ofisa e ala mai moli o le Kerisimasi i le Lotoa o le Malumalu. Ou te amata i le A, "Alefa ma le Omeka" (Faaaliga 1:8); E, "le pepe" o Peteleema (Luka 2:12, 16); I, "Faipule" (Isaia 9:6; tagai 2 Nifae 19:6); O, "le Faaola" (Roma 11:26); U, ua "faaeaina le ua filifilia" (Salamo 89:19); F, "o le faavae o le filemu" (Mosaea 15:18); ma isi foi.

I le taimi atoa o lenei vaitau o le Kerisimasi, ou te tulimatai atu i le taulotoina o isi Ona suafa ma vaavaai mo avanoa e faamamaluina ai Lona suafa. Ao e tauivi e faia se eseesege i lenei vaitau o le Kerisimasi, ou te faamoemoe o le a e faia le Faaola ma totongalemu o au taumafaiga ma o le a e aumaia le mamalu ia te Ia ao e auauna atu i isi i Lona suafa.

Ou te tuuina atu lau molimau o loo soifua lo tatou Tama e Faavavau. O Lona fuafuaga o le fafia ua faamanuiaina tele ai olaga o Ana fanau taitoatasi i tupulaga uma. Ou te iloaina o Lona Alo Pele, o Iesu Keriso, le pepe na fanau i Peteleema, o le Faaola ma le Laveai o le lalolagi.

O nei upu o viiviiga o loo tautatala i le upumoni i ou taliga: "Ia faamanu i le Alii; ia manuia o lalo nei, manuia lalo nei."⁷ ■

Mai i se lauga na tuuina atu i le BYU Management Society—Salt Lake Chapter i le Aai o Sate Leki, Iuta, ISA, ia Tesema 13, 2016.

FAAMATALAGA

1. Hannah Cornaby, *Autobiography and Poems* (1881), 45–46.
2. "O Mai, Outou o le Au Paia," *Viiga*, nu. 17.
3. Thomas S. Monson, "Talosia ia Faapea ona Tatou Ola ai," *Liahona*, Aok. 2008, 3.
4. "Sa Iutaia o Leoleo Lelei," *Viiga*, no. 121.
5. Tagai Karen Lynn Davidson, *Our Latter-day Hymns: The Stories and the Messages* (1988), 223–24.
6. Peresitene Thomas S. Monson, "Avea ma se Faataitaiga ma se Malamalama," *Liahona*, Nov. 2015, 88.
7. *Viiga*, nu. 121.

14 Mea na Tutupu ILE Soifua Mai o Iesu

Saunia e Jessica Griffith

Ua faamanatuina le soifua mai o Iesu Keriso i tausaga taitasi—tatou te usuina viiga, tatou te olioli i tu masani faaleaiga, ma tatou te manatua lo tatou Alii e ala i le faamaluina o Lona Soifua Mai.


Ae o a faamatalaga e uiga i le Soifua Mai ua tatou maua i tusitusiga paia?

NOFOAGA

O LE MEA NA TUPU

Ua Valoia le
Soifua Mai
o Keriso

Kenese 49:10;
Isaia 7:14; 9:1-7;
Mika 5:2; Mosaea
3:8; Alema 7:10;
Helamana 14:2-5



Ua Asiasi atu le Agelu
o Kaperielu i Matua
o Ioane le Papatiso

Mataio 17:12-13;
Luka 1:5-25 (e
faapitoa lava le fuai-
upu 17); Mataupu
Faavae ma Feagaiga
27:7; Taiala i Tusi-
tusiga Paia, "Elia"



IERUSALEMA ANAMUA
MA AMERIKA ANAMUA

IUTAIA

Ini tausaga ae lei soifua mai le Faaola, na maua ai e perofeta faaaliga e uiga ia lesu Keriso. O perofeta o le Feagaiga Tuai na saunoa e uiga i se tupu e tupuga mai le Tupu o Tavita lea o le a soifua mai i Peteleema—o se Mesia. E tusa ai ma le faaliliuga faalutaia, o lenei Mesia o le a avea o se tupu lea o le a laveaiina Lona nuu, o tagata lutaia, mai le nofopologa faalemalo ma pulea le lalolagi i le amiontonu. E ui i lea, o le mea e lei faamoemoeina e sa lutaia anamua, o se tupu lea o le a laveaiina Lona nuu mai le nofopologa faaleagaga. Nai lo o se faaolataga faaletino ma se malo faalelalolagi, na ofoina atu e lesu Keriso se faaolataga e faavavau ma le malo o Lona Tama.

O Ioane le Papatiso sa o se Elia, po o se tagata e muamua atu, ia Keriso. Na tau atu e le agelu o Kaperielu ia Sakaria, le tama o Ioane, e faapea o lona toalua, o Elisapeta, o le a mauaina se tama ma o lena tamaitiiti e tatau ona faaigoa ia Ioane. Na tali atu Sakaria ma le masalosalo, lea na mafua ai le taia o ia i le tutuli ma le gugu.



O LE UIGA MONI O LE KERISIMASI


"Tatou te olioli i lenei vaitau aua sa afio mai o la i le lalolagi. O le filemu e maua mai ia te la, o Lona alofa e le uma atonu ua tofugalagona e i tatou uma, ma se lagona lofituina o le agaga faafetai i le mea na la foafuaina mai ia te i tatou i se tau maoae o la lava—o vaega taua moni ia o le Kerisimasi."

Peresitene Gordon B. Hinckley (1910–2008), "O le Tala Moni ma le Ofoofogia o le Kerisimasi," *Liahona*, Tes. 200, 3.



O Le Agelu o Kaperielu ua Faaali atu ia Maria

Mataio 1:18;
Luka 1:26-38



NASARETA MA
KALILAIA

Ua Asiasi atu Maria ia Elisapeta

Luka 1:39-56



IUTAIA

Ua Fanau Mai loane le Papatiso

Luka 1:57-80



IUTAIA

Ua Faaali le Agelu o Kaperielu ia Iosefa

Mataio 1:18-23



NASARETA

UA VALOA E LE PEROFETA O ISIALE SOFIA MAI O KERCO, SAUNIA E HARRY ANDERSON, ATA NA TUSA E LE AGELU O KAPERIELU MICHAEL MAIN, AMIAU OE FAFINE UNA, SAUNIA E VALTER RANE, FAAMATALAGA MAI THE VISITATION, SAUNIA E REMBRANDT HARMENSZ (1609-69)/DETROIT INSTITUTE OF ART, USA / BRIDGEMAN IMAGES, UA TAU E LE AGELU O KAPERIELU SAKARIA IA GUGU, ATA ITUA, ATU, FAAVAA, ITUA, SAUNIA E JOSEPH BRICKLEY, TUSA LE IGODA O LE TAMA ITUTI, FAALUOGA LO E LECIT, FAALUOGA LO E LECIT.

Ole isi asiasiga a Kaperielu o le ono masina mulimuli ane i le tausoga o Elisapeta o Maria. Na ia tau atu ia Maria faapea e ui lava o ia sa taupou, o le a ia mauaina se tamaitiiti e ala i le mana o le Agaga Paia ma o lena tamaitiiti o lesu Keriso. Na taliaina ma le lotomaualal e Maria lona valaauga o le avea ma tina o le Alo o le Atua. Na tau atu foi e le agelu ia te ia e faapea o lona tausoga o Elisapeta ua maitaga.



Ina ua mavae le asiasiga faaagelu ia Maria, na ia tuua loa Nasareta e asiasi atu i lona tausoga o Elisapeta i lutaia mo le tolu masina. Ao i ai Maria iina, na maua e Elisapeta se molimau e ala i le Agaga Paia e faapea o le pepe a Maria o le Alo o le Atua. Na tuuina atu foi e Maria lana lava molimau i le Atua.



Ina ua soifua mai loane le Papatiso, na uluai faaigoaina o ia o Sakaria, le igoa o lona tama. Na teena e Elisapeta lena igoa, ma tau atu i ana uo ma tuaoi o lona igoa o loane. Ina ua fesiligia e nei uo ma tuaoi Sakaria e uiga i le igoa, na ia ioeina faatasi ma Elisapeta. Ona sa mulimuli o ia i faatonuga a Kaperielu mo le faaigoaina o lona atalii, na matale le laulaufaiva o Sakaria, ma na ia faaaoga lana faalogo ma le tautala ua toe maua mai e viia ai le Atua.

Ina ua vaia e Iosefa, le tagata na faufautane i ai Maria, le tulaga maitaga o Maria ina ua foi mai i Nasareta, na manatu e “faatea lemu ia te ia,” po o le faaleaogaina filemu o le la faamau. E ui i lea, na te lei faia lea mea, na faaali atu le agelu o Kaperielu ia te ia i se miti, ma molimau atu e faapea o le pepe a Maria o lana to mai le Agaga Paia ma o le pepe o se tasi lea o le a faaolaina Lona nuu mai a latou agasala. Nai lo le aluese mai ia Maria, na filifili Iosefa e faaipoipo ia te ia.

Ia Totogi Lafoga Uma le Lalolagi

Luka 2:1-4;
James E. Talmage,
Jesus the Christ
(1916), 91-92



O LE MALO
O ROMA

O le totogi lafoga na faia o se lafoga ma se tusigaigoa foi, lea na faamalosia e tagata Roma. E masani lava, na tusia e tagata Roma tagata e tusa ai ma le mea o loo nonofa ai, ae o le tu faalutaia e tusia tagata e tusa ai ma o latou tupuaga o aiga. Ona o lenei mea, o Peteleema, o le tupuaga o le aiga o losefa, na faatumulia, ma na tutumu faetalimalo.



Ua Soifua Mai Iesu Keriso

Luka 2:6-7



NASARETA, PETELEEMA,
MA IUTAIA



O Peteleema o lona uiga o le "fale o falaoa" ma o le nofoaga na valoia e soifua mai ai le Mesia.

Na malaga losefa ma Maria i Peteleema ina ia totogi ia lafoga. Ina ua soifua mai lesu, na fatuina e Maria se moega le tumau e ala i le faataotoina o lesu i totonu o se faatanoa vao, po o se tanoa e fafaga ai manu. E le o taua mai ni manu na i ai.

Ua Oo mai Faailoga na Valoia i le Atu Amerika

Helamana 14:1-5;
3 Nifae 1:15-21



O LE ATU AMERIKA



Ua Faalogo Leoleo Mamoe i le Soifua Mai o Keriso

Luka 2:8-17



E LATA ANE I PETELEEMA



E pei ona valoia, i le aso e soifua mai ai Keriso, na i ai se aso ma se po ma se aso o le malamalamā atoatoa i le konetineta o Amerika. Na faaali mai se fetu fou i le lagi.

I lenei taimi o le tausaga, na tausia e leoleo mamoe a latou lafu i fafo i le ao ma le po. O le nofoaga lenei na i ai i latou ina ua faaali ane se agelu ia i latou, ma tau atu ia i latou le soifua mai o le Faaola. Na mulimuli mai i le faaaliga a le agelu, se au agelu na faaali mai, ma vivii atu i le Atua. Ina ua mavae le faalogo i lenei mea, na faanatinati atu loa leoleo mamoe i Peteleema e vaai ia lesu. O le taimi lava na latou vaaia ai o la, na latou tuua ai losefa ma Maria ae molimau atu i isi i mea na latou vaaia.

Ua Peritomeina lesu, Faaigoaina, ma Tuuina Atu i le Malumalu

Luka 2:21-38;
James E. Talmage,
Jesus the Christ, 95



PETELEEMA

Ua Fesiligia e Makoi Herota e uiga ia Keriso

Mataio 2:1-10



IERUSALEMA

Ua Maua e Makoi Keriso ma Tuuina atu Meaalofa

Mataio 2:9-12;
Bible Dictionary,
“Magi”



PETELEEMA

Ua Lapataiina Iosefa ia Sosola i Aikupito

Mataio 2:13-16,
19-23



PETELEEMA, AIKUPITO,
MA NASARETA

Ina ua mavae aso e valu, na peritomeina Keriso ma faaigoaina, e pei o le tu a tagata lutaia. Na faaigoina o la o lesu, po o “Yeshua,” o lona uiga “Faaola” i le faaEperu. O le tu faalutaia e poloaiina ai se fafine e tatau ona faatali i aso e 40 pe a mavae ona fanauina se tamaitiiti, e ulu atu i le malumalu. Ina ua mavae aso e 40, na aumaia e Maria ma losefa lesu ina ia tuuina atu i le malumalu. O iina na latou feiloi ai ma Simeona, lea na folafola atu i ai o le a ia vaai i le Keriso ae lei maliu. Na ia iloaina Keriso, si’i o la i ona lima, ma viviv atu i le Atua. Na ia valoia foi le misiona a Keriso i le lalolagi. O Ana, o se perofeta fafine, na molimau foi ia Keriso i le malumalu. Na ia molimau atu foi i Lana misiona.

O se aofai e le o taua o Makoi “mai sasae” na o mai i Ierusalem e saili ia Keriso. Na latou vaaia se fetu fou i le lagi, lea na tau maia ua soifua mai Keriso. Na latou fesili atu i le Tupu o Herota, le tupu o lutaia na tofia e Roma, po o fea e maua ai le tamaitiiti. Na faamatauina Herota i le ono tulai mai o se tupu fou, le Mesia, lea na ia manatu o le a faoa lona malo. E aunoa ma le tau atua i Makoi ona popolega, na ia fai atu ia i latou ia tau mai ia te ia po o fea latou te maua ai Keriso. Na ia fuafua e fasioti ia te la.



Na iu lava ina maua e Makoi Keriso. Ua faamanino mai e Mataio e faapea na latou mauaina lesu i lona fale o se “tama itiiti,” ua tau mai na latou o atu i le itiiti ifo ma se tausaga talu ona soifua mai Keriso. Na latou tuuina atu ia te la o le auro, pululipano, ma le pulu muro—o ni meaalofa taugata na e faailoaina le tulaga tautupu o lesu. I se miti, na tau atu ai i Makoi e aua le tau atua ia Herota mea ua latou mauaina.



E lei tau atua lava e Makoi ia Herota e pei ona latou fai atu o le a latou faia. Na tali atu Herota i le poloaiina e faapea ia fasiotia uma lava tamaiti e fananau i Peteleema mai le lua tausaga i lalo. Ina ua lapataiina i se faaliga, na ave ai e losefa Maria ma lesu i Aikupito. Na latou nonofo ai iina seja maliu Herota. I le maliu ai o Herota, na sau ai se agelu ia losefa i se faaliga, ma tau atu ia te ia e faapea ua saogalemu e toe foi atu i Israaelu. E ui i lea, i le faalogo ai e faapea o le atalii o Herota o le tupu lea ua i ai nei, na ave e losefa lona aiga i Nasareta i Kalilaia nai lo lutaia, ma o lea na amata ai le soifuaga o Keriso o lesu le Nasareta. I ni tausaga mulimilane o le a papatisoina o la, faia ni vasega, ma faauma Lana Togiola ofoofogia, e faavavau.





Saunia e Elder
Marcus B. Nash
O Le Fitugafulu

Iosefa Samita:

MALOSIAGA
MAI I VAIVAIGA

[Faamatalaga a le Tagata Faaliliu: Ua sii mai e lenei tusiga i ni nai taimi tusitusiga a Iosefa Samita lava ia. I le Faaperetania, o loo i ai i upusii ni mea sese o le sipelaga, faailoga, ma le faamatamatateleina. (O le sipelaina o le Igilisi Faaamerika e lei amata ona faaogatusaina seia oo i le taimi mulimuli o le 1820.) Ae peitai, mo le toafimalie o le faitau, o le a faaliliuina upu sii e aunoa ma le toe faaauauina o na mea sese.]

Tle tele o afe o tausaga talu ai, na vavalō mai ai Iosefa o anamua, “Ua faapea ona fetalai mai o le Alii ia te a’u: O le a Ou faatu mai se tagatavāai filifilia mai le fua o ou sulugatiti; . . . ma o ia o le a Ou tuu atu i ai le mana e aumai ai la’u upu . . . ma o le a faamalosia o ia mai le vaivai” (2 Nifae 3:7, 11, 13).

Ua faageetia ma musuia au e lenei valoaga e faapea “o le a faamalosia o ia mai le vaivai.” Atonu e foliga mai e le talafeagai le faapea o le a valaaulia e le Alii tagata vai-vai e faataunu ai se galuega tele. Ae peitai o i latou e iloaina o latou vaivaiga e mafai ona uunaia e lena lava vaivaiga e saili le malosi o le Alii. O i latou e faapena ona faalotomaualaloina i latou lava i le faatuatua o le a faamalosia e Ia o le e i ai le malosi uma i le lagi ma le lalolagi (tagai Mataio 28:18; Mosaea 4:9).¹

Mai le taimi o lona talavou, na alu atu ai Iosefa Samita i le Alii i nei tulaga. I lona 15 tausaga o Iosefa, na ia naunau ai mo le faamagaloga o agasala ma na naunau e aoao po o fea le lotu sa sao. Na ia tusia, “E ui ina sa loloto o’u mafaufauga ma malosi i le tele o taimi, . . . sa le mafai e se tagata talavou e pei ona sa ou i ai, ma le lē masani tele i tagata ma mea, ona maua se faaiuga mautinoa po o ai ua sa’o ma o ai foi ua sese” (tagai Iosefa Samita—Talafaasolopito 1:8).

I le mautinoa atoatoa i lenei vaivaiga, na ia alu atu ai i le Vao Paia ia aoao po o fea e mafai ona ia maua ai le Lotu a le Atua. Na ia fesili ina ia mafai ona ia *faiā* se mea e uiga i ai, ina ia mafai ona ia *auai* i lena lotu

Afai tatou te iloaina o tatou vaivaiga, e pei o Iosefa Samita, ma liliu atu i le faatuatua i le Alii, o le a faia foi i tatou ia malolosi.

obliged to labour hard

(tagai i le Iosefa Samita-Talafaasolopito 1:18). I le tali i lana olega lotomaualalo, ma faamaoni, na faaali mai ai ia Iosefa le Atua le Tama ma Lona Alo, o Iesu Keriso. I le faia o lea mea, na La laveaiina o ia mai le mana o le tiapolo ma saunia le ala mo le Toefuataiga (tagai Iosefa Samita—Talafaasolopito 1:14–19).

E lei finau mai Iosefa Samita e faapea o ia o se tasi o “mea vaivai o le lalolagi” (MF&F 1:19; 35:13). I ni tausaga mulimuli ane na taua ai o ia i lenei ala: “Ona o le faamoe-moe lea na Ou faatu mai ai oe, ina ia Ou faailoa atu lo’u poto e ala i mea vaivai o le lalolagi” (MF&F 124:1).



New York and being in indig oblige to labour hard for the family having nine children and their exertions of all that any assistance for the support therefore we were deprived of

O se Tama Le Lauiloa

Na faamatalaina e Iosefa o ia lava “o se tama le lauiloa . . . o se sa faamalosia i le tatau ai ona maua o ni nai mea iti e ola ai i ana galuega i aso taitasi,” (Iosefa Samita—Talafaasolopito 1:23). Na fanau mai o ia i se tulaga maualalo o le olaga ma se tulaga faaleaoaoga e faatapulaa lava. O lana taumafaiga muamua e tusitusi lana talafaasolopito ua faamamafaina ai le tulaga vaivai lea na valaaufina mai ai o ia i le galuega.

“Sa ou fanau i le taulaga o Charon [Sharon] i le Setete o Vermont i Amerika i Matu i le aso luasefulu tolu o Tesema TA 1805 i ni Matua lelei o e na galulue malosi i le aoaoina o au i le lotu kerisiano. I le pe a ma le sefulu tausaga na malaga atu ai lou Tama o Iosefa le Matua i Palmyra Ontario County i le Setete o Niu Ioka ma i le i ai i le tulaga mativa na manaomia ai le galulue malosi mo le tausia o se Aiga tele e i ai tamaiti e toaiva ma ona sa manaomia ai taumafaiga o i latou uma na mafai ona tuuina atu le fesoasoani mo le tausia o le Aiga o le mea lea na matou le maua ai le avanoa o se aoaoga ae na ona faapea atu sa na ona aoaoina o au i le faitau tusitusi ma tulafono autu o le Numera.”²

Na lagona tele e Iosefa le le lava o le aoga lea na ia aue ai i se taimi i le maileia ai i totonusi “o le tamai falepuipui vaapiapi e toetoe lava a atoatoa le pogisa o le pepa peni ma le vaitusi ma se gagana afaafa e salalau ma le le atoatoa.”³ E ui lava i lea, na valaaufina o ia e le Alii e faaliliu le Tusi a Mamona—laupepa uma e 588 o le tusi e pei ona uluai lolomiina—lea na ia faia i le itiiti ifo ma le 90 aso.

Soo se tagata lava e mafaufau manino o le a faia se faaiuga faapea e le mafai mo Iosefa e vaivai le aoaoga ona faataunuina lea ituaiga mea e na o ia lava, ma o faamatalaga ua fatuina e nisi e sili atu le faigata ona talitonuina nai lo le faamatalaga moni: o ia o se perofeta lea na faaliliuina e ala i le meaalofa ma le mana o le Atua.

Molimau a Ema

Na faamatalaina e Ema Samita, i le matua o lona soifua, faapea i le taimi na faaliliu ai e lona toalua papatusi auro,

Itu agavale: O se tusiga mai le talafaasolopito o Iosefa Samita na tusia e lona lava lima. Itulau faafeagai: O se itulau mai le api talaaga a Iosefa Samita. Ia matauina upu na kolosi ese.

for the support of a fam

na ia "le mafaia ona tusia pe faalau atu se tusi talafeagai ma lelei le faaupuina; ae le taua ai le faalauina atu o se tusi e pei o le Tusi a Mamona. Ma, e ui o au sa auai i taimi uma lava i mea sa tutupu, e ofoofogia ia te au, 'o se vavega taua ma le ofoofogia,' e pei lava ona o le a i ai i sooo se tasi."⁴

Faatasi ai ma le anotusi o lenei talafaasolopito, e malie le vaai i le itulau e tasi o le api talaaga muamua a Iosefa, aso 27 o Novema, 1832 (faaalia i le taumatau) Na ia tusia lenei tusiga i le tolu lava ma le afa tausaga ina ua uma ona ia faaiuina le faaliliuina o le Tusi a Mamona. Matauina lea ua ia tusia ona toe kolosi ese lea o upu nei:


"Iosefa Samita Laitiiti—Tusi o Talaaga Faatau e tusi ai tulaga laiti uma na oo mai i lalo o lau vaaina."

Ao ou uuina lenei api talaaga ma fatauina nei upu ua kolosi ese, na ou vaai faalemafaufau ia Iosefa o nofo i se nofoa elea i le tuaoi o Amerika, ma tusia le fuaiupu muamua ona mafaufau lea, "Leai, e le sao lelei lava lena; sei ou toe taumafai." O lea ua ia toe kolosi ese ai le fuaiupu ma tusia, "Iosefa Samita Laitiiti Tusi mo Faamaumauga Faatau i le aso 27 o Novema 1832 mo le faamoemoe e tausia ai se tala itiiti o mea uma na oo mai i lalo o lau vaaina &c— —"

Mulimuli lava, atonu i le le faamalieina atoatoa i se gagana e ese, taumotumotu lea faatoa ia tusia, ua ia tusia loa, "Oi tau ina ia tuuina mai e le Atua ina ia mafai ona taialaina au i ou mafaufauga uma Oi faamanuia mai lau Auauna Amene."⁵ Ou te lagonaina i lenei fuaiupu na lagonaina e Iosefa lona le atoatoa ma le vaivai, ma i le valaau atu i le Atua i le faatuatua e taitaia o ia i mea uma na te faia.

O lenei, faatusatusa lena tusiga i le api talaaga ma se kopi o le uluai itulau o le pepa o le Tusi a Mamona na tusia i se taimi i le va o Aperila ma Iuni 1829 (faaalia i le isi itulau).

Matauina le tusiga lenei—e aunoa ma ni faailoga, e aunoa ma ni kolosi ese. O lenei mea e le o se galuega a se tusitala. Na faalau atu e Iosefa lenei tusi upu i le upu ao ia vaai atu i totonu o meafaigaluega na saunia e le Alii mo ia, e aofia ai le Urima ma le Tumema ma i nisi taimi o se maa faaliliu, e faaaoga ai se pulou e puipuia ai ona mata mai le malamalama le talafeagai ina ia vaai manino atu ai i upu ao faaalia mai (tagai 2 Nifae 27:6, 19–22;



Mosaea 28:13). E pei ona e vaia, e i ai se eseesega tele lava i le va o le faaliliuga o le Tusi a Mamona ma le tusiga i le api talaaga: o le tasi o le galuega a Iosefa Samita, le perofeta, le tagatavaai, le talifaaaliga; o le isi o le galuega a Iosefa Samita, le tagata. Afai e te vaai faatalatalata i lenei uluai laupepa o le faaliliuga, o le a e fatau ai i upu na atonu na faamlosiau ia Iosefa:

"Ma ua oo ina fai atu a'u o Nifae i lo'u tama: Ou te alu atu ma fai ia mea ua poloaiina e le Atua, aua ua ou iloa, e le aumai e le Atua ni poloaiga i le fanauga a tagata, sei iloga na te saunia le ala mo i latou ia mafai ai i latou ona fai le mea ua ia poloaiina ai i latou." (1 Nifae 3:7).

E toeitiiti lava oo i nei upu, na ia faaliliuina ai lenei

Family having mine

vaega: "Ae faauta, o a'u o Nifae, o le a ou faaali atu ia te outou le i ai o le alofa mutimutivale agamalu o le Alii i luga o i latou uma o e ua ia filifilia, ona o lo latou faatuata, e faamalolosi tele ai i latou e oo lava i le mana e laveaiina ai" (1 Nifae 1:20).

Ioe, o se autu o le Tusi a Mamona—ma le olaga o le Perofeta o Iosefa—e faapea o le vaivai e sailia ma le lotomualalo le Alii i le faatuata e faia ia malolosi, e oo lava i le malolosi tele, i le galuega a le Alii. O lenei faamalolosiga o le a tupu e oo lava i mea e foliga mai e laiti.

Mo se faataitaiga, o Iosefa, o se tagata e leaga le sipela, na faasaoina le sipelaga o le igoa *Coriantumr* (tagai Helamana 1:15) e lana tusiupu, o Oliva Kaotui. O le taimi muamua na faalau atu ai e Iosefa le igoa ia Oliva, na tusia e Oliva *Coriantummer*. E talafeagai lenei mea aua e leai se upu Igilisi e faaiu i le "mr." Ae ui i lea, o Iosefa—o le tagata sa lava le vaivai i le sipela na taliaina le sipelaga na tuuina atu e le Alii ia te ia—na faasaoina le sipelaga i le taimi o le faaliliuga. Ua tatou iloa nei e faapea ao avea lenei sipelaga o se sipelaga le masani ai i le Igilisi, e atoatoa lava le lelei i le sipelaga faaAikupito ma e fetaui lelei i le tulaga o le Lalolagi Tuai. Semanu e le iloa e Iosefa lenei mea ae ala mai le faaaliga.⁶

E Mafai ona Faia i Tatou ia Malolosi

O le vavega o le faaliliuga o le Tusi a Mamona o se tasi o faataitaiga pe faapefea ona faia Iosefa, ia malosi, mai le vaivai. O loo i ai se isi lesona, e sili atu le patino: afai o i tatou e pei o Iosefa, o le a iloaina o tatou vaivaiga ma liliu atu i le faatuata i le Alii ma o tatou loto atoa, ma naunau e faia Lona finagalo, o i tatou foi o le a faia ia malolosi mai i vaivaiga. E le faapea la e aveesea le vaivaiga i le faaletino—ae o lona uiga e faapea o sea ituaiga o tagata o le a faia ia malosi e le Atua.

Na taliaina ma le lotomualalo e Iosefa ona le atoatoa. Na ia taua faapea i lona taimi o talavou na ia "faalia vaiavaiga o le talavou, ma sese o uiga faalenatura o le tagata" (Iosefa Samita—Talafaasolopito 1:28). Mulimuli ane i le olaga na ia tau atu i le Au Paia i Navu e faapea o ia "ua na

O se tusiga mai le pepa o le Tusi a Mamona e faatatau i le 1 Nifae 3:7.

o se tagata lava, ma e le tatau ona latou manatu o a'u e atoatoa ona lelei; . . . ae afai latou te onosaia [ona] vaivai-ga ma vaivaiga o le au uso, e faapena foi ona [ia] onosaia o latou vaivaiga."⁷

E lei faafoliga lava Iosefa faapea e atoatoa pe le pona, ae na ia faailoaina le mana o le Atua na faaalia e ala mai ia te ia pe a galue o se perofeta: "Pe a ou tautala o se tagata ua na o Iosefa lena o loo tautala. Ae afai e fetalai le Alii e ala mai ia te au, e le o Iosefa Samita lena o loo tautala; ae o le Atua."⁸

O lea, mai le vaivaiga, na faia Iosefa ia malosi—lava le malosi e faia ai le "tele atu mea na ia faia, vagana ai lava Iesu mo le faaolataga o tagata" (MF&F 135:3) nai lo se isi lava perofeta i le talafaasolopito atoa lava.

O lo tatou Atua e le fesuisuiai o le a faapena foi ona



father. I will go and do the commandments for I know commandments unto me shall prepare a way for me to finish the thing which

faia oe ma au ia malolosi mai vaivaiga—pe afai tatou te liliu atu ia te Ia i le faatuatua ma le faamoemoe atoa o le loto, e pei ona faia e Iosefa.

Tatalo ma le Lotomaualalo

E tusa ai ma Lana fuafuaga faaselesitila, ua tuuina mai e le Alii ia i tatou vaivaiga e mafaia ai lo tatou avea ma e malolosi i le ala lava e tasi lena e taua i le taimi ma le faavavau—e ala mai ia te Ia. Ua ia fetalai mai: “Ma afai e o mai tagata ia te au o le a ou faaali atu ia te i latou o latou vaivaiga. Ou te avatu i tagata ia vaivaiga ina ia faalotomaualalalo ai i latou; ma ua lava lou alofa tunoa mo tagata uma o e e latou te faalotomaualalaloina i latou lava i ou luma; aua afai latou te faalotomaualalaloina i latou lava i ou luma, ma faatuatua mai ia te au, ona ou faia

lea o mea vaivai ia avea ma mea malolosi ia te i latou” (Eteru 12:27).

E tusa ai ma lenei mau, ua tuuina mai ia i tatou vaivaiga ina ia mafai ai ona tatou lotomaualalalo. O i latou e filifili e faalotomaualalalo i latou lava ma faaaoga le faatuatua ia te Ia o le a faia ia malolosi. O lo tatou lotomaualalalo la, i luma o le Atua, o se auala taua lea mo le malosi ma le mana o le Atua ia faaalia ai i o tatou olaga.

E i ai i latou e “manatu ua popoto i latou, ma latou lē faalogologo ai i le fautuaga a le Atua, ona ua latou tuueseina, i le manatu ua latou iloa mo i latou lava, o le mea lea, o lo latou poto o le valea lea, ma o le a lē aoga ia te i latou” (2 Nifae 9:28). O le vaifofo i lenei faamaualuga o le “manatu o i [tatou] o ni vale i luma o le Atua, ma o ifo i lalo i le loloto o le lotomaualalo,” (2 Nifae 9:42).

Mai le taimi o lona talavou, na malamalamā Iosefa faapea o se ki sili i le atiina ae o le lotomaualalo o le saili atu i lo tatou Tama Faalelagi i le tatalo faamaoni, ma le loloto. O Daniel Tyler, o se tagata o le Ekalesia anamua, na faamatalaina se taimi i Katedani lea na fulitua ai le toatele agai i le Perofeta. O Brother Tyler, na i ai i se fonotaga lea na tatalo ai le Perofeta faatasi ma le aulotu mo le fesoasoani a le Alii, na faamatalaina le aafiaga i nei upu:

“Sa ou faalogo i alii ma tamaitai o tatalo . . . , ae ou te lei faalogo muamua lava seja oo mai i le taimi lea i se tagata ua faalagiina lona Mataisau e pei lava o loo Ia i ai ma faalogo mai e pei o se tama agaalofa ona faalogo i faanoanoaga o se tamaitiiti faaaloalo. O Iosefa i lena taimi sa lei aoaoina, ae o lena tatalo, lea na oo lava i le tulaga lautele mo i latou o e na tuuaia o ia ua se ese . . . , na mauaina le aoaoina ma le gagana faalelagi. . . . Na foliga mai ia te au e pei, pe a aveesea le veli, o le a mafai ona ou vaai atu i le Alii o tulai faasaga i Lana auauna e sili ona lotomaualalo i auauna uma lava ua ou vaai i ai.”⁹

Mai le Vaivai, o le Malosi

Ina ua 17 tausaga o Iosefa, na tau atu e Moronae ia te ia e faapea “o i ai i le Atua se galuega mo a'u ou te faia; ma e faapea o lo'u igoa o le a tauleleia ma tauleagaina i totonu o atunuuma, ituaiga, ma gagana, po o le a tauleleia ma tauleagaina i totonu o nuu uma.” (Iosefa Samita—Talafaasolopito 1:33).



the things which the Lord has given to the Lord giveeth to the children of men. Save them that they may according to commandments of him, and

Ou te mautinoa i lena taimi, e toatele na manatu faapea o lea ituaiga o faamatalaga o se faamaoniga o le faaseseina o se tulaga maualuga; ae peitai i le lalolagi o aso nei faatasi ai ma le initoneti, o le igoa o lena tama faifaatoaga le lauiloa *ua* lauiloa i le salafa o le kelope, ma o loo taulelia ma tauleagaina foi o ia.

Ao toeitiiti lava maliliu Iosefa ma Ailama Samita i Karefasi, Ilinoi, na faitau leotele atu e Ailama ia Iosefa ma isi na faatasi ma i laua i le potu o le falepuipui ona toe gaugau ai lea o le itulau o loo i ai upu nei:

“Ma sa oo ina ou tatalo atu i le Alii ia ona avatu i Nuu-e se le alofa tunoa, ina ia latou maua le alofa mama.


“Ma sa oo ina fetalai mai le Alii ia te au: Afai e le i ai ia i latou le alofa mama e le afaina i lea mea ia te oe, sa e faamaoni; o le mea lea, o le a faamamaina ou ofu. Ma ona ua e vaai i lou vaivai o le a faamalosia oe, e oo lava i le nofo i lalo i le nofoaga ua ou saunia i maota o lo’u Tamā” (Eteru 12:36–37).

I se tulaga moni lava o *le vaivai* lena na faia Iosefa ia malosi. Na uunaia i ni taimi e lona vaivai, na ia saili atu ai le fesoasoani a le Atua i le faatuatua, i le naunau e faia e tusa ai ma Lona finagalo. Na ia alu atu i lo tatou Tama i le Lagi i nei tuutuuga i lona olaga atoa. O se taunuuga, na ia aafia ai i le Uluai Faaaliga, faaliliuina o le Tusi a Mamona, mauaina o ki o le perisitua, faatulagaina o le Ekalesia toe-fuataiina a Keriso, ma aumaia i le lalolagi le atoatoa o le talalelei a Jesu Keriso. Na tuputupu ae le Perofeta o Iosefa i le malosi; e lei faia o ia ia maoae i se minute. Na oo mai ia te ia, ma o le a oo mai ia te oe ma au, “lea fasifuitau i lea fasifuitau, o lea mataupu i lea mataupu; o si mea itiiti i ‘i, ma si mea itiiti i ‘o” (MF&F 128:21; tagai foi Isaia 28:10; 2 Nifae 28:30).

O lea aua le lotovaivai; o le faagasologa o le faia ia malosi e faasolosolo ma e manaomia ai le onosai ma se naunau tumau ia mulimuli i le Faaola ma ola ai i Lona finagalo, e tusa lava po o le a le mea e oo mai.

Ua Toe Foi Mai le Meaalofa

O William Tyndale, lea na faaliliuina ma lolomi le Tusi Paia i le Igilisi i le seneturi e 16, na fai atu i se alii aoaoina na tetee i le tuuina atu o le Tusi Paia i lima o tagata lautele, “Afai e faasaoina e le Atua lou ola, iinei i ni tausaga se tele o le a ou faia se tama lea e aveina le palau o le a



Ao toeitiiti lava maliliu Iosefa ma Ailama Samita i Karefasi, Ilinoi, na faitau leotele atu ai e Ailama ia Iosefa ma isi lenei kopī o le Tusi a Mamona.

*sili atu mea e iloaina i tusitusiga paia nai lo oe.*¹⁰

I se tulaga faapena i le 300 tausaga mulimuli ane, na asiasi atu ai Nancy Towle, o se failauga femalagaai tau-taua i le 1830, i Katelani ina ia matauina e ia lava ia tagata “Mamona.” I le talanoaga ma Iosefa Samita ma isi taitai o le Ekalesia, na ia faitiona ai ma le mateletele le Ekalesia.

E tusa ai ma faamaumauga a Towle, e lei faia e Iosefa se upu seia faliu atu o ia [Towle] ia te ia ma faatonuina o ia ia tauto mai faapea na faaali atu e se agelu ia te ia le mea e maua ai papatusi auro. Na ia tali atu ma le fiafia e faapea e lei tauto lava muamua o ia! Ina ua toilalo e faaita o ia, na ia taumafai loa e tauleaga o ia. “Pe e te le maasi-asi, i na ituaiga o pepelo?” “O oe, e le sili atu nai lo se tama ave palau le aoaoina o lo tatou nuu!”

Na tali filemu atu Iosefa, “Ua toe foi mai, le meaalofa, e pei o taimi muamua, i faifaiva e lei aoaoina.”¹¹

Support of the Family

O lea la o upu a Tyndale o se valoaga: o se tama ave palau na tupu ae ia iloa mea e sili atu o tusitusiga paia nai lo soo se tagata lava na soifua, sei vagana ai le Faaola.

E moni lava, o le Ekalesia toefuataiina ma le talalelei a Iesu Keriso e le o ni galuega a Iosefa Samita, o se “tama ave-palau” o tuaoi o Amerika. Nai lo lena, o le galuega a le Alii o Iesu Keriso na toefuataiina *e ala* mai ia Iosefa Samita, le Perofeta. Ao ia mafaufau i lona olaga, atonu na ia lagonaina upu a Iakopo e faapea “A e ui i lea, ua faailoa mai ia te i matou e le Alii le Atua lo matou vaivai, ina ia matou iloa o lona alofa tunoa ma lona faamaualalo tele i le fanauga a tagata ua matou maua ai le mana e fai ai nei mea.” (Iakopo 4:7).

Ou te iloa o Iosefa Samita sa avea ma o se perofeta a le Atua, na faia ia malosi i mea vaivai. Na saunoa mai Peresitene Polika Iaga (1801–77): “Ou te lagonaina lo’u alaga Aleluia, i taimi uma, pe a ou mafaufau ua leva ona ou iloaina Iosefa Samita, le Perofeta.”¹² E ui ou te lei mauaina le avanoa i le olaga faitino, ou te maua le filemu i le folafolaga mafana e faapea e “tele e toe vaaia ia ‘Iosefa’ ia.”¹³ Ou te matuai faafetai lava mo le Perofeta ma lona lotomaualalo i luma o le Atua, lea na faia o ia ia malosi. Ua uunaia foi au e lana talafaasolopito ma le aoaoga faavae e faapea o le a faia e le Alii i tatou taitoatasi ia malolosi mai i o tatou vaivaiga pe afai tatou te faapena ona faamaulalo i tatou lava i Ona luma ma faaaoga lo tatou faatuatua ia te Ia ma le naunau tumau e faia Lona finagalo. ■



O LE MAUAINA VAVE E IOSEFA O LE MALAMALAMA MA LE TULAGA MATUA

“O nisi tulaga o lona olaga e iloagofie ai le perofeta o Iosefa i lana misiona atoa o le faatusatusa lea i lona olaga talavou, o le maoae o lona tulaga aoaoina, ma le ofoofogia o le vave o lona malamalama ma lona faatagata matua. O le 14 o ona tausaga na ia maua ai le Uluai Faaliga ma le 17 na oo mai ai le asiasiga muamua a le agelu

Mai i se lauga, “Out of Weakness He Shall Be Made Strong,” na tuuina atu i le Faigalotu Lona 70 o le Annual Joseph Smith Memorial i Logan, Iuta, ISA, i le aso 10 Fepuari, 2013.

FAAMATALAGA

1. Ou te faafetai i au uo faigaluega, ae maise lava Richard E. Turley Jr. ma Jed Woodworth i le Matagaluega o Talafaasolopito o le Ekalesia, mo le sao agalelei.
2. Iosefa Samita, i le *The Joseph Smith Papers, Histories, Volume 1: 1832–1844*, lo. Karen Lynn Davidson ma isi(2012), 11.
3. Iosefa Samita, “Letter to William W. Phelps, 27 Novema 1832,” 4, josephsmithpapers.org.
4. Ema Samita, i le “Last Testimony of Sister Emma,” *Saints’ Herald*, Oke, 1, 1879, 290; faatulagaina sipelaga; tagai foi Russell M. Nelson, “A Treasured Testament,” *Ensign*, Iulai 1993, 62–63.
5. Iosefa Samita, i le *The Joseph Smith Papers, Journals, Volume 1: 1832–1839*, ed. Dean C. Jessee ma isi (2008), 9.
6. I le “Coriantumr” ma le sipelaga o igoa sao, tagai Royal Skousen, i le *Book of Mormon Authorship Revisited: The Evidence for Ancient Origins*, ed. Noel B. Reynolds (1997), 61–93. I le faaaogaina o faamaoniga mai uluai laupepa, ua faaalua e Skousen e faapea o le taimi muamua lava na vaaia ai igoa sao i le tusiga, na sao lo latou sipelaga. I isi taimi na vaaia ai atonu na le sao ona sipelaina, na fautuaina e faapea na sipela atu e Iosefa Samita igoa taitasi i le taimi muamua ae na faalagolago i le manatua a le tusiupu mulimuli ane.
7. *Aoaoga a Peresitene o le Ekalesia: Iosefa Samita* (2007), 555.
8. Edward Stevenson, i le Hyrum L. Andrus ma Helen Mae Andrus, comps., *They Knew the Prophet* (1974), 87.
9. Daniel Tyler, i le “Recollections of the Prophet Joseph Smith,” *Juvenile Instructor*, Fep. 15, 1892, 127; tagai foi *Aoaoga: Iosefa Samita*, 127.
10. William Tyndale, i le S. Michael Wilcox, *Fire in the Bones: William Tyndale—Martyr, Father of the English Bible* (2004), 47.
11. *Vicissitudes Illustrated, in the Experience of Nancy Towle, in Europe and America* (1833), 156, 157.
12. *Aoaoga a Peresitene o le Ekalesia: Polika Iaga* (1997), 349.
13. “Via Le na Fetaia’i ma leova,” *Viiga*, nu.15.

o Moronae. O le 21 o ona tausaga na ia maua ai papatusi auro, ae na o le 23 ona tausaga ae maea ona faaliliuina le Tusi a Mamona (e le sili atu ma le 60 aso faigaluega). E sili atu ma le afa o faaaliga o loo i totonu o la tatou Mataupu Faavae ma Feagaiga na tuuina atu i le Perofeta o Iosefa Samita ina ua faatoa 25 ona tausaga po o le itiiti ifo foi. O le 26 o ona tausaga na faatulagaina ai le uluai Au Peresitene Sili, ae o lona 30 na faapaiaina ai le Malumalu o Katelani.”

Elder Dallin H. Oaks, o le Korama a Aposetolo e Toasefululua, “Iosefa, o le Tagata ma le Perofeta,” *Liahona*, Iulai, 1996, 84.



E Mafai ona Tatou Faia ia Sili Atu, Vaega 2:

Mauaina o Lou Nofoaga i Le Ekalesia a Iesu Keriso

Aua le tuu atua i isi e taofia oe mai le olioli i faamanuiaga o le avea matagata o le Ekalesia a Keriso.



Saunia e Betsy VanDenBerghe

Faamatalaga a le Faatonu: Po o le a lava le malosi o lo tatou talitonuga i le talalelei a Iesu Keriso, e mafai lava ona fagata ona tumau le faatuatua pe afai tatou te le lagonaina e pei i tatou o ni tagata o le Ekalesia. Na aoaoina talu ai nei e taitai o le Ekalesia lenei luitau i se faasologa o vitio ua faautuina Unity in Diversity. I le lomiga o Setema 2017, "We Can Do Better: Welcoming Others into the Fold" o loo iloiloina ai lo tatou tiutetauave i le faafeiloaia o isi. O lenei tusiga, vaega 2, o loo taulai i le ala e mafai ai ona tatou tauaveina le tiutetauave mo lo tatou lava faatuatua, e tusa lava pe tatou te lagonaina e pei ua tatou auai.

le mavae ai o le valu tausaga e le o auai i le lotu, na maua ai e Paulo (ua suia uma igoa) se valaau i le telefoni mai lona epikopo i Pasila na fesili atu po o a mai o ia. Ua leva ona manao Paulo e toe foi mai, ae o le tele o popolega na taofia o ia mai le toe toaga atoatoa. E mafai

faapefea ona ia aloese mai le faatusatusaina o ia lava, o loo nofotoatasi pea, ia i latou ua faaipoipo ma i ai fanau? Pe o le a ia mauaina ea ni uo i le lotu i le mavae ai o se taimi umi lava, ma afai na te mauaina ni uo, o le a so latou manatu ia te ia? Pe o le a ia mafai pea ona lagonaina le Agaga e pei ona ia maua i le taimi o lona liliu mai ma le misiona pe o le a lava le faatuatua e talia ai ni valaauga?

I le tasi le masina talu ona mavae le valaau i le telefonu, na matamata ai Paulo ia Peresitene Dieter F. Uchtdorf, Fesoasoani Lua i le Au Peresitena Sili, o tuuina mai se lauga i le konafesi e faaautu o le, "Sau, Auai Faatasi ma i Matou."¹ "O lena lauga na matua uunaia ai lava au," ua ia manatua ai, ma i totonu o ni nai vaiaso na ia vaaia ai o ia lava ua nofonofo i le paka a le lotu, i le gatete ma tuuina atu se tatalo le leoa mo le malosi e alu ai i fafo o le taavale ma ulufale atu i le falelotu.

"E lei atoatoa mea uma," ua ia taua ai lona tausaga muamua ina ua toe foi mai. E lei faigofie le toe faamasani i ai. Ae peitai o se lagona o le sootaga i le Faaola ma se manao malosi mo se pepa faataga o le malumalua fesoasoani ia te ia e faatoilalo ai ona lagona le mautonu. Na amata ona ia fai-tauina ana tusitusiga paia ma toe tatalo. "Afai e te le fiu, e te mauaina le malosi ma mafai ona lagonaina le Alii ua faamanuiaina oe," ua ia fautuaina ai i latou o e tauivi ia lagonaina le taliaina. "E i ai sa'u molimau o le Ekalesia lenei a Keriso, ae peitai o totonu ia te Ia o le a e maua ai le auai moni lava."

O le tala a Paulo ua suitulaga i ni nai manatu ua faamatatalaina e taitai i lenei faasologa o vitio *Unity in Diversity*. Ua ofoina mai e a latou savali ma fautuaga le faamoemoe ma fautuaga ia i latou o e le lagonaina e pei i latou o ni tagata o le Ekalesia. O nisi taimi tatou te lagona ai le tuuatoatasi e oo lava i totonu o le lotu, ae, e pei ona taua e nei taitai ma tagata o le lotu, e i ai mea e mafai ona tatou faia e fesoasoani ai ia i tatou lava e ala i luitau e pei o le faaesea po o le le agalelei i isi. E mafai ona tatou aloese mai faatususaga, agai i luma i le le mautonu, ia iloa o le toe foi mai e mafai lava i taimi uma, ma e sili atu i mea uma, ia faalagolago i le Faaola.

Aloese mai Faatusatusaga: O le a Faamanuiaina i Tatou Uma Lava i le Faaiuga

"Pe a e amata ona faatusatusa oe lava, i le tasi ma le isi, e taitai atu ai a le o le lotovaivai pe taitai atu i le faamaualuga. . . . E oo mai faamanuiaga i se taimi vave. E oo mai faamanuiaga i se taimi umi lava. O nisi taimi e teuina

faamanuiaga mo i tatou, ou te talitonu, pe a mavae ona tatou pasi atu i le veli. . . . I le iuga, e mafai ona tatou mautinoa o le folafolaga o le ola e faavavau e mo tagata uma lava.”

—Elder Gary E. Stevenson o le Korama a Aposetolo e Toasefululua

Sa masii atu Rochelle i se fale lelei i se eria mauoa i Iunaite Setete sisifo i le mavae ai o le faaaluina o le taimi i se nofoaga e leai ni fale. Sa tatala le faaipoipoga ma tausia ni fanau, sa ia galue ai i ni galuega se lua, o nisi taimi e tolu, ina ia mafai ona gafatia meaai ma le nofo totogi ai, ma sa toaga ma le toaga, talu lona liliu mai.

“E ui lava sa foliga mai e toetoe o tagata uma i lau uarota fou e sili atu le tamaoaiga nai lo au,” sa ia faamatala mai, “sa latou aapa mai ia te au ma talaina le ala na faia ai ou laei. Sa popole moni tagata uma.”

“E ui sa i ai i mamafatu o mea tautupe sili ona taua, sa lei teena lava e Rochelle isi mo lo latou tulaga faigofie atu. “Ou te manao ia sili atu ona saogalemu, e mautinoa lava, ae ou te lei vaai lava i fale a ou tuaoi ma lagona sa tuuatoatasi au e le Atua,” na ia toe manatua ai, “Sa mafai ona ou lagona o Ia savali i ou autafa e oo lava i au filifiliga le lelei.”

E ui lava sa luitauina le taimi faatulagaina o le galuega a Rochelle i nisi o taimi, sa fesoasoani mulimuli ane taitai o le uarota ma uo ia te ia e faataunu se naunautaiga e auai atu i le malumalu. “O le alu soo i le malumalu na fesoasoani ia te au ia loto faafetai mo le mamao ua ou sau ai,” sa ia matauina, “Ou te le popole i le foliga mai ua muamua atu isi ia te au.”



Ua tautino mai e Rochelle sa ia tauivi ma lana fanau teine ma “e le o se aiga AAG e atoatoa.” Ae ua ia iloa “e i ai i tagata uma ni faafitauli ma e leai se aiga e atoatoa,” o se vaaiga e laveai ai o ia mai le autilo i autafa i isi nai lo le taulai i lana sootaga ma le Atua.

“E mafai e lau fanau teine ona vaaia le eseesege na faia e le talalelei i lou olaga,” o lana tala lea. “E mafai ona ou lagona foi le eseesege ma e lava lou pisi i lau galuega, aiga, ma le Ekalesia e leai ai sou taimi mo le faatusatusaga. E na o lou faafetai lava i le i ai i luga o le ala sao.”

Tumau le Malosi: e Mafai e Keriso ona Suia Oe

“O lenei tagata o loo nofo i ou autafa ma le amanaiaina au po o le manao foi e aluese atu . . . e le suia le mea moni pe faapefea le lagona o Keriso ia te au ma avanoa ou te maua ia Keriso. . . . O tagata taitoatasi uma lava e manao-mia ia naunau e faapea o le a latou maua se nofoaga i le malo o le Atua [ma i] le tino o Keriso, ma o isi e le manatunatu pe faatamala pe sili atu foi le leaga e le mafai ona taofia lena mea.”

—Elder D. Todd Christofferson o le Korama a Aposetolo e Toasefululua

Ao tuputupu ae, na auai Mataio i le lotu i ni tamai paranesi. O ia ma lona toalua, o se tagata liliu mai Iukureini, na masani i le tele o valaauga ma le auai atoatoa i nuu o le AAG i atunu i fafo ae masii atu loa i le Iunaite Setete. O uarota tetele ma aganuu e eseese faamoemoega na la lagonaina ai le “le amanaia ma le leai o se faamoemoe,” ua ia manatua ai. “Na pei ua le mafai ona ma faamasani i ai. Na ma lagonaina le le amanaiaina, i le leai o ni aafiaga e siitia ai ma ni sootaga ma isi i aso Sa.”

Na avea lo la faanoanoa o se faafitauli ogaoga, ina ua mavae ona siitia atu i se aai fou, na tulimatai atu Mataio ma lona toalua i se asiasiga mai se taitai perisitua o le lotoifale lea na avea lona faamoemoega o le asiasiga i le faaiuga i le fai atu ia i laua e taofiofi le la tamaitiiti ulavale i le taimi o le sauniga faamanatuga. I le tiga tele, na mafaufau ai Mataio e le toe foi atu lava i le falelotu o le lotoifale. “O le mea na taofia ai au,” ua ia faamatalaina, “o lau molimau e faapea o le Ekalesia lenei a le Alii ma e finagalo le Faaola ia ou i ai iina. O le auai i le talalelei e i ai taunuuga i tua atu o soo se lagona tiga po o se tulaga patino o le a ou maua i lenei olaga.”

O tulaga i le Ekalesia e mafai ona tatou lagona ai le tuuatoatasi i nisi taimi, le amanaiaina, ma le le manaomia, o se tulaga e le tulagaese i le Au Paia o Aso e Gata Ai. O le tusitala Katoliko o David Mills ua faamatalaina le luitau



ua feagai ma tagata e o i le lotu i le faafeagai ai ma isi o e "e sili atu le mauoa pe sili atu le matitiva, sili atu pe ititi le aoaoina nai lo oe. Atonu o i latou e ese le atunu po o se vaega o aganuu po o tausaga nai lo oe." Atonu tatou te le filifilia soo se tasi o i latou mo a tatou aga o fesootaiga ese-e, ua ia fai mai ai. Ae ui i lea, o le tuuto faalelotu e aofia ai le feoeoeai ma tagata tatou te le filifilia ma "saunia se tasi o ni nai nofoaga o totoe na e sili atu le pei o se nuu nai lo se aga o fesootaiga. . . E tatau ona e aoao e alofa i nei tagata, pe ia sili atu ona agalelei, pe a e le manao e fai."² O le faalagolago i le Atua pe a e le mafai ona poloka pe le toe fia vaai i tagata i lou nuu faalelotu e masani lava ua na o le pau lea o le ala e faatoilalo ai le luitau.

Na iloaina e Mataio e taua lenei faalagolago i le lagi i le tumau ai le toaga i le Ekalesia. "Pau le mea na faatumauina ai lou agai pea i nisi taimi o lau molimau ia Keriso," ua ia faamatalaina mai. "E sili atu ona taua le talalelei nai soo se tasi lava o i tatou. E silafia e Keriso mea tatou te le vaaia, e silafia le mea tatou te mafai ona avea ai, ma e mafai ona galue ma tagata uma."

O Jasmin, o se tagata lotu i le Iunaite Setete i saute, ua faapea mai "Sa faigata ona ma lelei ma se tamaitai i lau uarota lea na foliga mai na faalavelave tele i lou olaga, ma na ou faatagaina lena mea e tulieseau." Ae ina ua amata ona sili atu le popole mo lana tama tama laitiiti nai lo le le mautonu pe faapei le toe foi atu, na iloaina e Jasmin ua o i le taimi ia "aua ai le tuu atua i manatu o isi e uiga ia

te au e tulieseai au mai ia Keriso—e tusa lava pe ou te lagonaina pe leai foi se tasi i le uarota e vaai maualalo ia te au."

Na ia maua le lototoa na lava e alu atu ai i fafo i le afa malosi i se tasi aso Sa lea na lagonaina ai e lona aiga laitiiti le opoina mai e uo ia na mafai ona fesoasoani ia i latou ia tuputupu ae i le Ekalesia a Iesu Keriso. "Ua ou salamo na ou alu ese." ua ia fai mai ai. "Ae ou te faafetai ou te lei fiu ma sa ou taumafai pea, aua o le talalelei e le faatatau i isi—pe o au foi—e faatatau i lou Faaola."

Fai se Laa i totonu o le Pogisa: O le a Mulimuli atu le Malamalama

"O le alii o le lalolagi ma le tamaitai o le lalolagi e faapea mai, 'E leai se mea o le a ou faia ai lenei laa [ma] alu atu i totonu o le pogisa seja vaaia se malamalama ma ou mafai ai ona vaai i le mea o loo ou agai i ai. O le mea e manaomia o lo tatou faia o le laa, ma faamoemoe o le taimi lava e pai ai lo tatou vae i le eleele, o le a vaaia loa le malamalama."

—Elder David A. Bednar o le Korama a Apostolo e Toasefululuia

O nisi taimi e faigata mo tagata fou ona mauaa i le talalelei pe a latou le mauaina se mautinoa atoatoa o le mea o loo i le lumanai. O le aoaoina e uiga i lenei manatu o le faatuatua mo Mei-Hsin, o se tausiaiga i Taiuani, na aofia ai le aoaoga o le talalelei e aumai fanau i le lalolagi, o se laasaga faigata aua "o le toatele i lau aganuu e maua se tamaititi se toatasipoi le i ai foi o se fagafao," ua ia matauina.



O maitaga taitasi na manaomia ai o ia ia maua le faatuatua e laa atu ai i le le mailoa ma le le amanaia i nisi o taimi le faitio malosi mai aiga ma le aganuu i le tulaga lautele.

E masani lava, o le agai atu i luma e manaomia ai le laa atu i totonu o se vaega e le iloa le lumanaí, lea e mafai ona avea ma se mea taufaafefe ia i latou e fou i le faatuatua. E manaomia ai le atiina ae o le faalagolago e faapea o le a fesoasoani le Alii ia i latou i le ala. O le mauaina o lagona le lelei ma le le mautonu, ua faamautinoa mai e Elder Bednar, o se vaega masani o la tatou faagasologa o le aoaoina ma le tuputupu ae, ae o nisi taimi o a tatou laa atu i totonu o le le mailoa—pe o aofia ai le faia o se aiga po o le toe foi mai i le auai i le Ekalesia—e mafai ona avea o se luitau faapitoa aua e oo mai le molimau pe a mavae le tofotofoga o lo tatou faatuauta (tagai Eteru 12:6). Na maua e Mei-Hsin ma lona toalua lea molimau ina ua mavae le faia o se aiga. “Ma te fiafia ma e matuai faafetai lava mo la ma fanau,” fai mai ai o ia. “Ua matou aoao e ola i mea ua matou maua, e fesoasoani ma alofa i le tasi ma le isi. Ou te faafetai na ma aumaia i latou i le lalolagi.”

E masani lava, o laa muamua e sili ona faigata. “O le taimi muamua tatou [te laa atu ai i le pogisa],” le saunoa mai a Elder Bednar, “E le o le masalosalo, ae e i ai lava sina le mautonu, e oo lava i sina popole, lea o se tulaga masani lava.” Ao avea le faasologa o le agai i luma e le mafai ona atoatoa le sololelei pea (“e le o se taamilosaga atoatoa e le

faalavelavea lava,” ua ia faamatalaina), e mafai ona faasolo solo lava ina tatou tuputupu ae i “lea mataupu i lea mataupu,” faatasi ma lo tatou faatuatua ua faateleina lava pea.

O le agai i luma e manaomia ai le faataitai, ua fautua mai ai Lazare o Georgia, o se tagata liliu mai i le atunu tuaoi o Rusia ma Europa. O le aoao e talitonu i uo o le AAG o lana laa muamua lea, lea na maea loa na ia taliaina se faamanu iaga faaleperisitua. “Ona ou mafai ai lea ona agai i luma i lesona a faifeatalai,” ua ia faamatalaina mai. Ao faateleina le faatuatua o Lazares ia Iesu Keriso, “Na ou faia le laa tele lava o le papatisoga e ui lava ou te lei 100 pasene i le mautinoaina. Ae na tuuina mai e le Alii ia te au le lototoa i vaega taitasi, ma ou te faafetai tele lava nei na ou faia lena mea.”

Aua Le Fiu

“O tagata o e mafaufau ua latou agasala tele lava pe ua ova foi pe ua leva tele ona aluese ma ua le mafai lava ona toe foi mai i totonu o le lio: O lau folafolaga e faapea e leai lava se tasi e mafai ona pau e maualalo atu nai lo le susulu o le malamalama o Keriso,” E le tupu lena mea,”

—Elder Jeffrey R. Holland a le Korama a Apostolo e Toasfululua

O le tuputupu ae i totonu o se aiga faaleagaga o le AAG i Iuta, ISA, na lagona ai e Brian e faapea o le Ekalesia e le mo ia. “Ou te fiafia i taaloga faalemafaufau, tifaga, ma musika vave malomalao.” ua ia fai mai ai, “ae le o Sikauti, tusitusiga paia, seminare, ma taaloga.” O le taimi lava na

ia tuua ai le aiga, na ia masii atu i se falemautotogi ma "taliaina le lalolagi e au lava, e aofia ai feusuaiga ma fua-laau faasaina." Ina ua mavae se vaitaimi umi lava ua taua e Brian "o le olaga ulavale ma le faataitaiga," na ia oo ai i ni faigata tau tuge ma na toe aumaia o ia i le fale e ona matua, e ui lava e lei toe sau o ia i le lotu.

O le fanau mai o se tuafafine pepe na mafai ai ona toe iloilo e Brian ona manatu. Ina ua ia siiina o ia mo le taimi muamua lava, ua ia manatua, "Na ou iloaina o ia ua le na o se isi ituaiga o manu." I se ituaiga o popolega, na ia auai i lona faamanuiaga o se pepe, ma ina ua oo mai le faamanatuga ia te ia, "Na ou pasi ese atua e aunoa ma le tagofia, ae o se vaega o au na lagonaina le fiaai faaleagaga i ai."

I le taumafai e tau faavasega ona lagona feteenai, na tausia ai e Brian se api o talaaga. "Na ou ala pea e tusi e uiga i lou tulaga faaleagaga i le tuneva o se tasi po," o lana tala lea, "ma na i ai lou aafiaga muamua faaleagaga, e ui e le o le itu lelei." Na ia lagonaina se malosi leaga, inosia, ma le mataita ua taumafai e pulea lona agaga. "Ina ua mavae lena mea," ua ia faamatalaina, "na ou iloaina sa ou manaomia le Alii." Ae i le mamao tele o le se ese, na mafaufau ai Brian, "Pe o le a ou agavaa ea mo Lana fesoasoani ma le puipuiga?" Na ia fesiliglia foi pe mata o le a ia mafai ona toe tagofia le faamanatuga.

Sa faigata le ala e toe foi mai ai. O le tuuueseina o le tapaa sa le faigofie, o le tautau atu i le epikopo na manao-mia ai le lototoa, ma o le liliuese mai uo tuai ma gaoioiga sa faigata. Na lagolagoina o ia e lona aiga, uo teine, ma le epikopo, ae na mauaina e Brian lana punaoa autu o le malosiaga ia Iesu Keriso.

"Na ou mauaina le Alii ua naunau e fesoasoani ia te au," ua ia manatua. "Na matai mai ni avanoa fou e suitulaga i au sailiga tuai. O le tele o le taumafaiga na ou faia ia ola ai i le talalelei, o le tele foi lea o le manino o lou ala." Ao faalagolago Brian i le Alii ma iloaina Lona naunau e faamagalo ma faamalolo, na sili atu le uiga o le faamanatuga mo ia ma na fesoasoani ia aumaia o ia latalata atili atu i le Faaola. "Ao ou tagofia le falaoa ma le vai i le lotu o se tamaitiiti i le faaselau o taimi, sa ou mafai mulimuli ane ona tagofia le faamanatuga i le lagona e pei o le taimi muamua lea."

E Leai Se Tasi e Mafai Ona Sui Tulaga ia te Oe

O le laa atu i fafo o le taavale ma ulufale atu i le lotu, aapa atu i isi tagata, faatoilaloina o tulaga tiga, ola ai i le talalelei e aunoa ma le mautinoa atoatoa e uiga i le

lumanai, ma le tautau atu o agasala—tatou te savalia uma lava ala faigata ma le le mautonu i lo tatou ala agai atu i le laau o le ola (tagai 1 Nifae 8).

O la tatou tautinoga patino e mulimuli i le Faaola e ttau mo lo tatou taunuu atu saogalemu. Ao ttau le faamalosiauga, alofa, ma le taliaina mai tagata o le Ekalesia ma taitai, atonu o i tatou taitoatasai na feagai ma ni taimi lea na tatau ai ona tatou naunau e mulimuli i le Faaola, e tusa lava pe tatou te lagonaina e pei o loo tatou faia na o i tatou.


Ia nofo i lou nofoaga i le Ekalesia a Iesu Keriso. Aua le faatusatusa, tuu atu ia Keriso e suia oe, fai ni laa o le faatuatua na o le a tauia, ma ia iloa e le mafai lava ona tuai tele e toe foi mai. "O le mea lea, afaia o le a outou fetaomi atu i luma, ma taumamafa fiafia i le afioga a Keriso, ma tumau e oo i le iuga, faauta, ua faapea ona fetalai mai o le Tama: o le a outou maua le ola e faava-vau" (2 Nifae 31: 20). ■

E alala le tusitala i Iuta, ISA.

FAAMATALAGA

1. Tagai Dieter F. Uchtdorf, "Sau, Auai Faatasi ma i Matou," *Liahona* Nov. 2013, 23.
2. David Mills, "Go to Church, Meet Annoying People," Feb. 1, 2017, aleteia.org/2017/02/01/go-to-church-meet-annoying-people.





O LE

Talalelei a Iesu Keriso

O SE MALUTAGA MA SE PUIPUIGA

Saunia e Getulio Walter Jagher e Silva

Seminare ma Inisitituti

Efinagalo le Alii e puipuia Lona nuu. I se vaitaimi o le tele o le sauaga i le Eklesia, na Ia faamamafaina ai le taua o le faapotopoto i Siona “mo se puipuiga, ma mo se sulufaiga mai le afa” (MF&F 115:6; faaopoopo le faamamafa).

O lenei sulufaiga ma le puipuiga e maua e ala i le ola ai i le talalelei a Iesu Keriso ao tatou “suesue i nei poloaiga” (MF&F 1:37). O le mea lea, sei o tatou iloiloina ni mataupu faavae o loo maua i le Mataupu Faavae ma Feagaiga na,

pe a malamalama i ai ma ola ai, o le a aumaia ia i tatou le puipuiga ma o le a avea ma sulufaiga mai i faaososoga, mea leaga, ma isi tulaga lamaitia o tatou feagai ai i le aso.

E Puipuia i Tatou ao Tatou Sailia le Agaga Paia

O le mauaina o le Agaga Paia faatasi ma i tatou e mafai ona avea o se sulufaiga ma se puipuiga mai le lalolagi. Na folafola mai le Alii e faapea afai o le a “toaga i ai” Oliva Kaotui i le meaalofa o faa-aliga, “o le a laveai ai oe i fafo mai lima o ou fili, lea a na le faapea, po ua latou fasioti ia te oe ma aumai lou agaga i le faafanoga” (MF&F 8:4). Ia matauina lena mea e ala i le

leo o le Agaga, e mafai ona puipuia Oliva Kaotui mai le otia mai le agasala.

O le mauaina o le upumoni e ala i le mana o le Agaga Paia o le a puipuia ai foi i tatou mai manatu o tagata ma pepelo ma taufaasese a Satani. Na folafola mai e le Alii e faapea “o i latou o e e popoto ma ua latou talia le upumoni, ma *ma ua latou ave le Agaga Paia mo o latou taiala*, ma sa lei faaseseina—e moni Ou te fai atu ia te outou, o le a lē tattuuina i latou i lalo ma lafo i le ahi, ae o le a latou gafatia le aso.” (MF&F 45:57; faaopoopo le faamamafa). E tusia e le mana o le Agaga Paia le upumoni i o tatou loto ma puipuia i tatou mai le faaseseina.

Ae o le faalogo i musumu-suga a le Agaga e le faapea o le a puipuia ai i tatou mai faigata uma lava. O loo faaalia mai e le Vaega 122 o le Mataupu Faavae ma Feagaiga e faapea e tusa lava pe agavaa, e mafai lava ona tatou feagai ma faanoanoaga ma luitau. I le silafaga ma le atamai o le Atua, "Ua silafia e le Atua ia mea uma" (MF&F 127:2), "o nei mea uma [tatou] te maua ai le poto masani, ma o le a avea mo [o tatou] lelei" (MF&F 122:7).

E Puipuia i Tatou ao Tatou Mulimuli i Perofeta Soifua

I le aso na faatulaga ai le Ekalesia, na poloaiina ai e le Alii Lana Au Paia e faalogo i le perofeta:

"Ia outou uai atu i ana upu uma ma poloaiga o le a ia tuu atu ia te outou e pei ona maua e ia, ma savavali i le paia atoa i o'u luma;

"Ona o lana [le peresitene o le Ekalesia] upu ia outou talia, e pei lava ua mai i lo'u lava gutu, i le onosai ma le faatuatua atoa.

"Aua o le faia o nei mea o le a le manumalo ai faitotoa o seoli ia te outou; ioe, ma o le a faamataae e le Alii le Atua le malosi o le pouliuli mai o outou luma, ma luluina le

lagi mo lo outou lelei, ma le mamalu o lona suafa" (MF&F 21:4–6).

Ua tau mai e le Alii ia i tatou i le Mataupu Faavae ma Feagaiga e faapea "o i latou o e e lē fia faalogo i le siufogaga o le Alii, po o le leo o ana auauna, pe lē gauai *i upu a perofeta ma aposetolo*, o le a vavae ese mai totonu o le nuu" (MF&F 1:14; faaopoopo le faamamafa).

O le faalogo ma faaaoga aoaoga a perofeta soifua o le a aumaia le puipuiga ma le saogalemu, aua latou te sau-noa i o tatou faafitali o aso nei ma tau mai ia i tatou mea tatou te manaomia ona fai e manumalo ai i nei luitau. Oka se faamanuiaga ofoofogia o le i ai o ni failauga soifua a le Alii.

I le Mataupu Faavae ma Feagaiga 101:43–62, o loo faaaogaina e le Alii se faataoto e uiga i se tovine e faaalia ai le taua o le faalogo i se perofeta soifua. O loo faatusa e le faataoto le perofeta i se tagatavaai i luga o se olo. I aso anamua na fausia ai e tagata ni olo lea e mafai ai e se tagatavaai ona vaai i tua atu o le aai ma lapataia tagata pe a lata mai le fili.

E amata le faataoto: "Fausia se olo, ina ia mafai e se toatas

O aoaoga i le Mataupu Faavae ma Feagaiga e mafai ona puipuia ai i tatou mai faigata o le a tatou feagai ai ao tatou sauniuni mo le Afio Mai Faalua o le Alii.



ona vaavaai atu i le fanua faataamilo, e *avea o se leoleo i luga o le olo*, ina ia le gauia i lalo o'u laau olive pe a sau le fili e faaleaga ma ave mo i latou lava le fua o lo'u tovine" (fuaiupu 45; faaopoopo le faamamafa).

Na aoao mai Elder M. Russell Ballard o le Korama a Apostolo e Toasefululua e uiga i le puipuiga ma faamanuiaga na e oo mai i le mulimuli i le fautuaga a se perofeta soifua: "O se mea maoae, ou uso e ma tuafine, le i ai o se perofeta a le Atua faatasi ma i tatou. . . . Afai tatou te faalogo i le

fautuaga a le Alii ua faailoa mai e ala i upu a le Peresitene o le Ekalesia, o la tatou tali e tatau ona sao ma vave. O loo faaalia i le talafaasolopito e faapea, e i ai le saogalemu, filemu, manuia ma le fiafia i le tali atu i fautuaga faaperofeta."¹

E sili atu le taua o le puipuiga faaleagaga nai lo le puipuiga faaletino lena e oo mai i le faalogo i perofeta. E matuai manaomia lava, aua "Ua saili foi Satani e faasese outou, ina ia mafai ona ia faatoilalo outou" (MF&F 50:3). O le faalogo i perofeta e puipuia ai i tatou mai manatu o le lalolagi ma "le taufaasese poto o tagata, lea ua latou taooto faapupuna ai e faasese," (MF&F 123:12).

E Puipuia i Tatou ao Tatou Faamaoni i Faaipoipoga

Ua folafola mai e le Alii ia i tatou e faapea o le feagaga fou ma le faavavau o le faaipoipoga e mafai ona faavavau (tagai i le MF&F 132:19). O lenei aoaoga faavae o le faaeaga o se sulufaiga mai i sootaga taufaasese lea ua taatele i lo tatou lalolagi. E ui i le tele o leo o le lalolagi o loo faapea mai o le faaipoipoga o se faiga tuai, e le talafeagai pe

le manaomia, ua folafola mai e le siufofoga o le Atua, "Ai se na te faasa le faaipoipo ua lē faauuina o ia e le Atua, ona o le faaipoipoga ua faauuina e le Atua mo le tagata" (MF&F 49:15).

Ua aoao mai i tatou e le Alii pe faapefea ona puipuia a tatou faaipoipoga, "Ia e alofa i lau ava ma lou loto atoa, ma ia e pipii atu ia te ia ae lē o se isi" (MF&F 42:22).

Na faamatala mai e Petersitene Spencer W. Kimball (1895–1985) le natura atoa lava o lenei poloaiga:

"Ma a fetalai mai le Alii o lou loto *atoa* e leai lava ma se faatagaga po o se avanoa e faasoa ai pe vaelua, pe faaogeia foi. Ma, i le tamaitai ua faaupuina faapea: 'Ia e alofa atu i lau tane ma lou loto *atoa* ma pipi'i atu ia te ia ae le o se isi.'

"O upu *ae le o se isi*, e tuu ese ai tagata uma ma mea uma. O le toalua la o le faatumutumuga lea o le olaga o le tane po o le ava, ma e le mafai e le olaga tafao po o le olaga faigaluega po o le olaga faaupufai po o se isi mea lava ona suitulaga i luma atu o lau soa, o lou toalua."²

O mea tatou te vaai i ai e aafia tele ai i tatou mo le lelei po o le leaga. Ou te

manatu o le mafuaaga lena ua lapataiina ai i tatou e le Alii i le fuaiupu lenei: "O ia o le e *vaai* atu i se fafine i le manao ia te ia, o le a faafiti e ia le faatuatua, ma o le a lē maua e ia le Agaga; ma afai e lē salamo o ia o le a tuli o ia i fafo" (MF&F 42:23; faaopoopo le faamamafa).

Ina ia puipuia mai osofiga a le fili, e tatau ona tosina atu o tatou mata ma loto tau lava o o tatou toalua ma le Alii. E le tatau ona tatou faatagaina o tatou mata e fetilofai pe manao atu i se tasi e ese mai o tatou toalua. Tatou te manaomia ona loka o tatou loto ma mafaufau ina ia puipuia mai lena faaosoosoga. O le fua lenei a le Alii mo le faamanuiaina i le faaipoipoga.

E Puipuia i Tatou ao Tatou Auauna atu i se Misiona

E tele o tatou avanoa e auauna atu ai i le Eklesia, ma o le Alii "[e] fiafia e faamamalu i latou o e e auauna ia te [Ia]" (MF&F 76:5). O loo aoaoina ni mataupu faavae sili i le Mataupu Faavae ma Feagaiga e uiga i auaunaga faamisiona.

Ua folafola mai le Alii e faapea "Ma o soo se tagata e alu atu ma talai atu lenei talalelei o le malo, ma lē vaivai

e tumau pea i le faamaoni i mea uma, o le a lē vaivai i le mafaufau, pe faapouliuligia, pe i le tino, itutino, po o soogaivi; ma o le a lē pa'ū se lau o lona ulu i le eleele e aunoa ma le lē iloa. Ma o le a latou lē o fia aai, pe fia feinu" (MF&F 84:80). Ia matauina e le o faasaoina i tatou e le Alii mai faigata ae ua folafola mai o le a tatou i ai i Lana tausiga mamana.

Na Ia faaopoopo mai, "O le a Ou i ai i lo outou lima tau-matau ma lo outou agavale, ma o le a i ai lo'u Agaga i o outou loto, ma sio faataamilo outou e a'u agelu, e sapasapai outou i luga" (MF&F 84:88). Afai tatou te auauna atu ia te Ia, "Ma o le a oo mai o le a tumau le mana i ou luga; o le a ia te oe le faatuatua tele, ma o le a Ou faatasi ma oe, ma muamua atu i ou luma." (MF&F 39:12). O i latou e auauna atu faamisiona ma o latou loto atoa ua i ai le folafolaga faapea o le a latou "manuia faaleagaga ma faale-tino," (MF&F 14:11).

Ua faalauteleina foi e le Alii lenei puipuiga i aiga o i latou o e auauna atu: "O A'u, o le Alii, Ou te tuu atu ia i latou se folafolaga o le a Ou tuu atu mea mo o latou aiga; o le a tatalaina se faitotoa aoga mo i

latou, mai le taimi lena i luma" (MF&F 118:3).

Ma ua folafolaina i faifeau-talai faamaoni faapea "ma ua faamagaloina oe i au agasala, ma o le a faafafa ia te oe i fusisaito e tele i luga o lou tua," (MF&F 31:5). O lenei faa-manuiaga o se sulufaiga mo o tatou agaga.

E Puipuia i Tatou ao Tatou Usiusitai i le Tulafono o le Sefuluai

Ua tatou maua le aoaoga lenei e faatatau i le sefuluai i le Mataupu Faavae ma Feagaiga: "Faauta, ua ta'ua nei o le asō seia oo i le afio mai o le Atalii o le Tagata, ma e moni o se aso o le taulaga, ma o se aso mo le totogiina o le sefuluai e lo'u nuu" (MF&F 64:23).

Ou te fia faapea atu o le tulafono o le sefuluai e faafeagai i le faamatematika aua o le 90 o le a sili atu nai lo le 100. Ao tatou tuuina atu i le Alii le 10 pasene o la tatou tupe maua, ua Ia folafola mai e "toina pupuni o le lagi, ma sasaa atu le manuia mo outou, ina seia silisili ona tele" (Malaki 3:10; tagai foi i le 3 Nifae 24:10).

Ina ia iloiloina pe o le a le malosi o lo tatou faatuatua, e mafai ona tatou vaai i o

*E pei o tagatavaai i luga o se
olo, o perofeta e vaai mamao
atu ma lapatai atu o le fili ua
lata mai.*



tatou uiga faaalia i le tulafono o le sefuluai. O le totogiina o le sefuluai e le o se fesili i tipe; o se mataupu tau i le faatuatua.

Ua aoaoina i tatou e Peresitene Henry B. Eyring, le Fesoasoani Muamua i le Au Peresitene, “E ala mai i a tatou filifiliga i le taimi nei, ia avea ma se tagata e totogi atoa le sefuluai, ma a tatou taumafaiga tumau e usitai, o le a faateleina lo tatou faatuatua, ma e i ai le taimi e faamalūlūina ai o tatou loto. O le suiga lena o o tatou loto e ala i le Togiola a Iesu Keriso, e sili atu nai lo le ofoina atu o a tatou tupe po o mea e maua, e mafai ai e le Alii ona folafola mai ia i latou o e totogi atoa sefuluai le puipuiga i le aso gataaga. [tagai MF&F 64:23]. E mafai ona tatou maua le faamautinoaga o le a tatou agavaa mo lena faamanuiaga o le puipuiga pe a tatou tautino nei e totogi atoa le sefuluai ma ia tumau i le faia o lena mea.”³

E Puipuia i Tatou ao Tatou Usiusitai i le Upu o le Poto

Ua tatou ola i se taimi ua lamatia ai lo tatou soifua maloloina e le tele o mea faataumaoi. I le silafia ai e le Alii, o mea ua tatou feagai ai, na

aoaoina ai le Perofeta o Iosefa Samita i le 1833 e faapea “Ona o mea leaga atoa ma togafiti ua faia ma o le a tupu pea i loto o tagata faatuputupu leaga i aso e gata ai, ua ou lapataia ai outou, ma muai lapataiina outou, i le tuuina atu ia te outou o le poto lenei i se faaaliga” (MF&F 89:4).

O i latou o e usitai i le tulafono a le Alii mo le soifua maloloina “o le a latou maua le maloloina i o latou pute ma le su i o latou ivi; ma o le a latou maua le poto ma oa silisili o le malamalamā, o oa natia lava; ma o le a taufetuli ae le vaivai, ma o le a savavalī ae le matapogia [soifua maloloina faaletino].”

Ma ua folafola mai e le Alii le saogalemu ia i latou o e tausia lenei tulafono: “Ma o A’u, o le Alii, Ou te tuu atu ia te i latou se folafolaga, e faapea o le a laaloa le agelu o le faafanoga ia te i latou, e pei o le fanauga a Israaelu, ma lē fasia i latou.” (MF&F 89:18–21).

O lenei folafolaga e le faapea o le a tatou le feoti, aua o le otī o se vaega o le fuafuaga e faavavau. Ae “o le agelu o le faafanoga, o ia lea e sau e faasala i e amioletonu ia latou agasala, e pei o ia i taimi anamua na taia ai tagata

Aikupito le faamaoni i la latou amioleaga [tagai Esoto 12:23, 29], o le a laaloa i le Au Paia.”⁴

E Puipuia i Tatou ao Tatou Tutu i Nofoaga Paia

Ua poloaiina pea lava pea i tatou e le Alii ia “tutu i nofoaga paia” (tagai MF&F 45:32; 87:8; 101:22). E mautinoa lava o o tatou malumalu o nofoaga paia. Na aoao mai Peresitene Iosefa Filitia Samita (1876-1972):

“Afai tatou te malamalama i le mea ua tatou faia, ona avea lea o le faaeega paia o se puipuiga ia i tatou i o tatou olaga atoa—o se puipuiga e le maua ese tagata e le alu i le mamalu.

“Na ou faalogo i lou tama o [Peresitene Iosefa F. Samita] o fai mai faapea, i le itula o tofotofoga, i le itula o faaosoosoga, na te mafaufau ai i folafolaga, o feagaiga sa ia faia i le Maota o le Alii, sa avea ma puipuiga mo ia.”⁵

E faatasi ai ma malumalu, o faletatalo ma potuaoga o falelotu o le Ekalesia ma o tatou aiga ua faapaiaaina, o ni nofoaga paia. O nei nofoaga e paia pe afai o tagata e faaaogaina e mama i le loto ma ola i poloaiga a le Atua. Pe afai tatou te tausia poloaiga, tatou te olioli i le mafutaga,

taitaiga, ma le mafanafana o le Agaga Paia. Afai e mafai ona avea o Ia ma a tatou soa tumau, ona mautinoa lea o le a tatou tutu i nofoaga paia.

Faaiuga

Ua tatou vaai i le Mataupu Faavae ma Feagaiga i ni vaega eseese o puipuiga na e tuuina mai e le talalelei a Iesu Keriso ia i tatou pe a tatou saili e aoao ma ola i nei mataupu faavae. E mafai ona tatou fesili po o fea e maua ai lenei puipuiga.

Na faaalia e le Alii, Lona alofa ma le alofa mutimutivale i le Au Paia, na folafola mai o le a Ia faatasi ma i tatou “Ia fiafia, le fanau iti e; ona ua Ou i ai i lo outou lotolotoi, ma Ou te lei tuulafoaia outou” (MF&F 61:36). “Faalogo mai, . . . ua fetalai mai ai le Alii lo outou Atua, o Iesu Keriso lava, lo outou fautua, o lē ua silafia vaivaiga o le tagata ma le ala e fesoasoani ai ia i latou o e ua faaosoosina.” (MF&F 62:1).


Pe a tatou faaaogaina le Togiola ma aoaoga a lo tatou Faaola o Iesu Keriso i o tatou olaga, e mafai ona tatou maua le puipuiga ma le sulufaiga lena e tuuina mai ia i tatou le malosi e faamama ai a tatou

avega, faatoilalo a tatou agasala ma faigata, ma faia i tatou ia avea ma Au Paia. ■

E alala le tusitala i Curitiba, Pasila.

FAAMATALAGA

1. M. Russell Ballard, “O Lana Upu o le a Outou Talia,” *Liahona*, Iulai 2001, 80.
2. *Aoaoga a Peresitene o le Ekalesia: Spencer W. Kimball*, (2006), 223.
3. Henry B. Eyring, “Sauniuniga Faaleagaga: Ia Amata Vave ma ia Tumau Ai,” *Liahona*, Nov. 2005, 40.
4. J. Reuben Clark Jr., i le Ripoti o le Konafesi, Oke. 1940, 17; tagai foi *Mataupu Faavae ma Feagaiga Tusi Lesona a Tamaiti Aoga* (Church Educational System manual, 2001), 211.
5. Joseph Fielding Smith, “The Pearl of Great Price,” *Utah Genealogical and Historical Magazine*, Iulai 1930, 103; tagai foi *Mataupu Faavae ma Feagaiga Tusi Lesona a Tamaiti Aoga*, 259.



FAASOAINA ATU O LE ALOFA O LE FAAOLA I LE KERISIMASI

Sa ou fiafia lava e auai i le faalauiloa sa le Ekalesia i le 2016 "Faamalamalama le Lalolagi" Sa ou tulimatai atu i le faamaeaina o luitau o aso taitasi, ae maise lava mo le aso lima: "Na fesoasoani Iesu i e mamai, e mafai foi ona e faia."

O lena aso na ou tuua ai le galuega ae savali atu i le aai lanu efuefu ma se fuafuaga e asiati atu i ou matua matutua. Sa ou matuai fiafia lava. O le taimi lea o le Kerisimasi ma sa matagofie le lalolagi. Na lologo le tatagi o le logo o le alofa mama i le ea atoa. Ao ou latalata atu i le nofoaga o le taavale o le auala, na taotaomia i lalo le leo o le logo e se fafine e leai se aiga na ee atu i le tagata ta logo.

"E te pepelo!" na ia ee atu ai. "Ua ou fia ai, ua ou maalili, ae ua e aveina uma lava ma oe! E te pepelo!"

O le toatele o tagata na le amanaia o ia, ma na faaaauau le taina o le logo a le ta logo. Na ou faamauluina au mea faalogo, ae na ou faalogoina pea le ee a le fafine, "E te pepelo! Ua ou fiaai! Ua ou maalili."

Na ou manatuaina sa i ai se pepa 20-tala i lau taga. Na ou mafaufau e tuu atu i le fafine. "Leai," o lou mafaufau lea. "Afai ou te tuuina atu lenei tupe i se tasi, e tatau ona ou tuuina atu i se tasi e lelei." Ona faamanatu mai lea e le Agaga ia te au le luitau ma po o ai lea ou te taumafai e faatai i ai. O Iesu o le Tupu o tupu, ae na Ia auauna atu i e e sili ona maualalo

i e maualalalo. Sa ou iloaina le mea e tatau ona ou faia.

Sa ou savali agai atu i le fafine. Sa lei ee o ia i le taimi lea, ae o ona mata na moeiini ma na tafe mai loimata i lalo o ona alafau. Na ou aumai le pepa 20-tala mai lau taga ma tuu atu ia te ia.

"Faigata le aso?" Sa ou fesili ai.

Sa ia vaai mai i luga ia te au. "Ioe," o lana tala lea.

"Ou te faamalie atu," o lau tala lea. Na ou opo faataamilo ou lima ia te ia, ma na ia tagi i ou tauau seia oo ina taunu mai le taavale o le auala.

"Faafetai lava," na fai mai ai le fafine ina ua ma faatofa. "Ae le na o le mo le tupe. Faafetai lava mo le opo. Sa ou manaomia se opo."

O le opoina o soo se tagata i le auala e le o se mea na ou fuafuina e fai, ae na ou iloaina o se mea e ono faia e Iesu. Ou te faafetai na tuuina mai e le Alii ia te au le avanoa e auauna atu ai e pei o le mea Na te ono faia. Na fesoasoani Iesu i e mamai, i e matitiva, ma e na manaomia le fesoasoani. E mafai foi ona ou faia. ■

Jordan Wright, Iuta, ISA



Sa ou savali agai atu i le fafine. Sa le i ee o ia i le taimi lea, ae na tafe ifo loimata i lalo o ona alafau.

Elua ni pusa lapopoa
na tusia ai lou igoa
ae leai se tuatusi e toe
faafoi atu i ai.



AFIFI O LE KERISIMASI MO AU?

Sa ou auauna atu i le Misiona a Kalefonia Sacramento i le taimi o le Kerisimasi o le 2003. Na amata ona maua e lau soa ma isi faifeautalai tamaitai e toalua na matou nonofo faatasi i le fale mautotogi ni meaalofa ma tusi mai o latou aiga ma uo. Na ou iloaina o le a le tutusa lena mea mo au.

Na itiiti ni mea e maua e lou aiga i Atenitina, ma na masani ona tuai mai a latou tusi i le lua i le tolu masina. Na ou mamao ese mai lou aiga, ae na ou fiafia e faaalu le Kerisimasi i le auau-naga a Iesu Keriso.

I le Po o le Kerisimasi, na matou sauni e momoe ae fai mai ia te au se tasi o tamaitai faifeautalai e faapea na tuu e se tasi ni afifi i le faitotoa faatasi ma lou igoa o i luga.

“Mo au? E le mafai!” Sa ou fai atu ai, ma le ofo.

E lua ni pusa lapopoa na tusia ai lou igoa ae leai se tuatusi e toe faafoi atu i ai. Sa ou fiafia, ma na fiafia foi isi tamaitai faifeautalai mo au. Sa ou tatalaina afifi, ia na tumu i meaalofa, lole, ata a tamaiti, ma isi mea! Sa le mafai ona taofiofi ou loimata.

“O ai na ono auina mai ia te au nei afifi?” O ou manatunatuga ia. E leai se tasi o i matou na iloaina, ae ma matou olioli uma lava i le agaalofa.

I ni nai aso ina ua mavae le Kerisimasi, ou te lei iloaina lava po o ai na auina mai afifi. O lea na ou valaau atu ai i le ofisa o le misiona ma fesili i le failautusi pe mafai ona ia tau maia ia te au le igoa faalilolilo o le na auina mai afifi. Na ia tau mai ia te

au faapea o ni tagata i se uarota o e na mananao ia tumau pea le faalilolilo na filifili e auina mai afifi ia te au faatasi ma ni mea o le Kerisimasi. O le a ou faafetai pea mo le agaalofa o le uarota na auina mai se alofa tele naua i lena Po o le Kerisimasi ma le lagolagosua na ou mauaina i le taimi o lau misiona.

Na ou aoaoina e faapea e mafai e tagata taitoatasi o le Ekalesia ona faia faifeautalai—e ui lava e mamao mai aiga—ia lagonaina o loo i ai i le aiga e ala i la latou uunaiga ma le auaunaga. O se tasi lena o Kerisimasi sili o lou olaga. Na ou auauna atu i le Faaola ma na lagonaina Lona alofa e ala i tagata o Lana Ekalesia. ■

Elisabet Andersen Bogado, Neuquén,
Atenitina

KERISIMASI E ALA I FOFOGA O LOU AFAFINE

Na oo mai se mafanafana filemu i lou aiga ma au ao matou savavali atu i totonus o se pa e matamata i se faatinoga o le soifua mai o Iesu. Na tutu ni manu i totonus o pa, ma o se tamaloa ma se fafine, o loo laei e pei o Iosefa ma Maria, o loo tutu ma se pepe o loo aui i se ie o loo siiina e le fafine. Na filemu i latou ma na taulai atu i le tamaititi. Na matuai filemu lava le siosiomaga atoa.

O lau fanau matutua, lou toalua, ma au sa tutu ao saofai lou afafine laitiiti i luga o se taaiga vao mago i luma o i matou. Na le minoi o ia ma filemu, ma na tumau le taulai atu o ona mata i le pepe. Ina ua sauni le vaega o totoe o lo matou aiga e o, na ou tuu atu se lima i luga o le tauau o lou afafine ma musumusu atu ua oo i le taimi e o ai. Na ia fai mai e manao o ia e nonofo ma le pepe o Iesu. Na ootia lou loto i ana upu, ma ou filifili ai e nonofo ma ia.


I ni nai minute mulimuli ane, na ou uuina malie le lima o lou afafine ma tau atu ia te ia ua tatau ona

matou o. Na ia fai mai na manao pea o ia e nofo. Na ou fusi maia o ia ma tootuli i ona tafatata.

E lei leva lava ae ou lagonaina e pei ua ou malaga i tua i le taimi ma na i ai faatasi ma Maria ma Iosefa. Ona ou malamalamai ai lea i le mafuaaga na manao ai lou afafine e nofo. Na ou faalogoina le Agaga ua faatumulia ai au. I lena nofoaga, na ou lagonaina sa ou i ai faatasi ma le Faaola. Na fepulafi mai ni loimata i totonus o ou mata ao ou lagonaina Lona alofa. Ina ua iu lava ina ua oo mai le taimi e o ai, na

ou siiina i luga lou afafine laitiiti. Ao ou liliu atu agai i le ala i fafo, na ou faalogoina o ia ua fai atu i le pepe o Iesu tofa ma le tele o lona alofa mo Ia.

O lena afiafi na ou faasoaina ai se aafiafaa faatasi ma lou afafine lena o le a ou teufatuina mo le taimi o totoe o lou olaga, ae na toeitiiti lava a ou misia. O lena po, na tuuina mai ai ia te au se meaalofa. Na ou lagonaina le latalata atili atu i le Atua ma lagonaina Lona alofa mo au. Ou te faafetai mo



Na le minoi ma filemu lou afafine, ma na tumau le taulai atu o ona mata i le pepe o lesu.

O SE MEAALOFA A LE AIGA MO LE FAAOLA

le Faaola ma le avanoa e manatua ai Lona soifua mai. Ou te iloaina o le soifuaga, faataitaiga, ma le Togiola a le Faaola o loo i ai se meaalofa ofo-ofogia o le alofa e-le-iu mai le Atua i Ana fanau uma lava. O le a ou teufatuina pea lenei meaalofa i le loloto o lou fatu. ■

Aaron Adams, Karolaina i Saute, ISA



Ao latalata mai Tesema, sa ou pisi lava i le sauniuniga mo le taimi pisi o le vaitau o le Kerisimasi. Mo le fa tausaga, sa faia ai faafiafiaga o le Kerisimasi i lo matou fale, ae o lenei tausaga ua ou lagonaina ai le loftuina. Ina ua ma talanoaina ma lou toalua mea uma sa matou manaomia e fai—faatau meaalofa, saunia meaai, ma faia le tele o isi mea—na ma filifili e faapafala le fiafia o le Kerisimasi ae fai se mea fou i lenei Kerisimasi. Na ma mananao e fai se mea lena e mafai ai ona matou tuuina atu se meaalofa i le Faaola.

Ia Tesema atoa, na matou faia ai ni afiafi faaleaiga e uiga i le soifuaga o Iesu Keriso, o i le malumalu, ma fuafua ni galuega auauna atu faaleaiga e fai. Na epikopo lou toalua i le taimi lea, ma na ma filifili e faapea i le Aso Kerisimasi, o le a matou pepese mo tina uma ua maliliu a latou tane i le uarota. Na amata ona matou faataitaia ni nai viiga o le a matou usuina, o se aiga. Na fiafia lau fanau e usu le "I se Faatanoa Vao" (*Viiga*, nu. 117).

I le Po o le Kerisimasi, na matou faia ni kata faatasi ma ni savali faapi-toa o le Kerisimasi ma saunia ni meaai mama e ave i a matou asiasiga. Na ou fiafia lava e vaai atu i lo matou aiga ua matuai lotogatasi lava ma fiafia e auauna atu i isi faatasi ma lea ituaiga o alofa. Sa mafai ona ou lagonaina le agaga o le Kerisimasi.

I le Aso o le Kerisimasi, na naunau lava le ma fanau e faia asiasiga. I aiga taitasi na matou asia, na faateleina lo matou fiafia, ma na foliga mai na faa-solo ina sili atu le lelei o pese i taimi uma lava na matou pepese ai. Ina ua matou taunu atu i le fale mulimuli, na foliga mai e leai se tasi o i le fale. Na matou faatalitali mo ni nai minute, ma na amata ona feminoiai tamaiti. Na iu lava ina sau se tina ua maliu lana tane i fafo e faafeiloai i matou ma ona ofu Lotu ua fai faatasi ma lona lauulu ua selu matagofie lava. Ina ua ia vaaia i matou, na faatumulia ona mata i loimata. Na ou ootia foi ma na tau le mafai ona ou pese.

Ao matou toe foi atu i le fale, na fai mai le ma tama teine e lima-tausaga-le matua ia i matou e lei manao o ia e alu i le fale ae na manao e faaaauau pea ona pepese. Ae ou te lei tali atu, na fai mai le ma iva-tausaga-le-matua, "Ia tatou toe faia foi lena mea i le isi tausaga!"

Mo lo matou aiga, o se Kerisimasi lenei e le mafai ona faagaloina aua na matou siitiaina isi ma faaali atu lo matou alofa mo Iesu Keriso. Ao ou toe mafaufau i mea na tutupu o le aso, na ou lagonaina le alofa o le Alii ma manatuaina Ana upu, "Aua na faia e outou i le tasi o e aupito itiiti o ou uso nei, o au lea na outou faia i ai" (Mataio 25:40). ■

Maria Aparecida da Kiyama Silva,
São Paulo, Pasila



O le faapaiaina o le Malumalu o Philadelphia Pennsylvania i le 2016 na tuuina atu ia Josephine le avanoa e auai faalevaiaso. Na te mauaina le malosi ma le faamalologa i totonu o le malumalu mo le feagai ai ma faigata o le olaga.

LESLIE NILSSON, TAGATA PUEATA

Josephine Scere

Penisilevania, ISA

Na ou fanau mai i le taimi o le faigata. O lou tina o se tagata na malaga mai Liberia, na matou matitiva, ma na sauaina au o se tamaitiiti ao tuuina e tausia e tagata na faapea lou tina na te talitonuina. O lena mea na avea ai ni mea faapitoa ma ni mea faigata lava i lou olaga.

O le mea na faatumauina ai lou naunau tele e ola i le talalelei o ou puapuaga.

E faigata le olaga e tusa lava po o oe o se Au Paia o Aso e Gata Ai pe leai. Ou te maua lou malosi mai le i le ma sootaga ma lou Faaola faapea ma lau tama tama, o Enoka. O le tausia o feagaiga na ou faia i le malumalu e tuuina mai foi ia te au le malosi.

O le upumoni o le upumoni, i soo se tulaga. E le moomia lou finau i ai. E le moomia lou faamaonia. E moni lava. E moni, ma e moni mo tagata uma. E moni mo tagata o loo nonofo i le Aai o Sate Leki, luta, ma e moni mo tagata o e nonofo i nuu matitiva o Philadelphia. Ou te manatu o le mea lena e tatau ona uunaia i tatou.

O Loo | Ai Taleni i Monokolia!

Saunia e Po Nien (Felipe) Chou,
Petra Chou, ma Odgerel Ochirjav

Na ausia e se aufaipese mai Siteki a Ulaanbaatar Monokolia i Sasa ma Sisifo le tauvaga mo le tauvaga faaiu o le faaaliga i le televisa a le atunu o le *O Loo | Ai Taleni i Monokolia*. O le aufaipese—e i ai tamaiti aoga o le seminare ma le inisitituti, o le afa o i latou ua maea mai misiona—e lei mafaufaufina lava o le a latou maua lenei ituaiga o avanoa e faasoat atu ai o latou talitonuga ma taleni.

Na asiasi atu se Fitugafulu Eria i Monokolia i le 2015 ma saunia se aoaoga e uiga i taumafaiga o le va i fafo o le Ekalesia. Na le mautinoa e Odgerel Ochirjav, le peresitene o le Siteki a Ulaanbaatar Monokolia i Sisifo pe faapefea ona faatinoina. Ona oo lea ia Ianuari o le 2016 ae valaau mai lona uso faaletulafono ma faapea mai, “Na ou matamata i le *O Loo | Ai Taleni i Mongolia*. . . . Sa ou maua se lagona malosi lava e faapea e tatau ona auai lau aufaipese o le Lotu.”

Na talanoaina e Peresitene Ochirjav le manatu faatasi ma le faatonu o le aufaipese, o Sister Unurjargal Purev. Na matuai fiafia lava o ia [le faatonu] ma tagata o le aufaipese e uiga i le avanoa. Na lauiloa le aufaipese o le

Siona, po o “SION,” o se faapuupuu i le faaMonokolia mo le *agaga, faatua-tua, mafaufau*, ma le *lototasi*.

O Le Taamilosaga Muamua

Mo le taamilosaga muamua o le tauvaga ia Mati 2016, na usuina ai e le SION se tuufaatasiga o pese e lua. Na fai mai se tasi faamasino, “Ou te vaai atu i o outou foliga ua susulu! . . . Tatou te manaomia le tuu o la outou vitio i luga o le YouTube e faailoa atu ai lenei faaaliga i le lalolagi.”

O se isi faamasino na fesili atu po o le a le latou mea o le a fai pe afai latou te manumalo i le faailoga maoae o le I.S. \$50,000. Na ootia o ia ina ua latou fai mai latou te mananao e foai uma atu, o se meaalofa faapitoa o le Kerisimasi, i se nofoaga mo tamaiti e leai ni aiga.

O Le Taamilosaga Lona Lua

Mai le 400 na auai, o SION na i totonu o le 200 na oo atu i luga i le taamilosaga lona lua, ae o la latou pese na faatulagaina mai mo le aso lava lea e tasi o le konafesi tuufaatasi a le autalavou, lea e aafia ai le afa o tamaiti o le aufaipese e toa 35. Na filifili le aufaipese e o i le taamilosaga lona lua, o lea na latou totogia ai se pasi ma, ina ua uma la latou pese, na malaga atu mo le valu itula i le konafesi a le autalavou.

E na o ni nai tagata lava o Monokolia e iloa e uiga i le Ekalesia, ae o lenei aufaipese na fesoasoani e suia lena mea.

Mai le 200 aufaipese, o SION na i totonu o le 32 na o atu i luga i le toe tauvaga mo le sailiga o le 2 mo le tauvaga faaiu. Na amata lauiloa le aufaipese i luga o agafesootai e faataau i le *O Loo | Ai Taleni i Monokolia*.



O Tauvaga mo le Tauvaga Faaiu

Na latou faataitai mai ia Iuni ia Setema e saunia ai mo le tauvaga mo le tauvaga faaiu. I le aso o le tauvaga, na latou feala i le 4:00 i le taeao i le -29 tikeri F (-34 tikeri C) o le tau. Na fai mai Sister Nomuungerel Enkhtuvshin, o se tasi o le aufaipese, "O le toatele o le matou vaega na maua i le fulu. Ae na latou faasolo ina manuia ao matou tatalo mo i latou."

Na maimoa mai tagata i Monokolia atoa i le faaaliga ma tesi mai a latou palota.

Na faapea mai Brother Shijir Purevdorj, "O se taunuuga o lenei faaaliga i le Televise, e toatele tagata ua attina ae se uiga lelei agai i le Ekalesia."

O Faamanuiaga

Na maua foi e tagata o le aufaipese ni faamanuiaga. Na saunoa mai Brother Odgerel Tumursukh, "Na matou tuuto atu la matou gauai ma le

taimi mo se tausaga atoa ao faia foi a matou galuega ma isi vaega o o matou olaga. E ui lava na faigata, ua matou mauaina le tele o faamanuiaga. Ua ou aoaoina le puleaina o lou taimi ma faia osigataulaga mo le Alii."

I le faaopoopo atu i le faateleina o lo latou faatuatua, na maua e tagata o le aufaipese le loto-talitonu, attina ae faigauo, ma aoaoina le lotogatasi. "O le pepese i le aufaipese na fesoasoani ia i matou e aoao ai pe faapefea ona faamagalo atu ma lagolagoina le tasi ma le isi," na saunoa ai Brother Ganbaatar Ulziiduuren. "Ua sili atu ai lo matou lotogatasi." Na aoaoina e Sister Bilguunzaya Tungalagtuu, "e faapea e le tatau lava ona ou masalosalo ia te au lava ia pe manatu faapea ou te le mafai ona faia se mea."

Na saunoa Brother Bayartsogt Lhagvajav, "O le pepese i le aufaipese ua aumaia le tele o faamanuiaga i lou aiga, ma ua fesoasoani foi ia te au ia maua ai tali na ou sailia mo sina taimi. Na ofo mai e o matou taitai ni tali. . . .

Ua faamaonia ai lau molimau e faapea o o tatou taitai ua valaauina e le Atua."

"Ina ua ou auai i le *O Loo I Ai Taleni i Monokolia*," na faamatala ai e Sister Onon Dalaikhuu, "Na ou aoao ai o le faamalosiau ma le lagolago a le tasi ma le isi [o le] ki lea i lo [matou] manuia." O tiutetauave a Sister Dalaikhuu e aofia ai le faatulagaga o le aufaipese, lea na fesoasoani e faamalosia ona tomai faaletaitai. Na ia faaopoopo mai, "Na matou lagonaina [o le] Alii na taitaia ma uunaia i matou. O le toatele o i matou na mamai, pisi, le lavava, ma lagonaina le lofituina. Ae ui i lea, pe a matou tatalo faatasi, e i ai se ala matou te maua ai le mana sili atu ma le manao ia tumau."

E ui e lei lava palota na mauaina e le aufaipese e see atu ai i le faaiuga, o a latou faatinoga na tuuina atu ai i le Ekalesia le faalauiloa sili i Monokolia atoa. Ua faamatala mai e Peresitene Ochirjav, "Na matou usiusitai i se tofiga mai o matou taitai perisitua, ma na saunia e le Alii le ala. . . . Ua talanoa nei le aai atoa [Ulaanbaatar] e uiga i le auai o le aufaipese

Mamona i le *O Loo I Ai Taleni i Monokolia*." ■

*E alala tusitala
i Iuta, ISA, ma
Ulaanbaatar,
Monokolia.*

O Lau Meaalofa i le Faaola

Saunia e Cherstan Pixton

Ematuai malulu lava Rusia i le taumalulu ma e masani lava ona puaoa, ma pogisa aso ma e pei e faanoanoa. O le taufaaiuga o Novema ma e faaopoopo atu i le leaga o le tau, na ou lagonaina le tuuatoatasi, le le agavaa, ma le le mafai ona avea ma se faifeatalai lelei. Sa faatoa tofia lava au e aaoaina se soa fou, ma ao avea Sister Hart o se tagata lelei, ua pau nei i ou luga le mamafa o le aaoaina ia sili atu ona lelei le gagana, avea o se faataitaiga, ma sailia se tasi—soo se tasi—e aaoa.

Faatoa ma maua lava le tala e faapea o le a faia e la ma peresitene fou o le misiona se konafesi a le sone i Yekaterinburg, e lima itula mai la ma eria o Perm. I le taeao po lava o se taeao malulu o Tesema, na ma o atu ai ma Sister Hart i le nofoaga o nofoaafi.

Ao ma faatalitali na ou mafaufau loloto i lagona sa ou mauaina. Na ou mafaufau i aso malolo o le a oo mai ma lou naunau e fia faatasi ma lou

aiga. O le fiafia ia i ai i se misiona ua mou atu ma o lenei ua foliga mai e lei tele ni mea na ou ausia o se faifeatalai i lou iva masina i le galuega. Mulimuli ane na tatagi mai le valaau o le taunuu mai o la ma nofoafi, o lea na ma ulufale atu ai loa ma nonofo i o ma nofoa. Na ou mafaufau au lava i le Faaola. Na moeiini ou mata ma tatalo ina ia mafai ona ou iloaina pe faapefea ona ou aveesea nei lagona ma taulai atili atu ia te Ia.

I le konafesi a le sone i le aso na sosoo ai, na matagofie le saunoaga a Peresitene Rust ma na lagonaina e le loto. Ina ua tulai Sister Rust e saunoa, na ia faasoa mai se tala faigofie lava e uiga i le ala e avea ai le Faaola ma leoleo mamoe lea o le a alu atu ma saili le mamoe e tasi lea na se ese ma toe aumaia lena mamoe i le lafu. Na ia talanoa e uiga i taulaga na faia e le Faaola mo i tatou, ma faai i lona tuuina mai o se molimau mamana lava i le avanoa ua matou maua o ni

**Na ou lagona
le le agavaa o se
faifeatalai. O le a
se mea e mafai ona
ou faia e taofi ai le
taulai ia te au lava ia
ae amata ona taulai
atu i le Faaola?**

faifeatalai e auauna atu ai ia te Ia e ala i le aumaia o Ana mamoe ua se i le lafu. Na luiina i matou e Sister Rust e mafaufau po o le a le meaalofa e mafai ona matou tuuina atu i le Faaola mo le Kerisimasi.

Ina ua ia tuuina mai lena luitau, na ou lagonaina le uunaiga e sili ona malosi o le meaalofa e tatau ona ou tuuina atu i le Faaola o le tau lava o le talanoa atu i ni tagata ia sili atu le

toatele. E oo mai i le taimi tonu lava lena, sa ou fefe tele e amata ni talanoaga ma ni tagata e matuai le masani ai lava—ae maise lava i le faaRusia! Ou te lei manao ia latou manatu ou te valea mo le le malamalama ia i latou, o lea na faigofie atu ai le aua le fai atua se tala lava e tasi. E ui i lea, na ou iloaina, i le taimi lava lena, le mea tonu lava ou te manaomia e fai. Na ou manaomia le taofi o le mafaufau ia te au lava ia ae amata ona mafaufau i ou tuagane ma uso. Na ou setiina se sini e talanoa atu i se tasi e uiga i le talalelei i taavale taitasi ou te alu ai mo le taimi o totoe o le masina ma ia tuuto atu lena mea o lau meaalofa o le

Kerisimasi i le Faaola.

Ina ua ma ulu atu ma Sister Hart i le isi nofoaafi e toe foi i Perm i le taeao na sosoo ai, na ou amata i lau sini e ala i le talanoa atu i tagata na ou nofo ai i tafatafa. Latou te lei fafia tele mai i le mea na ou tau faasoa atu, ae o le mea sili na ou taumafai!

Na ou tauivi i aso taitasi ao ou galue e tuuina atu lau meaalofa i le Faaola, ae na faifailemu lava ona ou lagonaina e au lava ia le sili atu ona fafia ma sili atu le mautinoa—na ou lagonaina ua sili atu lou faataunuina o lou valaauga o se faifeautalai. Na oo mai ma alu ese atu le Kerisimasi, ae na ou filifili e faapea o le a ou faaauau pe a ona talanoa i tagata.

Na ou amata
ona talanoa

ia i latou e le gata pe a ma o i taavale laupasese ae faapena foi i auala, i faleoloa, i le faletusi, ma soo se mea lava ma te o i ai.

Ma te lei mauaina se tasi e aoao e ala mai i lou talanoa atu i le tele atu o tagata; ae ui i lea, ou te lagonaina sa ou totoina ni fatu o le talalelei. Na ma faia ni uo fou ma ave pasi, tagata i la matou faleoloa meaai i le lotoifale, ma isi. O le vaega e sili o le taimi pe a matou toe vaai i se tasi, ma te masani lava ona vaaia i latou o ataata mai, ma o i latou o le a muamua ona fai mai ia i maua talofa. E i ai lou faatuatua e faapea o na fatu na ma totoina o le a i ai se aso e fua mai ai pe a oo mai ni avanoa fou mo na tagata e aoao ai e uiga i le talalelei. E galue le Tama Faalelagi i auala laiti ma faigofie, ma o nisi taimi e na ona amata lava i se “talofa” faigofie.

I le mafaufau atu i tua i lena taimi i luga o le nofoaafi i Yekaterinburg, ua ou iloaina ai na tali mai e le Tama Faalelagi lau tatalo. Na ia fesoasoani ia te au ia vaaia e faapea

o le galuega faafaifeautalai e le faatatau ia te au—e faatatau i isi, ma pe a tatou tuuina isi e faamuamua ia i tatou lava ma o tatou popolega ma faanoanoaga, tatou te mauaina le fafia o loo tatou sailia uma lava. E ofoofogia ia te au le ala e tuuina atu ai i le Faaola, aua e tusa lava pe tatou te taumafai e tuuina atu ia te Ia mea uma tatou te mafai, e faamanuiaina i tatou e Ia ma toe tuuina mai ia i tatou e sautuaselau. ■

E alala le tusitala i Idaho, ISA.



O Le Toe Mauaina o Lona Faatuatua

*O le ala e toe foi ai e le faigofie i taimi uma,
ae o loo i ai lava iina.*

Saunia e David Dickson

Mekasini a le Ekalesia

Oupu “[Pauu] ese atu ai i ala faasaina ma [ua] leiloloa.” (1 Nifae 8:28) atonu e le foliga mai e i ai se faamoemoega tele i le toatele o i tatou ao tatou faiatau i ai i le Tusi a Mamona. O le matuai faafeagai a, e moni. E matuai faigofie lava le vaai faalemafaufau i se ituaiga iuga pogisa mo lenei vaega o tagata ua faamatalaina i le faaaliga a Liae i le laau o le ola—le vaega na tofo i le fua ona tuua lea i tua.

Ae o Te Oranoa M., 17 tausaga, mai Niu Sila e ese lona malamalama i ai. “O le mea e uunaia ai au e uiga i lenei mau,” ua fai mai ai o ia, “o le faapea e le o fai mai ua leiloloa i latou e faavavau.”

Okā se vaaiga a maoae! Ma o se vaaiga e sau mai se aafiaga patino. “O au, foi ia, na pau ese mai le Ekalesia,” ua fai mai ai o ia, “ae ua ou mafai ona toe foi mai.”

Mou Ese Atu

Na ola ae Te Oranoa i le Ekalesia ma e talanoa pea e uiga i le mauaina o lana lava molimau ma e oo lava i le setiina o sini faaleagaga. “Ae peitai o lena molimau na faasolo ina maalili,” o lana tala lea.

I nisi auala, sa tutusa ai o ia ma Amoleka, ae maise lava le ala na ia faamatalaina ai o ia lava i tagata o Amonaea: “sa ou faamaaa lo’u loto, ona sa valaauna au i le tele o taimi ae sa ou lē fia faalogo; o lea sa ou iloa

e uiga i nei mea, peitai sa ou lē fia iloaina.” (Alema 10:6).

Mo Te Oranoa, sa i ai se uiga patino o lena mau. “E pei lava o Amoleka, na ou iloaina uma nei mea faaleagaga, ma na tau mai e le Agaga ia te au ia faia ni mea faapitoa, ae ona sa fai si ou loto maaa ma fai si faamaualuga, o le a ou le faia. Mulimuli ane, na pei ua mou ese atu lau molimau.”

I le iuga, na sili atu nai lo le na ona masani Te Oranoa i le tala a Amoleka. Na avea foi o se liliuga i le ala i le toe foi mai.

Sailia o se Manatuaga Mafanafana

E oo lava i le taimi na faasolo ai ina vaivai lona faatuatua, sa ia manatuaina pea ni aafiaga matagofie mai le taimi ua tuanai. E le galu lava ia Te Oranoa lona lagona ina ua auai i le malumalu faatasi ma lana vaega talavou po o le o atu i se konafesi a le au talavou.

“Sa i ai se mamanu,” ua ia fai mai ai. “Ou te mauaina se lagona lelei lava pe a ou sau i le lotu, ae ou te lei mauaina se lagona lelei ina ua ou misia le lotu.”

Na iu lava ina oo mai se aso ina ua filifili ai Te Oranoa ia vaai pe mafai ona ia toe fesootai i na lagona lelei. O le mea muamua lava na ia faia o le faiataina lea o lauga o le konafesi aoao talu ai.

O se lauga o le konafesi aoao o Oketopa 2016, “Aoao mai ia Alema ma Amoleka,” na saunia e Peresitene Dieter F. Uchtdorf, le fesoasoani Lua i le Au Peresitene Sili, na toe faguia ai se musumusuga i le agaga o Te Oranoa. Na ia iloaina le tele o lona lava olaga ma lagona e pei ona faamatalaina e Peresitene Uchtdorf pe na faapefea ona mou ese atu le faatuatua o Amoleka. Na sili atu foi le malosi o lona manatuaina nai lo se isi lava taimi o le fiafia na ia olioli ai ao sili atu le malosi o



lona faatuatua. O le taimi lava lena, na ia manao ai e fai ni suiga.

“Na ou faamoemoe e saili se mea e toe faamumu ai le afi o lau molimau,” ua ia faamatalaina, “o lea na ou faitauina ai le lauga a Peresitene Uchtdorf, ma ioe, na ou lagonaina le fiafia faaleagaga!”

Faamoemoega mo le Faavavau

E lei faigofie i taimi uma le ala o le toe foi mai o Te Oranoa i le faatuatua, ae e i ai se malamalamama faapitoa o le faamoemoe lena na ia faaauau ai pea: o le faamoemoe o se aiga e faavavau.

“E mafai ona faatasi e faavavau aiga,” ua ia fai mai ai. “O lau miti sili lea, lou faamoemoe sili i le olaga. Soo se taimi lava ou te manao ai e aoao e uiga i se mea, pe ou te iloaina ua faigata se aoaoga faavae ona malamalama i ai, ou te taumafai e faafesootai atu i tua i aiga e faavavau. Mo se faataitaiga, aisea e taua ai le Togiola a Iesu Keriso ia te au? Mo se tasi itu, ou te manaomia Lana Togiola i lou olaga ina ia mafai ai ona ou agavaa e ulufale atu i le malumalu ma ia faamauina i lou aiga mo le faavavau atoa.”

Liliu Atu i le Atua

Atonu e aoga le manatua o tagata i le faaaliga a Liae o e na pauu ese ina ua uma ona tofo i le fua, o le mea moni, na *tofo* lava i ai. Atonu na latou iloaina lona lelei, e tusa lava pe mo na o sina taimi puupuu lava. Ma e mafai ona latou toe iloaina foi. O le faamoemoe lena na pipii i ai Te Oranoa, mo ia lava ma mo isi foi.

“E te le tau faaauau pea ona alu agai i lalo o na ala faasaina mo le taimi o totoe o lou olaga,” o lana tala lea. “E mafai ona e toe liliu i tua i le Alii i soo se taimi lava e te manao ai.” ■

“E mafai ona e toe liliu i tua i le Alii i soo se taimi lava e te manao ai.”





O LE MANETA O *Pesepesega o le Kerisimasi*

O SE PESEPESEGA MO JOAQUIN

O pesepesega e le o se mea tele i le tu masani o le Kerisimasi a Atenitina. O le mea moni, o le Kerisimasi iinei e ese lava mai le ata o aisa masani atonu e te mafaufau i ai. Ona matou te nonofo i le Itulagi i Saute, o le Kerisimasi *ou te* mafaufau ai i se ipu salaki fualau lapoa lava!

O lea, ina ua fautua mai ou matua matou te faataitaia le pesepesega o se aiga, na matou lagonaina ma ou tei se faalogona fefiloi o le le mautonu ma le fiafia. Matou te lei mautinoa a matou tulaga faamusika, o lea na matou filifili ai e faia ma aumaia ni kuki e tuu atu i tagata na matou asia o se mafuaaga e ataata ai, ia tau ane ai.

Sa avea se tamaloa e igoa ia Joaquin o se vaega o la matou uarota i le mea e gata mai ai lou manatua. O lena Tesema na ma'i ai o ia ma na le mafai ai ona toe auai i le sauniga faamanatuga. O lou tama ma tuagane o nisi o i latou na aveina atu le faamanatuga ia te ia i le falemai pe a tuua le lotu i aso Sa.

I le aso Sa ao lumanai le Kerisimasi, na feosofi uma lo matou aiga i totonu o le taavale e asia Joaquin, ma le faamoemoega o le a matou aumaia se agaga mafanafana o le Kerisimasi. Ina ua matou taunu, na faasino mai e le tamaitai tausimai ia i matou lona moega. Na i ai ana tusitisiga paia ma se tusipese i tafatafa o lona moega, e pei sa ia faatalitalia i matou.

Sa matuai manino lava lona fiafia na matou i ai iina, ma na vave lava ona matou lagonaina uma le alofa mo ia. Na saunia, faamanuiaina, ma tufa atu e ou tuagane le faamanatuga. Sa matou usuina, ae lei tuua o ia le "Sa Iutaia o Leoleo Lelei": "Ia faamanu i le Alii; ia manuia o lalo nei, manuia lalo nei" (*Viiga*, nu. 121).

E mautinoa lava o le filemu ma le manuia lena na ulu mai i o matou loto ao ia valaauna i matou o "agelu" ma faafetai mai ia i matou mo le asiasiga, ae pau le mea na matou manaomia o le aumaia o na lagona ia te ia.

Julia G., Buenos Aires, Atenitina

O LE FALE MULIMULI O LE PO

O le Po lea o le Kerisimasi, ae ou te *lei* manao e alu i le pesepesega.

Ae ui i lea, na manatu lou tina o le a avea o se vaega malie pe a feosofi le aiga i totonu o la matou taavale tuai ma tietie atu i lalo o auala aisa o tuaoi e usu ni pese i ni tina e toatolu ua maliliu a latou tane i la matou uarota, ma na fafia lou tama e lagolago lana fautuaga.

Sa ou lagonaina le lofituina. O ai e fia faalogo ia i matou? O le a ou oti i le ma pe a ou vaaia se tasi ou te iloaina. Na ou tolotolo atu i le nofoa i tua ao tomumu ma faalii, faatasi ma lou tuagane ma lou uso.

O le tietie atu i le fale muamua sa na o ni nai poloka le mamao ese. E lei tali mai se tasi. Na matou tietie atu i le fale lona lua. Na faapena foi, e leai se tali. Na amata ona ou fafia.

Ao matou agai atu i le alataavale vaapiapi i la matou fale mulimuli, na ou mafaufau, "Faamolemole ia aua nei i ai se tasi i le fale."

Ua pogisa nei fafo. Ao tuitui ma faatali lou tina, na tumau pea le pogisa o le faapaologa i luma. Lelei. O le a vave lava ona matou oo i le fale, lea o le a mafai ai ona ou sola i totonu o lou potumoe.

Na faafusei lava le ola mai o le moli o le faapaologa ma matala mai le faitotoa. Sa matuai ou maasiasi lava. Na ou lagonaina le mautinoa ua matou faalavelave ia te ia.

"O mai i totonu, o mai i totonu," na fai mai ai le fafine laitiiti, paee lava. Na ia faasino atu i lana piano tuai sasao.

"Pe e te ta piano?" na ia fesili atu ai i lou tina. "Sei tatou pepese faataamilo i le piano,"

O lona agalelei ma le fafia na faamaluina ai lou loto. Atonu e lei afaina tele lava ia te ia lo matou i ai iina. Ina ua matou usuina ni nai pese na ia oficina mai loa ia i matou le koko vevela.

"Pe mafai ona e sau e fesoasoani?" na ia fesili mai ai ia te au. Ao ma ulu atu i le umukuka, na ou ofo i le vaaia o se seti laulau matagofie lea na teuteuina faailla lava mo le Kerisimasi. Sa matuai foliga fafia lava! I nofoaga ua setiina taitasi sa i ai se tamai, afifi na afifiina ma le faaeteete.

"E mo ai lenei mea?" Sa ou fesili ai. Na ou iloaina sa nofo toataso i ia.

"Mo ou tuaoi," na ia faamatala mai ai. "Ou te valaaulia i latou na e pei o au i Kerisimasi taitasi—i latou e leai ni aiga lata mai—e o mai mo se aiga o le taeao o le Kerisimasi ma sina mealofo itiiti."

Na fafia tele lou faiai e 13 tausaga le matua i le manatu. Na faatumuina lou loto malo i le faaaloalo. Oka se matagofie o lenei potu. Oka se matagofie o lenei uso matua saasaa. Oka se matagofie o lou tina i le aumaia o i matou iinei. Sa ou fafia i le faaiuga.

Na faafetai mai lenei uso ia i matou mo le asiasiga i le lotu i le masina na sosoo ai. Na ia tau mai ia i matou faapea na o matou lava tagata na manatua o ia i lena tausaga. I ni nai masina mulimuli ane, na ia maliu faafusei lava.

Ou te toe tepa i tua i lena Kerisimasi ma lagona le loto faafetai mo ni matua ofoofogia ma mo lenei uso matua, o i latou taitoataso ia na manano e aumaia le olioli o le Kerisimasi i isi. ■

Brooke K., Iuta, ISA





O Mafuaaga e Valu e Avea ai le Kerisimasi o se **TAIMI MAOAE** e Avea ai ma se **FAIFEAUTALAI**

*E i ai se mea e uiga i aso
malolo e avea ai le faasoa atu
o le talalelei o se mea e sili
atu ona lelei!*



Saunia e Charlotte Larcabal

Mekasini a le Eklesia

E te alofa i au uo. E te fiafia i le talalelei. Ae e te le iloaina lava pe faapefea ona tuu faatasi le lua lea.

Afai e foliga mai lenei mea e pei lava o oe, e te le o tuuatoatasi. E toatele tagata e mananao e faasoat atu le talalelei ia latou uo ae e fefefe e uiga i le avea ma se tagata e faatauanau pe faavalevaleda. E mafai ona avea le faasoat atu o le talalelei o se mea faapopole tele.

Ae aua lava le fefe! E tusa lava pe e te lei taua muamua le Eklesia i se tasi, e mafai ona faatumuina lou vaitau o faigamalologa i le tele o taimi faafafeautalai masani, faigofie, ma mafai atoatoa lava ona faia. E faapefea?

O le mea muamua lava e fai o le tatalo. Taumafai e fesili atu i le Tama Faalelagi mo avanoa e faasoat atu ai le talalelei. Tatalo ia iloa po o ai e talanoa i ai pe valaaulia ma tatalo mo le lototoa e fai moni ai lava!

O le mea lona lua o le amata loa. Ma amata *nei loa*. O se mea lilo lenei: O le galuega faafafeautalai e *matuai faigofie lava* i le vaitau o le Kerisimasi. Aisea? E i ai a matou mafuaaga e valu.



1. E fiafia uma tagata i se pati manaia.

O avanoa e, atonu o lau uarota po o lou aiga foi o le a fuafuaina se pati o le Kerisimasi. Valaaulia se uo e auai mai i le fiafia! Atonu o le a i ai se pese po o se savali e faatatau uma lava i le Faaola, ma atonu o le mea tonu lena e manaomia e lau uo e faalogo i ai.

2. O le valaaulia o tagata i le lotu i le taimi o le Kerisimasi o se mea e masani tele ai.

E i ai se mea e uiga i le Kerisimasi lena e mananao ai tagata e o i le lotu! O le taimi sili lenei e faailoa atu ai i au uo e talaina lava i latou e o mai e vaavaai pe faapefea ona tapuai tagata o lau lotu i le Faaola.

I LAATITASI O LE ALA

Na ou talanoa atu i se tuaoi lea e fiafia lava i le talalelei. Na ou valaaulia o ia le Mutual, ae na i ai lava se mea na taofia ai o ia mai le sau. I se tasi po na ou iloa ai ou te lei tatalo lava e uiga i ai. O le taimi lava lena, na ou tootuli ai i lalo ma tatalo mo le Agaga Paia ina ia faatasi ma au ma taialaina au. Ina ua uma ona ou tatalo, na ou faatali mo se tali ae lei mauaina se tali. I le le mautonu, na ou toe taumafai ai, ae o le taimi lea na ou lagonaina le uunaia e faafetai atu i le Atua mo faamanuiaga uma lava ua ou maua. Na ou tatalo foi ia mafai ona ou fesoasoan atu i isi ia iloa le tele o faamanuiaga ua latou maua ma faamanuiaga uma e mafai ona latou maua e faafetai ai i le mana o le Faaola. Na malosi lou lagona e faapea e tusa lava po o le a le umi e taumafai ai, o le a faatasi mai lou Tama i le Lagi ia te au i laa taitasi o le ala, i le tuuina mai o le onosai ma faamanuiaina atili au. E lei umi i le maea ai o na tatalo, na sau lau uo i le Mutual faatasi ma au!

Elora C., 14 tausaga, Arisona, ISA





ATONU E LE FOLIGA MAI O SE MEA TELE

I se taimi ua tuanai, na siitiae ai lau uo mai le lotu, ma na tuua ai na o au lava le Mamona i lau aoga. Na talanoa mai talu ai nei ia i matou lau faiaoga o le Aoga Sa e uiga i le ala e faasoa atu ai le talalelei ia matou uo. Na ou tatalo ia iloa pe faapefea ona faia lenei mea, ma na ou mauaina moni lava se tali. Sa ou talanoa i se tasi o au uo, ma na amata ona ma talanoa e uiga i lona manatu i le tafao faamasani. Na ou faamatala atu i ai, ou te le talitonu i le tafao faamasani seia oo i le 16 tausaga, ma i lou tei tele, na i ai foi ia te ia ni tulaga faatonuina e tutusa lava. Atonu e lei foliga mai o se mea tele, ae o se tali moni lava i au tatalo, ma na faamalosia lau molimau i le tatalo.

David S., 13 tausaga, Texas, ISA

3. O meaai mama o le Kerisimasi o se ala sili lea e faia ai se valaaulia po o se savali o le talalelei ia sili atu le suamalie.

Ae faapefea se ipu kuki faatasi ma lau mau e sili ona fiafia i ai? Ae a sina sukalaki ma se upusii e uiga i le Kerisimasi? Ioe, faamolemole!

4. O aiga e matele lava ina faapotopoto faatasi.

O le faaluina o le taimi faatasi ma aiga o se vaega tele o tu masani o le Kerisimasi, ma e ao ona faigofie lava le talanoa e uiga i lou aiga, o a outou tu masani o aso malolo, ma a outou talitonuga e uiga i aiga.

5. O moli ma le koko o ni mea masani.

Inu le koko pe matamata i teuga o le Kerisimasi faataamilo i le taulaga mo se afiafi faaleaiga po o se gaoioiga o le Mutuale. O gaoioiga o aso fiafia e malie mo tagata uma, ma o se ala sili mo se uo ia vaai ai pe faapefea ona e ola i lau tapuaiga.

6. O Savali Faamamona o le Kerisimasi e matagofie ma faigofie ona faasoa atu.

Tuu le agaga o le Kerisimasi i agafesootai e ala i le faasoa atu o le "A Savior Is Born—Christmas Video"! E toafia au uo i le Facebook o le a fiafia e vaai i se agelu laitiiti o fesoasoani i se teufale faalii i le "The Reason Behind Christmas" po o se tala manaia e uiga i le le manatu faapito i le "The Coat: A Story of Charity"? Sue le LDS.org po o le Mormon Channel mo nei vaega ma isi savali o le Kerisimasi e faasoa atu.

7. O le Kerisimasi o se faamanatuina o le Faaola.

O le tele o Kerisiano o le a sili le taulai atu i le Faaola i le vaitau o le Kerisimasi. E faaopoopo atu i le faasoa atu o manatu faaleauau-naga i aso taitasi, o le a faamamafaina foi e le Mormon.org aoaoga a le Faaola ma auala e "Faamalamalama ai le Lalolagi." Atonu o le mea sao lava lena o loo sailia e au uo e faamanatu ai Keriso i le Kerisimasi.

8. E tele naua auala e tuuina atu ai ma auauna atu ai i le vaitau o le Kerisimasi!

O le auauna atu o se auala ofoofogia e avea ai o se faifeatalai, ma e tele avanoa e auauna atu ai i isi i le vaitaimi o aso malolo. E mafai ona e asiasi i se falemai o tagata matutua, usu pese o le Kerisimasi i se tuaoi, pe foai atu ni meaai i se nofoaga mo tagata sulufai i le lotoifale. E mafai ona e maua manatu faaleauau-naga mo aso e 25 muamua o Tesema e ala i le asiasi i le Mormon.org.

O le a se mea o loo e faatali i ai?

Ona o le talalelei, ua e iloaina e uiga ia Iesu Keriso ma faamoemoega uma ua Ia aumaia. O se meaalofa ofoofogia lena, ma o se tasi lena o meaalofa e mafai ona e tuuina atu i isi. Afai e te fesili atu ma le faamaoni i le Tama Faalelagi mo avanoa e faasoa atu ai le talalelei, o le a Ia uunaia oe ia iloa po o ai e mafai ona e talanoa atu i ai. O le Kerisimasi o se taimi o le faasoa atu, o le tuuina atu, ma le manatuaina o Iesu Keriso. ■



O SE VAITAU O LE FAAMANATUINA

"O se vaitau lenei o le olioli!
O se vaitau o le faamanatuina!
O se taimi matagofie pe a tatou faailoaina atu faapea na auina mai e le Atua Silisili Ese Lona Alo Pele e Toatasi, o Iesu Keriso, e laveai le lalolagi! E laveai i tatou!"

Peresitene Dieter F. Uchtdorf, Fesoasoani
Lua i le Au Peresitene Sili, "Can We See the Christ in Christmas?" (Faigalotu a le Au Peresitene Sili o le Kerisimasi, Tes. 6, 2009), broadcasts.lds.org.



O I TATOU
TAITOATASI O SE
PULE O LE
FALETALIMALO
LEA E FILIFILI PE
O I AI SE AVANOA
MO IESU!

Elder Neal A. Maxwell (1926–2004),
“E Faamautu Lenei Mea I o Outou Loto,”
Konafesi aoao o Oke. 1992



Saunia e Peresitene
Thomas S. Monson

PE FAAPEFEA ONA LAGONAINA LE AGAGA MONI O LE KERISIMASI

O le Kerisimasi o se vaitau mamalu tele o le tausaga. O se taimi pisi tele foi lea mo le toatele o i tatou. Ou te faamoemoe ma tatalo e faapea tau ina ia aua nei matele tele i tatou i fiafiaga o le vaitau o le Kerisimasi ona tatou tuu ai lea o la tatou faamamafa i mea sese ma le maua ai nai fiafiaga faigofie o le faamanatuina o le soifua mai o le Paia e Toatasi o Peteleema.

O le mauaina o le olioli moni o le Kerisimasi e le maua mai le faatatope ma faanatinati ia tele atu ni mea e fai. Tatou te maua le olioli moni o le Kerisimasi pe a tatou **avea le Faaola ma taulaiga o le vaitau**.

O la tatou faamanatuina o le Kerisimasi e tatau ona avea ma ataata o le alofa ma le le manatu faapito na aoao mai e le Faaola. **O le foai atu, ae le o le maua mai, e aumaia ai le**

agaga atoa o le Kerisimasi. Tatou te **lagonaina ai le agaalofa sili atu** o le tasi ma le isi. Tatou te aapa atu ma le alofa e fesoasoani ia i latou ua itiiti mea ua maua. O o tatou **loto e faamaluluina**. E faamagaloina ai fili, manatua ai uo, ma usiusitai ai i le Atua. O le agaga o le Kerisimasi e faasusuluina ai le ata o le faamalamo o le agaga, ma tatou te vaavaai atu ai i fafo i le olaga pisi o le lalolagi ma sili atu ai ona tatou manatu i tagata nai lo mea o le olaga. Ina ia malamalamo i le uiga moni o le agaga o le Kerisimasi, e na o lo tatou **sailia lava o le Agaga o Keriso**.

Tau ina ia tatou **tuuina atu e pei ona tuuina mai e le Faaola**. O le ofoina atu o le tagata lava ia, o se meaalofa e paia. Tatou te ofoina atu o se faamanatuga o mea uma na tuuina mai e le Faaola. Tau



ina tatou tuuina atu foi ni meaalofa na e maua ai le taua faavavau, faatasi ma a tatou meaalofa na e iu lava ina taei pe faagaloina. Oka se sili atu o le tulaga o le a i ai le lalolagi pe ana tatou tuuina atu uma ni meaalofa o le malamalamo ma le agalelei, o le auaunaga ma le faauoga, o le agaalofa ma le agamalu.

Ao siomia i tatou e le vaitau o le Kerisimasi i lona mamalu, tau ina ia tatou, e pei ona faia e Makoi, sailia se fetu pupula, le fetu faapitoa lena e taialaina i tatou i la tatou faamanatuina o le soifua mai o le Faaola. Tau ina ia tatou faia uma le malaga i Peteleema i o tatou mafaufau, ma aveina faatasi ma i tatou se loto agamalu, ma agaalofa o sa tatou meaalofa i le Faaola. ■

Mai le Faigalotu o le Kerisimasi a le Au Peresitene Sili 2013.

“Sa ou tatalo mo se mea tau, ae ou te le iloa pe na ou mauaina se tali. E faapefea ona ou iloaina?”

Ole mauaina o tali i tatalo ua faamatalaina o se faagasologa: muamua e te suesue i lau fesili i lou mafaufau; ona e fesili atu lea i le Atua pe sao lau tali. Afai e sao lau tali, o le Alii o le a “tautala atu le filemu i lou mafaufau” (MF&F 6:23).

Ae faapefea pe a e le lagonaina se faalogona o le filemu? Ae faapefea pe a e lagonaina e pei ua e mauaina se tali, ae e te le mautinoa pe o oe po o le Agaga Paia?

E tusa ai ma le saunoaga a Elder David A. Bednar o le Korama a Aposetolo e Toasefululu, “O le tele lava o taimi, e oo mai faaaliga i nai faaopoopoga laiti mo sina taimi, ma e tuuina mai e tusa ai ma o tatou manaoga, agavaa, ma tapenapenaga.”¹ E le masani lava ona oo vave mai; o le tele lava o taimi e oo mai i “lea fuaitau i luga o lea fuaitau, ma lea mataupu i luga o lea mataupu” (2 Nifae 28:30), ma o le tele o taimi e tatau ai ona e faia se laa i se tasi itu e tusa lava pe e te *le i* lagonaina faapea ua e mauaina se tali atoatoa. O nisi taimi atonu e te le mauaina lava se tali—o le taimi lena e te manaomia ai le faatino loa po o le lava le tulaga ma le faatuatua faapea o le a tali mai le Atua pe a sao le taimi.

Afai o e popole pe o lau tali e sau mai ia te oe pe mai le Agaga Paia, manatua o le tali sili lava o le tali lena e “valaau mai ma faatosina mai ia faia mea lelei, ma alofa i le Atua, ma auauna atu ia te ia” (Moronae 7:13).

FAAMATALAGA

1. David A. Bednar, “O Le Agaga o Faaaliga” Konafesi Aoao o Aperila 2011.



Filifili ma Faatali mo le Agaga

I se tasi taumafanafana,

ou te lei lagonaina
faapea na tuuina mai e
le Alii ia te au se tali e

uiga i se filifiliga taua. Na ou tatalo ma le faamaoni i aso taitasi ia iloa Lona finagalo mo au, ma na ou ta'u atu ia te Ia le mea na ou manao e fai. Ae peitai e aunoa ma se tali manino, na ou faia lau filifiliga. Na vave lava ona ou lagonaina le Agaga ua molimau mai ia te au faapea o le filifiliga na ou faia o le a fesoasoani ia te au e tuputupu ae ai ma avea atili ai faapei o lou Tama i le Lagi. O nisi taimi tatou te manaomia le galue ina ia maua ai se tali—e faaaloalo le Tama Faalelagi i la tatou faitalia ma o tatou manaoga amiontonu. Afai tatou te ola agavaa, o le a taitaia i tatou e Lona Agaga e ala i o tatou manaoga aua o le a ogatusa ma Lona finagalo.

Amanda H., 16 tausaga, luta, ISA

Tatalo mo le Fesoasoani

Na ou tatalo ma mauaina ni tali mo le tele o mea, ae o mea na e sili ona tulaga ese o mea ia e faatatau i le aoga. Ao lei oo i le suega, ou te tatalo ina ia mafanafana ma ia mafai ona manatua faamatalaga na ou suesueina. O le tele o taimi ou te manatua ai palakalafa atoatoa o faamatalaga na ou te iloaina semanu ou te le mafai lava ona manatua e aunoa ma Lana fesoasoani. Ua ia faamanuiaina tele lava lou olaga, ma ou te faatauaina le mana o le tatalo ma Lana uunaiga ou te lagonaina mai ai.

Emily B., 18 tausaga, Kuiniselani, Ausetalia





Ia Onosai ma Mataala

E lei leva atu, sa ou luiina ai au lava ia tatalo mo avanoa faaleauau-naga. Na ou mafaufau i ala e mafai ai ona ou fesoasoani atu ai i isi, ae ou te lei mauaina le mea na ou talitonu o se uunaiga. Na amata ona ou lotovaivai, ae faasoa mai loa e lou tina ia te au le Alema 5:40: "Soo se mea ua lelei ua sau mai le Atua." Na ou iloaina o manatu filemu faaleauau-naga na ou mauaina o uunaiga moni lava mai le Agaga Paia. Ou te iloaina o a tatou tatalo e taliina i taimi uma lava; tau lava o lo tatou onosai, ia mataala, ma faalagolago i le Alii.

Lybee B., 16 tausaga, Oregon, ISA



Faalagolago i le Agaga

Pe a e aoao e faalagolago i le Agaga Paia ma atiina ae le mafai ona iloaina le ala lena e tali mai ai le Tama Faalelagi ia te oe, o le a e vaaia pe faapefea ona avanoa le Agaga mo oe. E uunaia e Lona siufogia i tatou filemu lava faapea afai tatou te pisi i mea o le lalolagi, o le a tatou le iloaina musumusuga vaivai ma lagona na e o mai mai le lagi. Afai, po o le a lava, o loo tatou ola i le ala e tatau ona tatou ola ai, ona tatou maua ai lea i taimi uma le folafolaga o le a tatou iloa i o tatou loto le mea o loo fai mai ai le Agaga e tali mai ai ia tatou tatalo.

Sister Ribeiro, 24 tausaga, Misiona a Brazil Porto Alegre i Saute



Faataitai I Ai ma Vaai!

O isi taimi e manaomia e le Alii i tatou ia faatino lo tatou faatuatua ae tatou te lei mauaina se tali atoatoa. Pe e te manao e iloa po o le Upu o le Poto o se poloaiga moni lava mai le Atua? Ola ai loa! Pe e te fia iloa pe moni le Tusi a Mamona? Faitau loa i ai! Faalagolago i le folafolaga i le Ioane 7:17: "Ai se tasi e fia fai lona finagalo, e iloa ai e ia le mataupu, pe mai le Atua, pe ou te tautala fua lava a'u."

Preston O., 19 tausaga, Iuta, ISA



E ala i le Mana o Keriso

Na ou matamata i le faasalalauga o le Talanoa Faafesagai ma Elder Rasband ma Sister Oscarson ae fai ai e se talavou lenei lava fesili e tasi e uiga i le mauaina o tali. Na sii mai e Sister Oscarson le Moronae 7:16, "ua auina mai i le mana ma le meaalofa a Keriso . . . e



O UUNAIGA E OO MAI I VAEGA LAITI

"A tatou saili i musumusuga e fesoasoani i le faia o faaiuga, e aumaia e le Alii uunaiga malu. O nei vaega e manaomia ai i tatou ia mafaufau, ia faatino le faatuatua, ia galulue, ia tauivi i nisi taimi, ma ia faatino. E seasea lava ona oo mai i le taimi e tasi le tali atoao i se mataupu e manino lava le taua po o se faafitauli faigata. E tele atu taimi, e oo mai ai i se vaega itiiti i lea taimi ma lea taimi, e aunoa ma le iloa atu o le taunuuga."

Elder Richard G. Scott (1928-2015) o le Korama a Aposetolo e Toasefululu, "Aoao ia Iloa Tali i Tatalo," konafesi aoao o Oke. 1990.

mafai ai ona outou iloa ma le malamalamama atoatoa ua mai le Atua." Ua faaali mai e lena mau ia i tatou o le a mafai ona tatou iloa le finagalo o le Atua mo i tatou ma se malamalamama atoatoa. Lagona le Agaga ma o le a e iloa le tali.

Sara S., 17 tausaga, Santa Catarina, Pasila

FESILI O LE A SOSOO AI

"O nisi taimi ou te le lagonaina le agavaa ina ia alofagia ai e le Faa-ola. E mafai faapefea ona ou faatoilaloina lenei lagona ma iloaina lou taua faaletagata?"

Auina mai lau tali ma, afai e manaomia, o se ata manino lelei a o le'i oo i le aso 15 o lanuari, 2018, i le liahona.lds.org (kiliki le "Submit an Article").

E ono iloiloina tali mo le uumi po o le manino.

O LA TATOU AVANOA



FAI NI UO FOU

Ina ua tau mai e ou matua ia te au e faapea o lo matou aiga o le a siitia ese, na ou matuai fiafia lava e faia ni uo fou. Ina ua matou taunu i lo matou aai fou, na matou o i le lotu. Na mafai ona ou lagona le Agaga sa malosi lava iina, ma na ou iloaina o le alelei mea uma.

E lei pine, ae ou amata i lau aoga fou. Sa na o au lava le Mamona e toatasi i le aoga. Ina ua ou savali atu i totonu, na ou lagona le le toafimalie iina. Sa mafai ona ou iloa atu sa ou ese mai isi tamaiti aoga.

I le aluga o le vaiaso muamua pe a, na ou taumafai ai e faia ni uo. Ae na ou lagona le le mautonu! Na ou taumafai e nofo i tafatafa o tagata eseese i vasega taitasi ma ai i le malologa

i laulau eseese i aso taitasi. Ae e lei foliga mai sa ou agai i luma.

Na ou filifili e taumafai ia avea ma se faataitaiga e sili atu i au tupulaga. Na ou taulai atu i le Alualu i Luma o le Tagata Lava ia ma le suesue ma le filiga i tusitusiga paia. Ao ou galue malosi, na sili atu lou iloaina atoatoa e faapea o au o se afafine o le Atua ma e alofa o Ia ia te au.

Ao faagasolo le taimi ma na ou faaauauina le faia o nei mea, na ou matauina ai se mea: ua amata ona ou faia ni uo i le aoga. Sa pei lava na tosoina mai tagata ia te au. Na latou taua le ala na ou tulaga ese ai. Na ou iloaina na faapena ona sa ou faasusuluina atu lou malamalama. Sa ese au amioga mai au uo i le vasega,

sa ou faia ni ofu tauagafau, na ou faaaogaina le gagana lelel, ma sa ou agalelei i isi.

O i tatou uma lava o fanau a le Atua. Ou te matuai faafetai lava na ou tuuina atu lou malamalama ia susulu atu, e ui lava sa ou lagonaina le ese mai isi. Ou te iloaina e le tuua lava toatasi i tatou pe afai tatou te mulimuli i le Alii! ■

Rebekah C., Atu Motu o Prince Edward, Kanata

PE MAFAI ONA OU FAASOA ATU LE TUSI A MAMONA?

I le Mutuale, na tuuina mai ai ia i matou se tofiga ia avea ma faifeautalai e ala i le mauaina o se soa, faasoa atu a matou molimau i se tagata le lotu, ma tuuina atu se kopi o le Tusi a Mamona i la ma uo le lotu.

Ina ua uma le Mutuale, na ou fesili atu i lou tina mo se fautuaga. Na ia folafola mai ia te au e faapea afai ou te tatalo i le faatuatua ma fesili atu i le Tama Faalelagi, o le a mautinoa lava le tali mai.

E lua vaiaso na ou faaaluina e saili ai se tasi o le a taliaina le Tusi a Mamona. Na teenaina au ma toe teenaina, i le taimi muamua. Na ou matuai le lava lava mai le loto tiga lea na toeitiiti ai lava a ou fiu ai

I se tasi po, na fai ai sau miti e uiga i se fafine lea sa avea o se uo mamae lava i lou aiga. Ao ou faia le miti, na ou iloaina o ia lea e toatasi mo au ma lau soa e asia. Ina ua ou ala i luga, na ou faafetai atu i le Alii mo le fesoasoani mai ia te au.

I le isi Mutuale, na ma tusia ai ma lau soa a ma molimau i le itulau i luma o le tusi ma faia se ato o fualau aina mo le fafine. Na ma o i lona fale, tuitui i lona faitotoa, ma faatali. E ui lava na ou fefe e faapea atonu o le a ia teenaina, na ou fai ifo ia te au lava ia maua sina faatuatua itiiti. Na iu lava ina sau o ia i fafo faatasi ma se foliga fiafia ma taliaina le Tusi a Mamona.

E ala mai i i lenei aafiaga, na ou aoaoina e faapea, pe a i ai sou faatuatua itiiti ma e te iloaina o loo iina le Tama Faalelagi, e mafai ona faigofie lava lou lagonaina e faapea o le mea e le mafai ona fai, e mafai lava ona faia. ■

Rapunzel L., Amerika Samoa

O LAU MALOLOGA MAI I LESONA PIANO

I se tasi vaiaso, na ou filifili ai e faasilasila atu se malologa mai le taina o le piano. E lei faatagaina mai e lou faiaoga lenei malologa ma na faa pena foi lou tina. Mo se vaiaso atoa lava ou te lei taina ai le piano. Na ou mafaufau na lelei tele lena mea aua na ou maua se taimi manaia e malolo ai ma faia isi mea.

Na uma le malie i le po o le aso Tofi, ina ua faamanatu mai e lou tina ia te au o lau lesona piano o le taeao e sosoo ai. Na ou mafaufau na ou mauaina se tali: na ou vave ala i se itula ma amata ona tata. Ae na ou iloaina o au taumafaiga sa itiiti tele, ma tuai tele. Sa ou fiafia i le saolotoga e filifili ai, ae ou te lei mafaufau i taunuuga.

O le taeao na sosoo ai ina ua ma feiloai ma lou faiaoga, na amata ai ona manino mai taunuuga. Na tatau ona ou taliaina faapea ou te lei tata, ma na tau mai e lou faiaoga ia te au e tatau ona ou tata i taimi uma lava na ou misia, e faaopoopo atu i lau tataaga i le taimi masani.

Ou te faafetai mo lesona na ou aoaoina e uiga i le faitalia, tiutetauave, ma le tauia. O filifiliga uma lava e i ai se taunuuga, ma na ou aoaoina e faapea o le a ou faia ni filifiliga e sili atu pe a ou faaaluina le taimi e mafaufau ai muamua i taunuuga. ■

Blake H., Iuta, ISA



O LOU AVANOA

E taliaina e le *Liahona* ou aafiaga ma manatu. E i ai se mau e sili ona e fiafia i ai? Na mauaina se tali i se tatalo? Pe na faaalia le lototoa i le ola ai i le talalelei? Auina mai lau tala i le liahona.lds.org (kiliki le “Submit an Article po o Feedback”).

O Le Malo Faapitoa o le Po o le Kerisimasi

*E masani lava o le po sili lea o le tausaga.
O lenei o le a faaleagaina!*



Saunia e Holly K. Worthington

E faavae i se tala moni

"Sing the carols of the Christ child: Let your neighbors know you care" (Children's Songbook, 51).

E fiafia Clara i tu masani o le Po o le Kerisimasi a lona aiga. Muamua latou te taumafaina ni ia mo le aiga o le afiafi ma kuki o le Kerisimasi mo meaai suamalie. Ona latou asiasi atu lea i le maketi o le Kerisimasi. Pe a latou taunuu atu i le fale, latou te fatauina faatasi le tala o le Kerisimasi mai le Tusi Paia. Ma ao lei o e momoe latou te faaoalaina le laau Kerisimasi mo le taimi muamua ma mafai loa ona tatala le meaalofa e tasi a le tagata. O le po sili lea ona fiafia i ai Clara i le tausaga. Sa le mafai ona ia faatali!

Seia oo ina faia e Tina se faaaliga.

"O le a i ai sa tatou malo faapitoa o le Po o le Kerisimasi i lenei tausaga. Manatua Ms. Rainer?"

Sa gugulu Clara. "Le tuaoi lea na valaaulia e Tama i le lotu i le vaiaso talu ai?"

"E sa'o. O lae ua aumai nei e Tama."

Na faapau ifo Clara i le nofoa. E mafai faapefea ona ia maua se lagona lelei ma fai mea malie ao i ai se tagata ese iina? Ua faaleagaina le Po o le Kerisimasi! Ia, e lei sau Ms. Rainer i le lotu ina ua valaaulia o ia e Tama. Masalo o le a le mafai foi ona sau o ia i lenei taimi.

Ae ina ua ulu mai Tama i le faitotoa, na o mai faatasi ma le "malo faapitoa" Na foliga lelava ma pei e faanoanoa Ms. Rainer. Na faatalofa atu i ai Clara. Ae e lei manao o ia e toe fai se isi tala. I le taimi o le meaai sa na ona ia taulai atu lava i lana meaai ao talatalanoa Tina ma Tama ma Ms. Rainer.



"Pe na e avea muamua ni lesona siva?" na fesili atu ai se leo malu. Na vaai atu Clara o loo faatalitali mai Ms. Rainer mo ia e tali atu. Na lue atu lona ulu ma toe vaai i lalo i lana ipu.

"Ma au foi," na fai atu ai Ms. Rainer, o loo filemu lava pea lona leo. "O le a lau ituaiga siva e fiafia i ai?"

Na faamimigi tauau o Clara ma tulei solo ana fualau faisupo i lana ipu.

"Ou te fiafia i le palei," na fai atu ai Ms. Rainer. "Sa ou i ai i se au siva i le iunivesite. I se tasi tausaga na matou malaga taamilo ai i Europa atoa lava. Sa ofoofogia lava."

Sa vaai atu i luga Clara. E foliga ofoofogia lena mea.

"O le a le isi mea e te fiafia i ai?"

Sa ataata laitiiti atu Ms. Rainer. "Taina o le piano. Ma le matematika."

Na faalapopoa mata o Clara. "E mo'i? O le matematika o lau mataupu e fiafia i ai!"

Na talanoa atu Clara ia Ms. Rainer mo le taimi o totoe o le aiga o le afiafi. Na ia iloaina na maua se tikeri i le kolisi i le matematika a Ms. Rainer ma sa aoga ia avea ma polofesa o le matematika ina ua fetau ma lona toalua. Na ia faia ni filifiliga leaga ma ua i ai nei i le falepupupi.

Ina ua uma le aiga o le afiafi, na i ai pea Clara i tafatifa o Ms. Rainer ao latou savavali faataamilo i le maketi o le Kerisimasi. Ma ao latou faitauina le tala o le Kerisimasi, na ia faasoa atu ana tusitusiga paia ia Ms. Rainer ina ia mafai ona ia mulimuli i le faiatauga.

Na vave oo mai le taimi e tatala ai meaalofa. Na maua e Clara ni ofu moe mafanafana lanu viole. Sa le mafai ona ia faatali e faamaulu! Ae na ia lagonaina sina faanoanoa ona e lei maua se meaalofa a Ms. Rainer.

O le taimi lava lea na tuu atu ai e Tina se meaalofa ia Ms. Rainer. Na ataata Ms. Rainer ma le matamuli ma tatala se pea totini lanu moana malosi. Na ia tilotilo atu i luga ia Tina ma mata ua tumu i loimata. "Fa'afetai lava. E te le tau manaomia lava le tuuina mai ia te au o se mea."

Na alu atu Clara i lona potumoe ma faamaulu lona ofu moe fou. Sa le mafai ona ia taofia le mafaufau ia Ms. Rainer. Na foliga mai sa ia matuai faafetai lava ua maua ni totini mo le Kerisimasi!

Ao faamaulu e Clara ona lava totini vulu, na ia faalogoina se musika matagofie ua amata ona tata mai. Na ia momoe atu i le fogafale i lalo ma maua ai Tina ma Tama o loo pepeseina ni pese o le Kerisimasi ao taina e Ms. Rainer le piano. Na faatasi atu i ai Clara. Ao ia pese, na tupu ae se lagona mafanafana i lona loto. "Ou te matea e le leaga tele lava le i ai o se malo faapitoa i le Po o le Kerisimasi," na ia mafaufau ai.

I le aso Sa, na sau Ms. Rainer i le lotu ma nonofo faatasi ma le aiga o Clara i le taimi o le sauniga faamanatuga. Na foliga fiafia moni lava o ia. Na ataata Clara ao ia faasoa atu lana tusipese ia Ms. Rainer. Atonu ua oo mai le taimi e faaopoopo ai se tu masani fou o le Po o le Kerisimasi. ■

E alala le tusitala i Idaho, ISA.



Ou te faaali atu le alofa i lou tuaoi ua nofo toatas i e ala i le asiasi ia te ia ma tusia ni ata mo ia!

Jill K., 10 tausaga, Kalefonia, ISA



Saunia e Elder
Paul B. Pieper
O le Fitugafulu

Ia Lototoa ma FAASOA ATU!



Sa nonofo lo matou aiga i le tele o nofoaga i le salafa o le lalo-lagi. Na matou feiloai i le tele o tagata eseese ma na maua ai avanoa e tele e faasoa atu ai le talalelei. Ua faamanuaaina e la ma fanau isi e ala i le faasoaina atu o a latou molimau.

A o laiti lava le ma fanau, sa matou nonofo i le atunu o Kazakhstan. Na leai ni faifeatalai iina i lena taimi. A mananao uo ma tuaoi e faalogologo e uiga i le talalelei, o *matou* e tatau ona avea ma faifeatalai!

Na faasoa atu e la ma tama teine o Marne le talalelei i lana uo o Alyona. Na filifili Alyona e papatiso faatasi ai ma le faata-gaga mai lona tina, lea na papatiso mulimuli ane faatasi ma le uso laitiiti o Alyona. Talu ai nei lava na faaipoipo ai Alyona i se alii talavou amiontonu i le Malumalu o Manhattan i Niu Ioka, ma na mafai ona i ai Marne iina! Na matuai fiafia lava o ia aua na ia fesoasoani i lana uo e aoao e uiga ia Iesu Keriso.

Ao matou nonofo i Virginia, ISA, na i ai le ma tama tama o Chris i le Peraimeri. Na amata ona feiloai faifeatalai ma se tasi o uo a Chris ma lona aiga. Na fesoasoani Chris e aoao le aiga. Na saunia o ia ao lei faia lesona taitasi ma fesoasoani e tali a latou fesili. Na filifili le aiga e papatiso. Ina ua maea lena mea, e lei toe popole Chris pe mafai ona ia auauna atu i se misiona. Na ia iloaina e mafai lava ona ia faia!

I se tasi taimi na sau ai se tamaloa e galue i lo matou pale. Na faafetai atu lou toalua ia te ia ina ua uma lana galuega. “Matou te fia tuuina atu ia te oe se meaalofa,” o lana tala lea. Na ia tuuina atu ia te ia se kopi o le Tusi a Mamona.

Na le fiafia le tamaloa. E lei malamalama o ia i mea tatou te talitonu i ai. Na manatu o ia tatou te le talitonu ia Iesu Keriso.

Na lototoa Chris ma faasoa atu lana molimau i le tamaloa. Na faapea atu Chris o ia o se tagata o Le Ekalesia a Iesu Keriso o le Au Paia o Aso e Gata Ai. Na ia fai atu e talitonu o ia ia Iesu.

O le toatele o fanau a le Tama Faalelagi e le iloa se mea e uiga i le talalelei. O isi e le iloaina faapea tatou te talitonu ia Iesu. O nei tagata e manaomia se tasi o le a agalelei ma talanoa atu ia te i latou. E mafai ona tatou lototoa ma faasoa atu a tatou molimau. E mafai ona tatou fesoasoani i isi e aoao e uiga ia Iesu Keriso! ■

O Le Ekalesia i le Taimi Nei

Faaaoga ata faatusa nei e faasoa atu ai le talafaasolopito o le Ekalesia!




Peresitene Monson

Na fausia e le Au Paia se aai matagofie i le Vanu o Sate Leki ma faaalu le 40 tausaga e fau ai le Malumalu o Sate Leki. Ua matuai faatupulaia le Ekalesia talu mai na aso o le popofou. O lenei ua 156 malumalu ua maea i le salafa o le lalolagi, ma ua faaliliuina le Tusi a Mamona i ni gagana e 110! O Peresitene Thomas S. Monson o la tatou perofeta i aso nei. E mafai faapefea ona e fesoasoani i le Ekalesia ia faaaauau pea ona faatupulaia?

Matou te faamoemoe na outou olioli i le faasologa o ata faatusa o le talafaasolopito o le Ekalesia i lenei tausaga! E mafai ona e maua ata faatusa tuai i le liahona.lds.org.

O Le Pepa **LANU MUMU**

*Oi aue! Ua toe mamulu atu foi
le isi pepa a Tanielu.*



Saunia e Darcie Jensen Morris

E faavae i se tala moni

"A ou lelei ma agalelei ma fesoasoani i se tasi ou te vaai i ai, ou te fiafia lava" (Children's Songbook, 197).

Na vaai atu Mateo i le galuega o le matematika i le laupapa ma tusi faavave i lalo i lana api e tusi ai faamatalaga. O lana mataupu e fiafia i ai o le matematika, o lea sa matua manao ai lava o ia e gauai atu. Ae sa tau le lagona atu e ia le mea o loo fai mai ai Mrs. Santos aua o loo talanoa mai lana uo o Tanielu.

"Shh! Tanielu, ua le mafai ona ou lagona!" Na musu-musu atu ai Mateo. Ae sa faaaauau pea ona talanoa

Tanielu. Na iu lava ina lagona mai o ia e Mrs. Santos.

"Tanielu, ua e toe faalavelave foi," na fai atu ai Mrs. Santos. "Ua uma ona tuuina atu ia te oe le lapataiga. Ua tatau nei ona e tuuina mai ia te au se pepa."

Na aapa atu lemu lava Tanielu i totonu o lana kesi ma tuu atu ia te ia se pepa momu. Na solovi i lalo ona tauau, ma ia tilotilo atu i le fola. Na tuu atu e Mrs. Santos ni pepa i tamaiti aoga pe a amio lelei ma mulimuli i faatonuga. E tusi e tamaiti aoga o latou igoa i pepa ma tuu i totonu o se fagu i aso taitasi. Ae e tatau ona e toe faafoi atu le pepa pe afai e te le amio lelei. O aso Faraile uma lava, e avae ai e Mrs. Santos se pepa mai le fagu, ma o

le e manumalo e filifilia se faailoga mai le pusa oa a le vasega! Na tele lava pepa a Tanielu e tatau ona toe faafoi atu ona o le tautala, o lea na le malo ai lona igoa i le tele o taimi. Na faanoanoa Mateo ona sa toe mamulu atu le isi pepa a Tanielu.

Sa tamoe atu Mateo i fafo i le malae i le malologa e taalo soka. Na ia vaai atu ia Tanielu o loo tutu na o ia i tafatafa o taupega. Na ia iloa atu o loo tagi Tanielu. Na manao Mateo e fesoasoani ia te ia ia maua se lagona sili atu.

“E te fia taalo soka?” Na fesili atu ai Mateo.

E lei faia se tala a Tanielu. Na taumafai Mateo e talanoa atili atu ia te ia, ae na ona faliuese lava o Tanielu.

“Ia, o le a ou i ai i le malae soka pe afai e sui lou mafaufau.”

Na alu atu Mateo e taalo ma isi ana uo, ae sa ia faaaau pe aea ona mafaufau ia Tanielu. O le a atoa le valu tau-saga o Mateo ma toeitiiti ona papatiso lea. Na ia manao ia faapei o Iesu ma ia avea ma se uo lelei. Pe i ai se mea e mafai ona ia faia e fesoasoani ai ia Tanielu ia aua nei oo i se faafitauli?

O le aso na sosoo ai, sa faitauina ai e le vasega se tala i ni vaega toalaiti. Ae nai lo le faitau, na togia maualuga e Tanielu lana tusi i le ea.

Na taumafai Mateo e taofi o ia. “Tanielu, e tatau ona tatau faiatina le tusi, ae le o le taalo ai.”



Na toe togi e Tanielu le tusi. Na vaai atu Mrs. Santos i ai toeitiiti lava pa i le faaalo. Na ia savali atu ia Tanielu ma tuu atu lona lima mo se pepa. Na aapa atu Tanielu i totonu o lana kesi. Na vaaia le popole i ona foliga ao ia faaaau le sueina.

“Auoi, leai! Masalo ua leai ni ana pepa!” Na mafaufau ai Mateo. O le leai o ni pepa o lona uiga e tatau ona nofo Tanielu i totonu mo le malologa. Na amata ona mafaufau loloto Mateo. O le a se mea e mafai ona ia faia? Ona ia maua lea o se manatu lelei.

“Tanielu,” na fai atu ai Mrs. Santos, “afai e leai sau pepa mo au, ona—”

Sa manava loloa Mateo. “E mafai ona ou totogi mo ia, Mrs. Santos?” na ia fesili atu ai.

Sa filemu le vasega. E leai lava se tasi na fesili atu muamua faapea ia te ia. Sa le mautonu Mateo po o le a le mea o le a ia fai mai ai.

Sa foliga tei Mrs. Santos. Ona ia ataata lea. “O oe o se uo lelei tele. Ioe, e mafai ona e totogia le pepa a Tanielu mo ia.” Na tuu atu e Mateo se tasi o ana pepa ia Mrs. Santos.

“Faafetai, Mateo,” na fai atu ai Tanielu.

“Ioe!” na fai atu ai Mateo. “E te manao e faiatina faatasi nei loa?”

Na lue atu le ulu o Tanielu ma ave ae i luga lana tusi.

Ao amata ona faiatina e Tanielu, na lagona e Mateo le mafanafana ma le fiafia i totonu. O le manatu lelei lena na sau mai le Agaga Paia! Na iloa e Mateo na finagalo Iesu ia te ia e fesoasoani atu ia Tanielu—aua e alofa o Ia ia Tanielu. Ma na lagona foi e Mateo le alofa o Iesu! ■

E alala le tusitala i Iuta, ISA.

O IESU NA TOTOGIA MO I TATOU

Na totogi e Mateo le pepa a Tanielu aua na popole o ia e uiga ia te ia. E le mafai ona tatou totogi mo agasala a se tasi, ae e mafai e lesu! Ona e alofa o la ia i tatou, na totogi ai e lesu le tau mo a tatou agasala uma lava. Pe a tatou faia se mea sese, e mafai ona tatou salamo ma faamagaloina.


E mafai ona fesoasoani lesu ia i tatou ia faia ia sili atu!



Saunia e Elder
Dale G. Renlund


O Le Korama
a Aposetolo e
Toasefululua

E mafai faapefea ona fesoasoani le salamo ia te au ia lagona ai le fiafia?



*Mai le "Salamo: O
Se Filifiliga Fiafia,"
Liahona, Nov. 2016,
121–124.*

O Le Mea Faapapa



Na nonofa le aiga o Elder Dale G. Renlund ina ua 12 ona tausaga, i Suetena. I se tasi aso Sa, na aumai ai e le uo a Dale o Steffan se mea faapapa lapoa ma se afitusi i totonusi o le fale Lotu. Sa fafia Dale. Na ave e Dale le mea faapapa ma faaola le vavae. Na ia taumafai e tape le vavae, ae na mu ai ona tamailima ma pau ai le mea faapapa! Na tilotilo atu Dale ma Steffan ma le fefe tele ao faaauau ona mumu le vavae.

Na pa le mea faapapa! Na faatumulia le falelotu i se manogi leaga. Na vave lava ona ao mai i luga e Dale ma Steffan fasi mea faapapa ma tatala faamalama ina ia faaalu ai i fofo le manogi. Na la faamoemoe o le a leai se tasi e iloaina.

Ao o mai tagata i le sauniga faamanatuga, na latou *iloaina* lava. Na matuai malosi lava le manogi o lea na le mafai ai ona taulai atu tagata i le sauniga. Na lagona e Dale le faalumaina tele ma le maasiasi. Na ia iloaina o le mea na ia faia na le fafia i ai le Tama Faalelagi.


Ina ua maea le lotu, na fai atu Peresitene Lindberg, le peresitene o le paranesi, ia Dale e sau i lona ofisa aua na ia iloa atu o loo i ai se mea ua faaletonu. Na tau atu e Dale ia Peresitene Lindberg lona salamo tele e uiga i le mea faapapa.

Na agaalofa Peresitene Lindberg. Na ia susueina tusitusiga paia ma fai atu ia Dale e faitau i nisi o fuaiupu ua vaseina. Na faitau Dale, "Faauta, o ia o lē ua salamo

i ana agasala, o ia lava lea ua faamagaloina, ma o A'u, o le Alii, e lē toe manatuaina lava i latou. O le mea lenei e mafai ai ona outou iloa pe afai ua salamo se tagata i ana agasala—faauta, e ta'uta'u atu e ia i latou ma e lafoai i ai" (MF&F 58:42–43).

Ina ua maea le faitau a Dale, na ia iloa atu Peresitene Lindberg ua ataata. Sa ia lagona ua faamagaloina o ia. Na lagona e Dale le fafia, ao ia tuua le ofisa.

Na aoao Elder Renlund e faapea e mafai ona faamagaloina o ia pe a ia faia se mea sese. E mafai ona ia lagonaina le fafia pe a ia salamo ma tausia poloaiga a le Tama Faalelagi. ■



Tes. 12

“Amuria e faanoanoa:
aua e faamafanafanaina
i latou”
(Mataio 5:4).

Tes. 11

“Sa fai au ma
tagata ese, ona
outou talia lea o au”
(Mataio 25:35).

Tes. 14

“Aua tou te
faamasio atu, ina nei
faamasioina outou”
(Mataio 7:1).

Tes. 13

“O mea uma foi tou te loto
i ai ia fai a tagata ia te
outou, ia faapea lava ona
outou faiia ia te i latou”
(Mataio 7:12).

Tes. 15

“Amuria e aloloafa atu”
(Mataio 5:7).

Tes. 17

“Ia outou potopoto
faatasii soō”
(3 Nifae 18:22).

Tes. 16

“[Na ou] le lavalava,
ona outou faaofuina
lea o au”
(Mataio 25:36).

Tes. 19

“Ia outou olioli,
ma fiafia lava”
(Mataio 5:12).

Tes. 18

“E ao ina outou
mataala ma tatalo
e le aunoa”
(3 Nifae 18:15).

Tes. 20

“A ia outou
saili le malo o le Atua”
(Luka 12:31).

O Aoaooga a Jesu

*Ia faiatai i aso taitasi, se mea na
aoao mai e Jesu ona mafau-
fau lea e uiga i le ala e
mfafai ai ona e mulimuli
i lana aoaoaga. Ona
valivali lea o le fetu!*

Tes. 21
“Faomagaloina atu
tagata ia latou agasala”
(Mataio 6:14).

Tes. 23
“Na ou mai, ona outou
asiasiaria mai lea o au”
(Mataio 25:36).

Tes. 25
“la pupula atu lo outou
malamalamai i luma o
tagata, ina ia latou iloa la
outou amio lelei, latou te
vivii atu aii i lo outou
Tama o i le lagi.”
(Mataio 5:16).

Tes. 22
“O mea na outou
vaai ua ou faia o mea
lava ia ia outou faia”
(3 Nifae 27:21).

Tes. 24
“Ua tusia, e taua
Lou fale o le fale tatalo”
(Mataio 21:13).

Ole tausaga fou o le a matou aoina mai ai ni fetu mai tamai-
ti le salafa o le lalolagi! Auina mai se fetu ma tau mai ia i
matou pe na faapefeca ona avea oe o se faataitaiga susulu.
Aua nei galio e faaoofia ai se ata, pe afai e i ai sou ata. Auina
mai i le liahona.lds.org.

ATA MANALE GETTY IMAGES



Saili atili e uiga i aoaooga a lesu Keriso i le Mormon.org ia Tesema!
O aso nuamua e 10 o lenei gaoioiga e mafai ona maula i le vaega fiafuainumera
o lenei tusiga i le liahona.lds.org po o totonu o le potokalama o le Gospel Library.

Fai se Avanoa mo Ia

Leomalie ma Fiafia

$\text{♩} = 76-84$

1. Ina u - a a - fio mai ie - su I le la - lo - la -
 (2. E) pei o le fa - le - tali - ma - lo Le pi - si o ta - tou o -
 (3. E) le ma - fai na toe tata - la Se po - tu i le Pe -

gi. Sa le - ai se po - tu a - va - noa ma
 laga. I mea e tele ta - tou te faia. ma
 pe. Ae tata - la o ta - tou lo - to i soos

sao - ga - le - mu mo Ma - ri - a e fa - nau ai le
 nisi tai - mi ua le - ai so Ta - tou ava - noa
 se tasi, Mau - oa pe ma - ti - va. Ille a - lo - fa

Faa - o - la.
 mo I - a.
 o Ke - ri -

2. E

3. E

so.

I le a - lo - fa o Ke - ri - so.

© 2017 Larry Hiller ma Michael F. Moody.

E mafai ona kopi lenei pese mo le faaaogaina i le fale ma le ekalesia i mea e le faapisinisi.

E tatau ona tuu lenei faasilasilaga i luga o kopi taitasi e faia.

O LA TATOU ITULAU



Na matou talanoa e uiga i le taaa o le malumalu i lo matou olaga ma aiga. Na matou faia ni faatusa o le malumalu faatasi ma o matou aiga.

Tamaiti o le peraimeri i se uarota i Sao Paulo, Pasila.



Ou te faaalia i taimi uma le alofa i lou uso ma lou tuafafine e ala i le fesoasoani ia i laua e fai a la meaaoga. Ataata!


Benjamin S., 11 tausaga, Kenya



Na matou o i le matafaga mo la matou tafaoga ma faia se talita o le FMT i le oneone.

Sofia, Matias, ma Tomás O., Atenitina

I always show love to my brother and sister by helping them do their homework.



O LE SILISILIESE

*E fesili tagata uma ia i latou lava,
"O ai le Silisiliese?"
O le toatele e le iloa.*

*Latou te le iloaina e vaiai
o la i mata o tamaiti,
Pe a e lagona le savili
o musumusu mai,
I le loto o le toa,
I le ataata a e pele ia te outou,
Ma e te le na ona valaauna
o la "Atua" po o "le Silisiliese"
Ae valaaau o la . . .
"Io'u Tama Faalelagi."*


Adriana G., 9 tausaga, Chile

Na Soifua Mai Iesu i Peteleema

Saunia e Kim Webb Reid



Na Malaga atu Maria ma Iosefa i Peteleema. Ua toeitiiti lava oo i le taimi e soifua mai ai Iesu. Na toatele naua tagata na asiasi atu i Peteleema o lea na le mafai ai ona maua se potu mo Maria ma Iosefa e nonofo ai. Na faatagaina e le pule o le faletalimalo i laua e nonofo i se fale povia.






E lei leva ae soifua mai loa Iesu. Na faaali mai se fetu
pupula fou e tau atu ai i tagata uma faapea ua oo mai le
Malamalama o le Lalolagi i le fogaeleele.




Na tau atu e se agelu i ni
leoleo mamoe faapea ua
soifua mai Iesu. Na latou
faataalise atu e vaai i le
pepe o Iesu o loo taoto i
se fale povia.



Na afio mai Iesu i le lalolagi aua e alofa o ia ia te au. O le a ou mulimuli i Lona malamalama i lenei Kerisimasi ma le tausaga atoa lava! ■

Mai le Luka 1:26–38; 2:1–20



"Ua latou [leoleo mamoe] faataalise atu, ona maua lea o Maria ma Iosefa,
ma le tama meamea o tacto i le fale povi" (Luka 2:16).



Saunia e Iosefa Samita
(1905-44)
Peresitene Muamua
o le Ekalesia

LOTOTOA I FUAFUAGA FAATUINA A KERISO

E le mafai ona maoae tele lo outou lelei.

O'a'u o se e alofa i le fuafuaga faatuina a Keriso faapea ma le loto mama, ola mama, ma se ala tonu ma le sa'o o le amio, ma se savali e paia.

Ou te talitonu i le ola i se olaga mama, amiontonu ma le paia i luma o le Atua ma lagona ai o lo'u tiute le tauanau o tagata uma i lo'u mana ina ia faia le mea lava lea e tasi, ina ia faamuta ai lo latou faia o le leaga ma aoao ai ia faia le lelei, ma lafoai a latou agasala e ala i le amiontonu.

O le faamalosia o lo tatou faatua-tua e ala i le faaopoopoina o uiga lelei uma ia e teuteuina le fanau a Iesu faamanuiaina, e mafai ona tatou tatalo i le taimi o tatalo; e tatau ona tatou alolofa i o tatou tuaoi ia pei ona tatou alolofa ia i tatou lava, ma faatuatua i taimi o tofotofoga, ma iloa o le taui o ia mea e silisili i le malo o le lagi. E maeu lea faamafanafanaga! Faauta i se olioli! Ia ou ola i



le olaga o e amiontonu, ma ia faapenei lo'u taui! . . .

I le avea o se tasi e matua naunau-tai i le faaolataga o tagata, sei ou faa-manatu atu ia te outou uma o e tauivi ma le finafinai faaleAtua mo le amio mama, paia, ma poloaiga a le Alii. Ia amiolelei, ia faautauta, ia amiosa'o, ia limafoai; ae silisili ai i na mea uma, ia agaalofa, ma ia fua mai pea i galuega lelei. . . .

Ia agamalu ma agamaualalo, amiontonu ma mama; ia faafoi atu le lelei mo le leaga. . . . Ia lotomaualalo ma onosai i laasaga uma o le olaga; ona sili atu ai lea ona mamalu lo tatou manumalo.

Tatou te lagona e tatau ona apo-apoai atu i o tatou uso ma le malosi

tele, ina ia lotomaualalo ma lototatalo, ina ia savavali ai o fanau o le mala-malama ma le ao, ina ia latou maua le alofa tunoa e tetee atu ai i soo se faaososoga, ma manumalo ai i mea leaga uma i le suafa lelei o le Alii o Iesu Keriso.

O le manatu e faapea o tagata tai-toatas i una lava e tauia e tusa ma lona lava filiga ma lona sogasoga a o i le tovine, e tatau ona musuia tagata uma o e ua valaaufina e avea ma avefeau o nei tala lelei. . . .

O lo tatou faatuuatua ua i le Atua, ma ua tatou naunautai, ma fesoasoani ia i tatou Lona alofa tunoa, ina ia faatumauina le fuafuaga faatuina ma tumau i le faamaoni seia oo atu i le iuga, ina ia faapaleina ai i tatou i o tatou pale o le mamalu faaselesitila, ma ulufale atu i le malologa ua saunia mo le fanau a le Atua. . . .

E le mafai ona maoae tele lo outou lelei. O le onosai e faalelagi, o le usitai e tamalii, o le faamagalo atu e alofa mutimutivale, ma o le faaeaina e faaleatua; ma o le na te tumau i le faamaoni seia oo i le iuga e le mau-mauina lona taui. O se tagata lelei o le a manumalo i mea uma e faamamalua-ina ai Keriso. ■

Mai i Aoaoga a Peresitene o le Ekalesia: Iosefa Samita (2011), 378.



**KERISO UA AUINA ATU
I LE MALUMALU,
SAUNIA E CHRISTEN DALSGAAR**

"Le Alii e, e te tuuina atu nei lau auauna ia alu ma le manuia, pei o lau afioga:
"Aua ua iloa e ou mata le faaolataga mai ia te oe,
"Ua e saunia i luma o nuu uma lava;
"O le malamalama e faamalamalama a'i Nuu ese ma le mamalu o lou nuu o Israelu."
—Luka 2:29–32; tagai foi i fuaiupu 25–35.

E i Ai Foi i le Lomiga Lenei

MO TALAVOU MATUTUA

O Lau Meaalofa i le Faaola

I le avea ai ma se faifeautalai, na ou lagonaina le le agavaa. Ona ou iloaina lea ua ou manaomia le taofia o le taulai ia te au lava ia ae amata ona taulai atu i le Faaola.



i. 48

MO LE AUTALAVOU




Mafuaaga e Valu e Avea ai le Kerisimasi o se **Taimi Maoae** e Avea ai o se **Faifeautalai**

Pe na e manao e faasoa atu le talalelei i au uo ae e te lei iloaina pe faapefea? O le mafuaaga lenei e avea ai le vaitau o le Kerisimasi o se tasi o taimi e sili ona faigofie o le tausaga e avea ai ma se faifeautalai!

MO TAMAITI

O Aoaoga a Iesu

Saunia mo le Kerisimasi i lenei masina e ala i le faaaogaina o nei fetu e mulimuli ai i aoaoga a lesu.



i. 72